

Ittiin Lixa

1 Kun dubbii Waaqayyoo isa bara Uziyaan, Yotaam, Ahaaz, Hisqiyaasis tarreetti biyya Yihudaa irratti mo'anii, Yerobi'aam ilmi Yeho'aash immoo biyya Israa'el irratti mo'etti, gara Hose'aa ilma Berijt dhufee dha*.
*1 Isa 1:1; 2Mot 14:23-29; Amo 1:1

Hose'aan Fudhee Ijoollee Sadli Godhachuu Isaa

2 Waaqayyoo dura karaa Hose'aa yeroo dubhatetti, Hose'aadhaan, "Biy-yichi Waaqayyoon dhiisun isaatiin ejja guddaa keessa lixera; kanaaf dhaqi, dubartii ejjituuf fudhi, ijoollee ejjaas godhadhu!" jedhe*.

*2 2:4-10; 3:1; 4:11-19; 5:3-4; 9:1-2; 11:2; Er 2:20; Kes 23:18

3 Kana irratti inni dhaqee Gomerin intala Dijblaayim fudhee; isheen ulfoofttee ilma in deesseef. *Yommuus Waaqayyoo, " 'Yizre'el' jedhii moggaasi! Yeroo gabaabduu booddee sababii dhiiga Yizre'elitti dhangala'eef mana Yehuu nan adaba; mootummaan Israa'elis kanumaan akka raawwatu nan godha*. *Gaafas ani dachaa Yizre'el keessatti humna warra Israa'el nan cabsa" jedheen.

*4 2Mot 10:10-11

6 Gomer ammas ulfoofttee, durba in deesse; Waaqayyoo immoo Hose'aadhaan, "Ani si'achi mana Israa'eliiif cubbuu isaanii isaaniif dhiisuuf matumaa oo'a hin argisiisu, kanaaf 'Lo-Ruhaamaa' jedhii maqaa moggaasi! [Hiikaan isaas 'Oo'a hin arganne' jechuu dha]*. *Mana Yihudaatti garuu oo'a nan argisiisa, isaan nan oolchas; iddaadhaan yookiis billaadhaan yookiis lolaan yookiis fardeenii fi abboota fardeenii utuu hin ta'in, ani Waaqayyoo gooftaan isaanii harka kootiin isaan nan oolcha" jedhe*.

*6 2:3,25

*7 Mik 5:9; Zak 4:6; Isa 31:1-3; Far 20:7; 2Mot 19:32-37

8 Gomer erga "Lo-Ruhaamaa" hamma guuftee, ulfoofttee ilma in deesse. *Waaqayyoo yommuus Hose'aadhaan, " 'Lo-Amii' jedhii moggaasi, isinoo saba koo miti, anis Waaqayyoo keessan

miti" jedhe. ["Lo-Amii" jechuun "Saba koo miti" jechuun dha*].

*9 2:25; Bau 3:14; Er 7:23

Abdil Gara Fuula Dnraa

2 Si'achi garum lakkoobsi namoota Israa'el akka cirracha galaanaa isa hin safaramnee, isa hin lakkaa'amnees in ta'a; qooda, "Isin saba koo miti" ittiin jedhame immoo, "Ijoollee Waaqayyoo isa jiraataa" jedhamuuf jiru*.

2 Ijoolleen Yihudaa fi ijoolleen Israa'el tokkummaatti walitti in qabamu; walumattis nama isaan geggeessu tokko in kaafatu; guyyaan Yizre'el guddaa waan ta'uuf, isaanis biyyicha keessaa ol in dhufu*.

3 Egaa obholoota keessan, "Amii" obboleettota keessanis "Ruhaamaa" jedhaa waamaa! ["Amii" jechuun "Saba koo", "Ruhaamaa" jechuun "Oo'a argate" jechuu dha*].

*1 Uma 22:17; Rom 9:29

*2 Er 3:18; Hos 1:4; 2:23-24

*3 1:6,9

Amanamuu Dhabuu Irraa Kan Ka'e Adabamuu

4 Haadha keessan hadheessaa! Isheen haadha manaa koo ta'uu waan dhiifteef, anis abbaa manaa ishee ta'uu waanan dhiiseef, ishce hadheessaa! Isheen halalummaa fuula ishee irraa mol'atu, milikkita ejjummaa harma ishee gidduudhaa haa haafu*!

5 Yoo kun ta'uu dhaabaate garuu, wayyaa ishee irraa haasee akkuma gaafa dhalatteetti qullaa nan hambisa; ishees akka lafa onaa, akka lafa isa gogaa nan godha, dheebuudhaan akka isheen duutu nan godha*.

6 Ijoolleen ishee ejjummaadhaan waan dhalataniif, ani oo'a isaan hin argisiisu. *7 Haati isaanii in ejjite, isheen garaatti isaan baattes waan yeellaasisaa hojjette; isheenoo, "Jaalalleen koo buddeena, bishaan, uffata rifeensa hiddamaa kan quncee talbaas, dhadhaa ejersaa, dhugaatiis anaaf in kennu; kanaaf isaan duukaa nan adeema" jetteetti*.

*4 1:2; His 16:23-26

*5 His 16:4-5; 23:29

*7 Er 44:17-18

8 Erga akkas ta'ee ani immoo akka isheen karaa hin argannetti, qoraattiidhaan karaa isheetti nan cufa, dallaa dhagaas ishee duratti nan ijaara. *9 Yoos isheen jaalallee ishee duukaa fiigdee isaan hin qaqqabdu, barbaaddees isaan hin argattu; yommuus, "Ammaa mannaa, dur abbaa manaa koo isa duraa wajjin yommuun jiru anaaf wayyaa ture;

kanaafis ka'ee gara isaatti nan deebi'a" in jetti*.

10 Garuu midhaan, waynii, dhadhaa ejersaas akka ani kenneef, meetii fi warqee isa ittiin waaqayyolii tolfamoo isaanii Ba'aalin tolfatanis akka ani isheetti baay'ise isheen hin hubanne*.

11 "Kanaaf ani midhaan koo yeroo inni bilchaatutti, cuunfaa waynii koos yeroo inni ga'utti irraa nan deehifadha; rifeensa hiddamaa fi quncee talbaa isa isheen ittiin qullaa ishee dhokfachuuf jirtus ishee duraa nan fudhadha. *12 Jaalallee ishee durattis saala ishee bakkeetti nan baasa;

harka koo keessaa buntees namni ishee oolchu hin jiru*.

13 Gammachuu ishee hundumaa, dalaga ishee, baatii ji'a ji'aan isheen ayyaaneffattu, guyyoota Sanbata ishee, guyyaa ayyaana beekamaa isheen qabdu hundumaas nan hambisa*.

*9 Luq 15:17-19

*10 Kes 7:12-13; Hos 8:4; His 16:17,19

*12 His 16:36-37; Er 13:22

*13 Amo 8:10

14 "Mukkeetii waynii fi mukkeetii harbuu warra isheen 'Jaalallee kootu gatii anaaf kenne' jettu sana nan gad dhiisisa; isaanis caakkaa ta'anii bineensonni akka irraa nyaatan nan godha. *15 Guyyoota isheen Ba'aal waaqayyolii tolfamoo isheettiif ayyaana godhatte, ixaana aarsiteef sanaaf, ishee nan adaba; isheen amartii ishee kaa'attee mi'a ishees naqattee, jaalallee ishee duukaa adeemtee, ana immoo irraanfatee" jedhee dubbateera Waaqayyoo.

Amanamummaa Waaqayyoo Saba Isaa Argisiisu

16 Kanaafis kunoo, ani ishee tole nan jechisiifadha, gara lafa onaatti ishee geessee dubbii garaa ishee rukutu nan duhdadha*.

17 Achi utuu jirruu iddoo dhaaba waynii isheetii isheedhaaf nan deebisa, dachaa Aakor isa lixuuf abdi hin qabnes lafa abdiidhaan ol itti lixan nan godha; achitti immoo akkuma hara ijoollummaa isheetii akkuma yeroo biyya Gibxii baateettis anaaf in owwaatti*.

*16 Isa 40:2; Er 31:2

*17 Iya 7:24-26

- ¹⁸ "Ati gaafas 'Abbaa manaa koo' jettee na waamta malee, deebitee akka Ba'aal isa Waaqayyo tolfamaatti ana hin waamtu" jedhee dubbateera Waaqayyo*.
- ¹⁹ Maqaan Ba'aal waaqayyolii tolfamoo kanaas afaan isheetti akka hin dhufne nan godha; maqaa isaanii namni yaadatus hin jiru.
- ²⁰ Gaafas bineensota daggalaa, simbirroota qilleensa keessa balali'an, warra lafa irra munyuuqanii wajjinis kakuu isiniif nan gala; iddaa fi billaa, mi'a lolaas caccabsee lafa irraa nan balleessa, akka isin nagaatti, gabiitti teessanis nan godha*.
- ²¹ Ani yeroo hundumaaf kan koo sin godhadha; qajeelina, dhugaa, jaalala, oo'as argisiisuudhaan kan koo sin godhadha*.
- ²² Amanamummaa argisiisuudhaanis kan koo sin godhadha, atis ana Waaqayyo kee hartee in hubatta.
- ²³ Waaqayyo dubbateera kunis in ta'a, "Gaafas ani nan owwaadha, bantiwwan waaqaaf nan owwaadha, isaanis lafaaf in owwaatu; ²⁴ lafti in owwaata; midhaanii fi daadhii waynii dhadhaa ejersaas in baasa, isaanis Yizre'eliif in owwaatu*;
- ²⁵ biyyicha keessa jabeessee ishee nan dhaaba, warra oo'a hin argannettis oo'a nan argisiisa, saba koo isa hin ta'iniinis 'Saba koo' nan jedha; innis 'Waaqayyo koo' nan jedha" jedhe*.

*20 Isa 11:6-9; Hos 1:7; Isa 2:4

*21 Isa 54:5-6; Mul 19:7

*23-24 1:4; 2:2; 14:4-8; Zak 8:12

*25 1:6,9; Rom 9:25; 1Phe 2:10

Hose'aa Fi Haadha Manaa Isaa Ishee Hln Amanamne

3 ¹ Waaqayyo, "Namoonni Israa'el gara waaqayyolii kan biraatti yoo garagalan iyyuu, aarsaa bixxillee ija waynii isaanis yoo jaallatan iyyuu, Waaqayyo akkuma isaan jaallatu, ati immoo ammas dhaqi, dubartii nama ishee jaallatu utuu qabduu ejjitu tokko jaalladhu!" anaan jedhe*. ² Kanaaf ani meetii kudha shanii fi garbuu kuntaala lamaa fi kiiloo digdamaatiin ishee nan bitadhe. ³ Kana booddee isheedhaan, "Guyyaa baay'ee calluma jedhii anaaf taa'i, ejjummaa hin hojjetin, nama biras hin ga'in! Anis akkasuma utuu si bira hin ga'in nan taa'a" nan jedhe.

*1 1:2; Er 7:17-18

4 Namoonni Israa'el iyyuu mootii, gurguddoota biyyaa, qalma gubamu, utubaa dhagaa qullaa'aatti ilaalamu, uffata lubummaa isa uffatanii Waaqayyoon gaafatan, bifa waaqayyolii mi'a mana keessaas malee guyyaa baay'ee-dhaaf taa'uuf jiru*. ⁵ Kana booddees namoonni Israa'el deebi'anii, Waaqayyo isaanii goofticha, Daawitiniis mootii isaanii in barbaaddatu; dhuma bariichaattis isaan sodaa guddaadhaan gara Waaqayyoo, gara wanta gaarii inni isaaniif godhus in dhufu*.

*4 2Sen 15:3

*5 Er 30:9; 23:5; His 34:23-24

Hadheeffamuu Israa'el

- 4** ¹ Yaa namoota Israa'el, biyyicha keessa amanamummaan, jaalalli, Waaqayyoon beekuun waan hin jirreef, Waaqayyo warra biyyicha keessa jiraatanii wajjin dubbii qaba, kanaaf dubbii Waaqayyoo dhaga'aa*!
- ² "Kakatanii haaluun, ajjeesuum, hatuun, ejjuum, humnaan nama irratti ka'uun, dhiiga dhangalaasuun, dhiiguma dhangalaasuu itti in dahala*.
- ³ Kanaafis lafichi in boo'a, warri laficha irra jiran hundinuu, bineensoonni daggalaa fi simbirroonni qilleensa keessa

balali'an gad in dhumu, qurxummiin galaanaa iyyuu fudhatamanii in badu*.

*1 2:4

*2 7:1; Bau 20:13-16; Er 7:9

*3 Er 12:4

Hadheeffamuu Lubootaa

- ⁴ "Namni dubbii hin kaasin, namas hin ifatin! Ani garuu sii wajjinan dubbii qaba, yaa lubichaa*!
- ⁵ Ati guyyaadhaan in gufatta, raajichis immoo halkaniin sii wajjin in gufata; biyya kee ishee haadha kee sana nan balleessa.
- ⁶ Sabni koo karaa ittiin na beeku waan dhabeef balleeffame; ati ana beekuu tuffattee waan dhiiftee, anis luba anaaf ta'uu kee tuffadheen si dhiise; erga ati seera koo seera Waaqayyo keetii irraanfatee, anis immoo ilmaan kee nan irraanfadh*.

*4 Er 5:4-5

*6 Mil 2:8-9; Er 2:8; His 22:26

⁷ "Hammuma ofii baay'atan na yakkuu isaaniis in baay'isan; ani immoo ulfina isaanii salphinatti nan geddara.

⁸ Kennaa sabni koo waa'ee cubbuu isaatiif dhi'eessu in nyaatu; sabni akka yakkuu garaa guutuudhaan in hawwu*.

⁹ Wanti saha sanatti dhufu lubichattis in dhufa; kanaaf ani adeemsa isaatiif isa nan adaba, hojii isaas mataa isaatti nan deebisa.

¹⁰ Nyaachuu in nyaatu, garuu hin qufan; ejja waaqayyolii tolfamoo in ejju, garuu galanii ijoollee hin godhatan; isaanoo ana Waaqayyoon dhiisaniiru, dhimma koos hin qaban.

*8 Lew 4:13-21,27-35

Waaqayyolii Tolfamoo Sagaduu Isaanitiif Hadheeffamuu Sabaa

- ¹¹ "Ejja waaqayyolii tolfamoo ejjuum, daadhii waynii isa ba'aa, isa hin ba'inis dhuguun, yaada isaan keessaa fudhate. ¹² Sabni koo bifa muka irraa qiinqimame deebii in gaafata, dhaabanni isaas akka isaa akka itti bimuuuf in eeggata; yaadni ejjummaa isaanitti galee isaan wallaalchise; Waaqayyo jalaa ba'anii ejja isaanii duukaa bu'an*.
- ¹² Er 2:27
- ¹³ "Isaan bantii tullootaa irratti qalma in qalu, gaarota irrattis aarsaa in dhi'eessu; kanas gaaddisi isaanii mararaa waan ta'eef, muka boomii, qilxuu fi dambii jalatti in hojjetu; kanaafis intalooni keessan in gaalamootu, dubartoonni ilmaan keessaniis in ejju*.
- ¹⁴ Warri dhiiraa ofii isaaniitii ejjitootaa wajjin gara tokkotti in goru, dubartoota galma keessatti ejjaaf qophaa'anii taa'anii wajjinis qalma in qalu erga ta'ee, isa intalooni keessan gaalamootaniif, isa dubartoonni ilmaan keessanii ejjaniifis ani isaan hin adabu; sabni wallaalaanis in balleeffama*.
- ¹³ Kes 4:2-3; Er 2:20; His 6:13
- ¹⁴ 9:1-2; His 16:16; 1Mot 14:24
- ¹⁵ "Yaa Israa'el, ati ejja akkasiitti yoo gorte iyyuu, Yihudaan akka kee hin yakkin! Giilgal iddoo sagadaa hin ga'inaa! Bet'elitti [ishee 'Bet-Aween' kana jechuunis 'Mana jal'inaa' jedhamtetti] ol hin ba'inaa,

- 'Dhugaa Waaqayyo isa jiraataa' jettaniis bin kakatinaa*!
- ¹⁶ Israa'el akkuma goromsa didduu gara-didaa erga ta'ee, amma immoo Waaqayyo akka hoolotaatti bakkee bal'aa keessa isa tiksaa ree?
- ¹⁷ Efreem bidhata waaqayyolii tolfamanii ta'eera, itti dhiisaa!
- ¹⁸ Gurguddoonni isaa warri gaachana baatan iyyuu dhugaatiin isaanii erga dhume, ejja isaaniitti in ka'u; salphina kanas baay'isanii in jaallatu.
- ¹⁹ Bubbeen akka waan qoochoo itti mareetti isaan fuudhee in adeema; sababii aarsaa isa waaqayyolii isaaniitiif dhi'essaniif in yeellaasifamu.

*15 Amo 4:4-5; 5:5

Of Eggachiisa Moototaa Fi Gurguddoota Biyyaaf Kenname

- 5** ¹ "Isin luboota nana kana dhaga'aa, yaa gurguddoota Israa'el, yaadatti qabadhaa; warri mana mootichaas gurra keessan as qabaa! Firdii eeguun isiniif kennamee ture, amma garuu firdiin isin irratti in raawwatama; isinoo iddoo 'Miisphaa' jedhamutti akka futtaasaa, tulluu Taabor irrattis akka kiyyoo diriirfamee taataniittu.
- ² Isin sanyii isa Shiixiimitti hojjettanii gad fageessitanii bal'ifattaniittu; ani garuu hunduma keessan cimsee nan adaba.
- ³ Ani Efreemin nan beeka, Israa'elis ana duraa hin dhokanne; amma immoo yaa Efreem, ejuu keetiin garagaggaluu argisiifteetta, Israa'elis xuroofteetti*.

- ⁴ Garagaggahuun yaada isaanii keessa waan jiruuf, Waaqayyoon bin beekan; hojiin isaanii gara Waaqayyootti deebi'uu isaan in dhowwa*.

*3 4:11-14; 6:10

*4 4:12; Er 13:23

- ⁵ "Wanti Israa'el ittiin of gurguddisu isumatti-dbugaa in ba'a; Israa'elii fi Efreem yakka isaaniitiin in gufatu; Yihudaanis immoo isaanii wajjin in gufata*.
- ⁶ Isaan bushaayee isaanii fi saawwan isaanii fudhatanii Waaqayyoon barbaaduuf in dhufu; garuu juni waan isaan jalaa deebi'eef, isa hin argatan*.
- ⁷ Isaan Waaqayyoof waan hin amanamneef, ormaaf ijoollee in godhatan; kanaaf baatii haaraatti isaan lafa isaanii wajjin xaph in jedhu.

*5 7:10,16; Isa 2:11-12

*6 Isa 1:11-15; Amo 8:11-12

Lola Yihudaa Fi Israa'el Gidduutti Ta'u

- ⁸ "Egaa fiinoo Giibe'aa keessatti, fiingees Raamaa keessatti afuufaa! Sagalee nama dammaqsu 'Bet-Aween' [ishee dur 'Bet'el' jedhamtutti] dhageessisaa! Beniyaaminin garaa raasaa!
- ⁹ Guyyaa adabaatti Efreem onaa in ta'a; wanta dhuguma gosa Israa'el keessatti ta'us nan labsa.
- ¹⁰ Gurguddoonni Yibudaa akka warra daarii dhiibanii ta'aniiru, kanaaf ani dheekkamsa koo akka bishaaniitti isaan irratti nan dhangalaasa*.
- ¹¹ Efreem wanta waa'ee hin baafne duukaa bu'uu yaadaa waan qabuuf,

- cunqurfamee dhugaan isaa badeera.
- ¹² Kanaafis ani Efreemitti akka madaa malaa kuusee ti, mana Yihudaattis akka boccoqaa raammessuu ti.

*10 Kes 19:14; 27:17

- ¹³ "Efreem dhukkuba isaa, Yihudaanis madaa isaa yommuu arge, yommuu Efreem biyya Asor dhaqe, mooticha guddaa sanattis in ergate; garuu inni isin fayyisuu, madicbas isin irraa balleessuu hin dandeenye*.
- ¹⁴ Anoo Efreemitti akka leencaa, mana Yihudaattis akka leenca saafelaa nan ta'a; ani, anumti tatarsaasee nan adeema, fuudhees nan sokka, kan oolbus hin jiru*.
- ¹⁵ Hamma isaan yakka isaanii of irratti beekanii fuula koo barbaaddatanitti, ani nan adeema, iddoo koottis nan deebi'a; yoos isaan rakkina isaanii keessatti dammaqanii ana in barbaaddatu" jedhe*.

*13 2Mot 15:19-20; Hos 7:11; 8:9; 12:2; 14:3

*14 13:7-8

*15 Isa 26:16; Er 29:13; Far 78:34

Geddarannan Yaada Garaa Inni Hundee Hin Qabne Adabamou Fiduun Isaa

- 6** ¹ Isaan, yommuu "Kottaa gara Waaqayyootti in deebinaa! Isatu nu tatarsaase, isatus nu fayyisa; isatu rukutee nu mammedesse, isatus erbee irra buusee nuuf hidha*.
- ² Guyyaa lama booddee deebisee nu fayyisa, sadaffaatti ol nu kaasa; fuula isaa dura in jiraanna*.
- ³ Egaa kottaa Waaqayyoon in barraa,
- isa beekuudhaafis in dhamaanaa! As ba'uun isaa akka ifa barii lafaa dhaabataa dha; inni akka bokkaa, akka bokkaa arfaasaa isa roobee lafa jiisuutti nuuf in dhufa" in jedhu.

*1 5:14

*2 Kes 32:39

- ⁴ Waaqayyo garuu, "Yaa Efreem, ani maal si godhu? Yaa Yihudaa, si immoo maal godhu? Jaalalli kee akka hurrii ganamaa ti, akka fixeensa ganamaan dafee bu'uu tis.
- ⁵ Kanaafis ani karaa raajotaa sin qiqqirixe, dubbii afaan kootii ba'uunis sin ajjeese; wanti na duratti qajeelaa ta'ee raawwatamu akka ifaa bakkee in ba'a.
- ⁶ Ani jaalala nan barbaada malee, aarsaa miti; aarsaa gubamu caalaa immoo ana Waaqayyoon beekuu keessan nan barbaada*.

*6 Isa 1:10-20; Mik 6:8; Mat 9:13; 12:7; 1Sam 15:22; Fak 21:3

Sabni Waaqayyoo Kakuu Cabsee Jal'ina Hojjechuu Isaa

- ⁷ "Isaan garuu iddoo 'Adaamaa' jedhamutti kakuu cabsan; achittis anaaf bin amanamne.
- ⁸ Giil'aad mandara warra hamaa bojjettanii isa faana dha'amee dhiigni keessatti argamee dha*.
- ⁹ Warri saamtuun ripbanii akkuma nama ceggatan, luboonnis walitti hidhatanii karaa Shekem dhaqu irratti nama in ajjeesu; isaan jal'ina akkasii in hojjetan.
- ¹⁰ Namoota Israa'el gidduutti wanta dhagna namaa suukessu argeera; Efreem achitti ejjummaa isaa in argisiisa; Israa'elis of in xureessa*.
- ¹¹ Saba koo warra kana gara gaariitti

yommuun deebisu,
yeroon haamamuu kee immoo
dhaaba in godhata, yaa
Yihudaa!

*8 12:12
*10 5:3

**Jal'inni Biyya Keessatti
Hojjetamu Waaqayyo Duratti
Yaadatamuu Isaa**

- 7 ¹ "Yeroo ani Israa'elin fayyisuu barbaadutti, yakki Efreem, jal'inni Samaariyaas in mul'ata; isaan gowwoomsaadhaan in hojjetu, hattuun qotee in lixa, aatuun immoo bakkeetti in saama*.
² Ani hojii isaanii isa jal'aa kana hundumaa akkan yaadadhu isaan garaa isaaniitti iyyuu hin yaadan; ammas gochi isaanii isaanitti naanna'ee fiula koo dura jira*.

*1 4:2
*2 Fak 5:22; His 7:3-4

- ³ "Isaan mooticha jal'ina isaaniitiin, gurguddootas dubbii isaanii isa garagaggalaadhaan in gammachiisu.
⁴ Isaan hundumti isaanii ejjitoota, isaan akka eelee ibidda irratti ho'ifamee, isa tolchituun yeroo bukoon sukkuumamee jalqabee hamma bukaa'utti ibidda itti tuqachuu dhiisuu ti.
⁵ Isaan guyyaa ayyaana mootii keenyaatti warra gurguddoota daadhii waynii obaasanii ho'a itti kaasanii in dhukkubsachiisan; mootichis warra ga'iftuu wajjin walii gale.
⁶ Jarri akkuma eelee gubaatti itti in dhi'aatu, haxxummaan garaa isaaniis riphee jira; aariin isaanii halkan guutuu in seeqa,

ganamas akka arraba ibidda in boba'a.
⁷ Isaan hundumti isaanii akka eelee ibidda irraa in gubu, warra isaan seerratanis in fixu mootonni isaanii bundinuu kukkufaniiru, isaan keessaas tokko illee ana hin waammanne*.
*7 2Mot 15:10, 14, 25, 30

**Sabni Israa'el Humna Ormaa
Abdatee Diigamuu Isaa**

- ⁸ "Efreem saba warra kaanii wajjin wal in maka, Efreem maxinoo utuu gara hin galfamin hafee dha;
⁹ Warri ormaa humna isaa in nyaatu, inni immoo isa hin beeku; harrin mataa isaa keessa faca'eera, inni immoo isa hin beeku.
¹⁰ Of gurguddisuun saba Israa'el isaanumatti dhugaa in ba'a, kana keessaa immoo gara Waaqayyo gooftaa isaaniitti hin deebine, kana hundumaafis isa hin barbaaddanne*.
¹¹ Efreem akka gugee ishee wallaaltuu mataa hin qabnee ti; warra Gibxii in waammatu, gara warra Asor immoo in dhaqu*.
¹² Yeroo isaan dhaqanitti ani kiyyoo koo isaan irratti nan diriirsa, akka simbirroo qilleensa keessa balali'uus gad isaan nan buusa; akkuma waldaa isaaniitti himametti isaan nan adaba.
*10 5:4-5; Isa 9:13; Amo 4:6-11
*11 5:13; 8:9; 12:2; 2Mot 17:4; Er 2:18
¹³ "Isaan ana irraa waan baqataniif isaaniif wayyoo! Ana waan yakkaaniifis badiisi isaanitti haa dhufu! Ani isaan furuufan ture, isaan garuu soba ana irratti in dubbatu*.

- ¹⁴ Siree isaanii irratti in wawwaatu malee, garaa isaaniitiin anatti hin iyyatan; midhaanii fi daadhii wayniitiif of in murmuru; ana irraa in garagalu*.
¹⁵ Utuma ani isaan gorsee irree isaanii jabeessuufii, isaan hamaa ana irratti in koratu.
¹⁶ Isaan gara Waaqayyo tolfamaa isa waa'ee hin baafneetti in garagalu; isaan akka iddaa qajeeltootti xiyya bin darbannee ti; sababii dheekkamsa arraba isaaniitiif gurguddoonni isaanii billaadhaan in kufu; sababii kanaaf warri biyya Gibxii isaanitti in ga'isu*.
*13 Far 81:13-14
*14 1Mot 18:28
*16 5:5; 9:6; Far 78:57

**Israa'el Kakuu Cabsee Seera Irras
Waan Daddarbeef Adabamuu Isaa**

- 8 ¹ Waaqayyo, "Fiinoo afaanitti kaa'adhu! Sababii sabni koo kakuu koo oabsanii seera kootiinis mormaniif, wanti akka joobiraa biyya koo irra in bu'a*.
² Nuyi warri Israa'el Waaqayyo keenya in beekna' jedhanii gargaarsaaf gara kootii in iyyu*;
³ haa ta'u iyyuu malee, Israa'el isa gaarii tuffatee waan dhiiseef, diinni isa in ari'ata.
⁴ Isaan mootii moosifataniiru, ani garuu keessa hin jiru; gurguddoota biyyaas in kaafatan, ani garuu hin beekneef; lafa irraa balleeffamuufis meetii isaanii fi warqee isaanii irraa waaqayyoolii tolfamoo hojjetatan*.
*1 Isa 58:1; Kes 28:49
*2 6:1-3
*4 7:7; 2:10; 13:2

dibicha isin tolfattanii itti sagaddan tuffadhee nan gate; dheekkamsi koo warra kana godhan irratti in boba'e; isaan hamma yoomiitti yakka malee taa'uu dadhabu ree?
⁶ Dibicha Israa'el keessatti hojjetame kana namuma barka tolu tokkotu tolche malee, dibichi sun Waaqayyo miti; dibichi warra Samaariyaa in burraa'a*.
⁷ Isaanoo akka nama qilleensa facaasuu wanta hundee hin qabne in facaasu; akka nama bubbee haamuuttis wanta guddaa sodaachisu in galfatu; midhaan maasii keessaa mataa hin qabu ijas hin godhatu; tarii ija yoo godhate iyyuu ormatu nyaata*.

*5-6 Bau 32:20; 1Mot 12:28, 32;
2Mot 17:16; Hos 10:5; 13:2; Isa 44:9-20
*7 10:13; Iyo 4:8; Gal 6:7; Er 12:13

- ⁸ "Warri Israa'el in miliqfaman, amma immoo saba lafa irraa keessatti akka qodaa namatti hin tollee in ta'an*.
⁹ Harreen diidaa illee kophaatti in jiraata, isaan garuu warra Asorii wajjin walii galuudhaaf ol ba'an; namoonni Efreemis kennaadhaan, namoonni ejjummaaf akka isaan jaallatan godhan*.
¹⁰ Isaan saba lafa irraa keessaa kennaadhaan warra isaanii wajjin walii galan yoo argatan iyyuu, ani amma qabaa koo jala isaan nan galcha; egaa isaan yeroo gabaabaatti ba'aa mootii gurguddoota Asor jalaa in wiriiqqatu.
*8 Er 22:28
*9 5:13

¹¹ "Efreem iddoo aarsaa baay'ise; iddoowwan aarsaa sun immoo sababii cubbuu isatti ta'an.

⁵ "Yaa warra Samaariyaa,

- ¹² Seera koo hammam baay'isee caaffataan yoon isaaf kenne iyyuu,
akka kan ormaatti in lakkaa'ama.
- ¹³ Isaan aarsaa in jaallatu,
foon aarsaadhaaf in dhi'eessu,
isa irraas in nyaatu;
ani Waaqayyo garuu isaanitti hin gammanne;
ani amma irra-daddarbaa isaanii nan yaadadha,
cubbuu isaaniifis isaan nan adaba;
isaan immoo gara biyya Gibxiitti in deebi'u*.
- ¹⁴ Warri Israa'el uumaa isaanii irraanfataniiiru,
mana gurguddaa ijaarrataniiru;
warri Yihudaas mandaroota marsaa cimaa qaban in baay'isan,
ani garuu mandaroota isaanii irratti
ibidda nan erga,
innis mana isaanii warra jajjaboo in fixa" jedhe*.

*13 Isa 1:11; Kes 28:68; Hos 9:6; Bau 20:2
*14 Kes 32:15; Isa 1:2; Er 2:32; 17:27; Amo 2:5

Gadda Saha Israa'el Irratti Duhhatame

- 9** ¹ Yaa Israa'el, ati ejjuu keetiin Waaqayyo kee irraa waan garagalteef,
midhaan oobdii hundumaa irratti argattus
"Gatii gaalamootummaa kootii ti" jettee
fudhachuu waan jaallatteef hin gammadin,
akka saba warra kaaniittis hin ililchin*!
- ² Oobdii midhaanii keessatti midhaan,
iddoo waynii itti cuunfan keessatti waynii namootaaf hin argamu;
daadhiin waynii haaraas isaan in dida*.
- ³ Isaan biyya Waaqayyo isaaniif kenne keessatti hin hafan;
Efreem gara biyya Gibxiitti in deebi'a,

- biyya Asorittis nyaata xuraa'aa nyaachuuf jira*.
- ⁴ Isaan dhibaa yuu daadhii waynii Waaqayyoof hin dhibaafatan,
qalma gubamus isaaf hin qopheessan;
buddeenni isaanii akka buddeena warra gaddaa isaanitti in ta'a;
buddeenni isaanii mataa isaanii duwwaadhaaf waan ta'eef,
gara mana Waaqayyoo hin dhufu;
warri isa nyaatan hundinuu in xureeffamu.

*1 1:2; 4:13-14

*2 2:7,11

*3 8:13; His 4:13; Dan 1:8

- ⁵ Guyyaa ayyaana beekameetti,
guyyaa ayyaanaa isa kan Waaqayyootti maal gochuuf jirtu*?
- ⁶ Isaanoo yommu badiisa duraa in adeemu;
biyyi Gibxi walitti isaan in guurti,
mandarri Memfiis awwaala isaanii in taati,
mi'a meetii isaanii warra gati-jabeeyyii aramaan irra garagala,
godoo isaanii keessattis qoraattiin in biqila*.

*5 Bau 23:14-17

*6 10:8

- ⁷ Guyyoonni adabaa ga'aniiru,
guyyoonni itti gatii ofii argatanis ga'aniiru;
warri Israa'el kana beekuuf jiru;
yakki keessan guddaa waan ta'eef,
diinummaan keessanis waan baay'ateef,
"Raajichi qalbi dhabeera,
namichi hafuuraan dubbatus maraateera" jettaniittu*.
- ⁸ Namoonni Efreem balbaluma godoo isaanii duratti raajicha in gaadu;
kiyyoon warra simbira qabduu karaa isaa hundumaa dura,
diinummaan mana Waaqayyo isaa keessa jira*.
- ⁹ Akkuma isa bara mandara Giibe'aatti ta'e,

- isaanis amala ofii isaanii mancaasaniiru;
Waaqayyo yakka isaanii in yaadata, cubbuu isaaniis itti in ilaala*.

*7 Luq 21:22; Mar 3:21-22

*8 Er 11:21-22

*9 10:9; Abo 19:20-30; 20:13

Wanta Sahabl Cubhuuf Israa'elitti Dhufe

- ¹⁰ Waaqayyo "Akka nama lafa duwwaa keessatti ija waynii argateetti,
ani Israa'elin nan argadhe;
abboota keessanis akka ija mukti harbuu jalqaba godhate,
isa dura bilchaateetti nan ilaale;
isaan garuu gara Ba'aal isa Phe'or dhufan,
Waaqayyo tolfamaa isa yeellaasisaa kanaaf addaan of baasan;
akkuma isa jaallatan sanaas ciiggaasisoo ta'an*.
- ¹¹ Ulfinni Efreem akka simbirroo duraa balali'ee in sokka,
mucaa godhachuun, waa garaatti hafuun,
ulfaa'uunis hin jiru.
- ¹² Isaan ijoollee yoo guddifatan iyyuu,
tokko illee utuu hin hafin isaan nan dhabsiisa;
yeroo ani isaan irraa gargar ba'utti isaaniif wayyoo!
- ¹³ Akkuman arge Efreem akka muka meexxi iddoo lalisaa keessa dhaabatuu ture;
amma garuu ilmaan isaa warra qalutti geessuun irra jira" jedhe.
- ¹⁴ Yaa Waaqayyo, ati isaaniif kenni! Garuu maal kennitaaf laata? Gadamessa ulfi irraa ba'u, harma gogaas isaaniif kenni!

*10 Lak 25:1-5; Kes 32:10

Firdii Israa'el Irra Ga'u

- ¹⁵ Waaqayyo,
"Jal'inni isaanii bundinuu Giilgalitti argame,

- ani achitti isaan jibbuutti nan ka'e;
ani sabahii hojii isaanii isa jal'aadhaaf
mana koo keessaa oofee isaan nan baasa;
ani deebi'ee isaan hin jaalladhu,
gurguddoonni isaanii hundinuu mormituu dha.
- ¹⁶ Ijoolleen Efreem rukutamaniiru,
isaan akka muka hiddi isaa gogee ta'aniiru;
isaan sanyii hiri godhatan,
utuu isaan ijoollee godhatanii iyyuu,
ani ijoollee isaanii warra jaalallee garaa isaanii isaan duraa nan ajjeesa" jedhe.
- ¹⁷ Sabahii isaan gara Waaqayyo koo dhaggeeffachuu didaniif,
inni isaan in gata;
isaanis saba warra kaan keessa in jooru*.

*17 Uma 4:14

Wanii Israa'el Waaqayyolii Tolfamoodhaaf Hojjete Balleffamuu Isaa

- 10** ¹ Warri Israa'elis akka muka waynii of jaallatee ija baay'ee naqatuu ti;
hammuma iji hojii isaanii baay'ate
iddoo aarsaas in baay'isan;
akkuma biyya isaaniitti fooyya'e,
utuhoota dhagaa warra qulqullaa'ootti ilaalaman in fofooyyeessan*.
- ² Garaan isaanii walaallammii dha,
amma isa yakkaniif adaba fudhachuun isaaniif in ta'a;
Waaqayyo iddoo aarsaa isaanii in caccabsa,
utuhoota dhagaa isaan dhaabbatanis in balleessa.
- ³ Amma isaan, "Nuyi sabahii Waaqayyoon hin sodaanneef mootii dhabne;
silaas immoo mootichi maal uuuf gochuu danda'a ree?" in jedhu.
- ⁴ Isaan afaanumaaf dubhatu,
sobanii in kakatu,
kakaadhaanis walii galu;

firdiin isaan kennanis
akkuma aramaa hadhaa of
keessaa qabuu
isa bo'oo qotiisaa irratti
biqiluu ti.

*1 Er 2:21; Hos 8:11; Lew 26:1

5 Warri mandara Samaariyaa
jiraatan
dibicha Bet-Aweeniif in
sodaatu,
namoonni ishees isaaf in boo'u;
ulfinni Waaqayyo tolfamaa sanaa
waan duraa fudhatameef,
luboanni isaa isaaf in
wawwaatu*.

6 Dibichichi mooticha guddaa
sanaaf
galchii ta'ee
biyya Asoritti in geeffama;
yeelloon Efreem irra in ga'a,
Israa'elis mareen
inni dur mari'ate
waan kufeef in yeella'a*.

7 Samaariyaan in balleeffama,
mootiin ishees akka felleencoo
bishaan gubbaa bu'ee in ta'a.

8 Iddoowwan ol jedhoon
warri Bet-Aween irratti
sagadan,
Israa'elitti cubbuu waan
ta'aniif in diigamu;
iddoo aarsaa isaanii irrattis
arangamaa fi
baalaanwaraanteen in biqilu;
yommu namoonni
tullootaan, "Nu awwaalaa!"
gaarotaanis, "Nu irratti jigaa!"
in jedhu*.

*5 4:15; 8:5-6

*6 5:13

*8 9:6; 2Mot 23:15-16; Luq 23:30;
Mul 6:16

**Balleessaa Israa'el Irratti
Firdiin Dbufuu Isaa**

9 Waaqayyo, "Yaa namoota
Israa'el,
erga bara mandara Giibe'aatti
cubbuu hojjetanii
amma iyyuu cubbuutti
qabamtanii jirtu;
egaa lolli warra jal'aa
hojjetanitti dhufu,
isinis immoo Giibe'aatti hin
argatuu ree*?"

10 Ani fedha kootiin isin nan adaba;
isa gar lamaan yakkitaniiif
yeroo adabamtanitti
sabni lafa irraa isin irratti
akka sassaabaman nan godha*.

*9 9:9; 5:8

*10 Er 2:13

11 "Efreem akka dibicha
leejjifamuu danda'uutti,
midhaan siribsiisuu in jaallata;
ani immoo gara saggoo isaa
isa miidhagaatti darbee,
Efreemin nan camada;
Yihudaan akka qotiiyootti haa
qotu,

Yaaqoobis akka qotiiyootti
bo'oo haa baasu.

12 Qajeelummaadhaan facaafadhaa,
ija gaarummaan kennus
galfadhaa!

Maasii haaraa baafadhaa!

Yeroon kun yeroo isin
gara Waaqayyootti gortanii,
hamma inni dhufee
qajeelummaa
isiniif dhangalaasutti
eeggattanii dha.

13 "Isin garuu yeroo qottan
jal'ina dhaabdani,
wanta jal'aa in galfattan;
ija sobaas in nyaattan*.
Ati konkolaataa kee
isa duulaaf qopheeffatte
baay'ina jagnoota keetiis
amanatteetta;

14 Kanaafis lolli saba kee irratti in
ka'a;

akkuma yommuu Shalmaan
mootichi

guyyaa lolaa sanatti
mandara Bet-Arbel balleessee
baati ijoollee ishee irratti
caccabsante
akkasuma marsaan kee
hundinuu in balleeffama.

15 Guddinni jal'ina keessanii
inni Bet'elitti hojjetamu
wanta akkasii isin irratti in fida,
mootiin Israa'elis
ganama bariidhaan in
barbadeeffama.

*13 8:7; Iyo 4:8

**Israa'el Utuma Diduu Waaqayyo
Obsee Jaallachuu Isaa**

11 "Israa'el ijoollee yeroo turetti
ani isa nan jaalladhe,
biyya Gibxii keessaas
ilma koo nan waame*.

2 Hammuma ani isaan waame
immoo

isaan caalchisanii
ana irraa in fagaatan;
isaan Ba'aaliif aarsaa
dhi'eessuu,
bifa fakkeenyaafis ixaana
aarsuu ittuma in fufan*.

*1 Bau 4:22; Kes 7:8; Isa 63:16; Mat 2:15
*2 2:15; 4:13

3 "Ani illee sanyii Efreem
daaddisuu nan barsiise,
kaasuuttis ol isaan nan fuudhe,
isaan garuu kan isaan fayyisu
ana akka ta'e hin beekne*.

4 Ani lookoo gara-laafinaatiin
hidhaa jaalalaatiin isaan nan
harkise;
akka isa waanjoo boquu isaani
irraa
itti laafisees isaaniif nan ta'e,
gara isaaniittis gad jedhee
isaan nan nyaachise.

*3 Kes 1:31; 2:10; 13:6

5 "Isaan gara kootti deebi'uu
waan didaniif,
gara biyya Gibxiitti deebi'uuf
jiru,
warri Asoris isaan irratti in mo'u.

6 Billaan mandaroota isaanii
keessatti
gad isaan in cira,
danqaraa karra dallaa isaaniis in
kukkuta,
namoota isaanii warra
koratanis in fixa.

**Jaalalli Waaqayyoo Dheekkamsa
Isaa Caalaa Jabaachuu Isaa**

7 "Sabni koo ana irraa garagaluutti
liqimfamanii jiru,
yoo ol isaan waamanis,
isaan takkaa iyyuu ol hin ka'an.

8 "Yaa Efreem,
attamittan kan biraatti
si kennuu danda'a ree?

Yaa Israa'el, ani attamitti
garaa kutadhee si-dhiisu
ree?

Ani attamittan akka mandara
Aadimaa
dabarsee si kennuu danda'a ree?

Yookiis attamittan
akka mandara Zebo'iim
si gochuu danda'a ree?
Kana gochuuf garaan koo hin
dandeenye,

oo'i koos ittuma caale*.

9 Ani dheekkamsa koo isa boba'aa
gad bin dhiisu,
deebi'ee Efreemin hin
balleessu;

ani Waaqayyoo dha malee,
nama miti;
ani isa qulqulluu si gidduu
jiruu dha,
ani ija aarjitiin hin dhufu*.

*8 Er 31:20; Isa 54:8; Kes 29:22-23

*9 Faru 3:31-36

10 "Isaan ana Waaqayyo duukaa in
bu'u,
ani sagalee koo
isa akka leencaa aadu nan
dhageessisa,
eyyee, ani sagalee koo nan
dhageessisa!

Ilmaan koos hollataa
gara lixa-biiftuutii in dhufu*.

11 warceranii akka simbirrootaatti
biyya Gibxiitii,
akka gugeettis biyya Asorii in
dhufu,
ani immoo mana isaaniitti isaan
nan deebisa;
kana ana Waaqayyotu dubbate*.

*10 Er 25:30

*11 Isa 11:11-12

12 "Efreem sobaan,
manni Israa'elis
gowwoomsaadhaan na
marsaniiru;
Yihudaan immoo ana Waaqayyo
irratti
ka'ee asii fi acbi in naanna'a,
warra ofii qulqulluutti
lakkaa'ateef immoo
amanamaa dha.

Israa'elii Fi Yibudaan Waaqayyoo
Amanamuu Dhabuu Isaanli

12 "Efreem qilleensaa wajjin in
oola,
guyyaa guutuus qilleensa
gara ba'a-biiftuu duukaa in
fiiga;
soba, humnaan nama irratti
ka'uus in baay'isa;
biyya Asorii wajjin walii galce,
biyya Gibxiittis dhadhaa
ejersaa in geessa" jedhe*.

*1 5:13; 7:11

2 Waaqayyo gooftaan,
warra Yihudaa wajjin dubbii
qaba,
adeemsa isaatiif Yaaqoobitti in
ilaala,
akka hojii isaattis isaaf in
deebisa.

3 Yaaqoob garaa haadha isaatii
keessatti iyyuu
booddeetti akka hin hafneef,
koomee obboleessa isaa in qabate,
yeroo nama ga'aa ta'es
Waaqayyotti marmee
gad dhiisuu dide*.

4 Ergamaa Waaqayyoo ofitti qabee
gad dhiisuu dide, in danda'es;
ergasii immoo boo'ee
akka inni faara toluuf in
kadhate;

Waaqayyo Bet'elitti itti mul'ate,
achittis isatti dubbate*.

5 Inni Waaqayyo gooftaa maccaa ti;
Waaqayyo isa yaadatamuun
ta'uufii dha*.

*3 Uma 25:26; 27:35-36; 32:25-29

*4 Uma 35:15; 28:10-19

*5 Far 83:18

6 Ati immoo amma
gocha Waaqayyo keettiin in
deebita;
egaa jaalalatti,
wanta dhugaa ta'ettis
qabamii jiraadhu!
Yeroo hundumaas Waaqayyo
kee abdiidhaan eeggadhu*!

7 Ati immoo naggaadee madaalii
sobaa
harkatti baatuu dha,
nama gowwoomsuus in
jaallatta*.

*6 Mik 6:8

*7 Amo 8:5

8 Kana irratti Efreem,
"Ani dhuguma sooromeera,
geessifadheeras;
wanta ani argadhe hundumaa
keessatti immoo yakki
cubbuudhaaf
natti muramu
hin argamu" jedhe*.

9 Kanaaf Waaqayyo,
"Ani Waaqayyo gooftaan kee
biyya Gibxiitii kanan si baase,
akkuma bara durii
dhaabaan wal argaa turre
sanatti,
ammas deebisee
godoowwan keessa sin
jiraachisa*.

*8 Mul 3:17

*9 13:4; Bau 20:2; Lew 23:42-43

10 "Ani raajotatti dubbadheera,
ani mul'ata baay'ee
akka argan nan godhe;
karaa isaanis fakkeenyaan nan
dubbadhe" jedhe*.

11 Hammiumi mandara Giil'aad
keessa jira,
namoonni achitti argamanis
kan waa'ee hin baafne in ta'u;
Giilgalitti korommii
aarsaadhaaf in dhi'eessu,
iddoowwan aarsaa isaanii
immoo
akka tuullaa dhagaa isa bo'oo
qotiisaa
keessa tuulamee in ta'u*.

*10 6:5

*11 6:8; 9:15

12 Yaaqoob biyya Aaramitti baqate,
Israa'el haadha manaa
argachuudhaaf
namaaf hojjete,
niitii fuudhuufis boolota tikse*.

13 Waaqayyo garuu harka raajitiin
warra Israa'el
biyya Gibxiitii ol baase;
barka raajitiin
akka eegamanis in godhe*.

14 Efreem tuttuqee gooftaa isaa
gar-malee waan aarseef,
inni immoo yakki isaa inni
du'aan ga'u

isuma irratti akka bafu in
godha,
arrabsoo isaas mataa isaatti in
deebisa.

*12 Uma 27:43; 28:5; 29:20

*13 Bau 3:10; Kes 34:10-12

Firdii Gara Dbumaatti
Blyya Israa'el Irra Ga'u

13 Yeroo sanyiin Efreem
dubbate,
namoonni in hollatan;
inni Israa'el keessatti
ol kaafamee ture;
garuu karaa Ba'aal
waaqayyolii tolfamanii
yakka of irratti fidee, in du'e*.

2 Ammas ittuma daddabalanii
cubbuu in bojjetu;
meettii isaanii irraa bifa
baqfamaa

offii isaaniif in tolfatu;
waaqayyolii tolfamoo
miidhagsanii in bojjetu;
kun hundumtuu
hojii warra harka tolanii ti;
"Isaan kanaaf aarsaa dhi'eessaa!"
in jedhu;

namoonni bifa jibootaa in
dhungatu*!

3 Kanaafis isaan akka hurrii
ganamaa,
akka fixcensa ganamaan
dafee bu'u ti;
akka babaqii oobdii keessaa
qilleensi fudhatuu,
akka aara karaa qaawwaa
ba'uus in ta'u*.

*1 Lak 25:1-5

*2 8:4,5-6; Isa 44:10

*3 6:4; Far 1:4

4 Waaqayyo, "Ani Waaqayyo
gootaa kee
isa biyya Gibxiitii si baasee dha;
ati ana malee
Waaqayyo kan biraa bin beektu,
ana irraa kan hafes fayyisaan
kan biraa hin jiru*.

5 Ani lafa onaa keessatti,
biyya gubaa boba'aa sanatti si
eegeera.

6 Akka biyya quufaatti
isaan yeroo nyaatanitti in
quufan,
quufaniis yaada isaaniitti

ol of qabuun itti dhaga'ame;
kanaafis ana in irraanfatan*.

*4 12:10; Bau 20:2-3; Isa 45:21

*5-6 Kes 8:11-20; 32:10-15

7 "Ammas ani akka leencaa
isaanitti nan ta'a,
akka qeerransa riphee
karaa bukkee ciisuuttis
isaan nan eeggadha*;

8 akka amaaketa dhaltuu
ilmaan ishee jalaa butataniitti
ani isaan irrattan lafa dha'a;
qoma isaanii cabsee
onnee isaanis nan tarsaasa;
achittis saroonni isaan in nyaatu,
bineensi caakkaas isaan in
babbabaqsa.

9 Yaa Israa'el,
ana isa si gargaaruun mormuu
keettiin,
ati badiisa of irratti fideetta*.

10 Ati, 'Mootii, gurguddootas
nuuf kenni' jettee turte;
mootiin kee mandaroota kee
hundumaa keessatti
akka si oolebuuf amma eessa jira
ree?

Warri biyya seerratanis eessa
jiru ree*?

11 Ani aariidhaan mootii siif
kenneera,
dheekkamsaanis achii isa
fuudheera*.

*7 5:14

*9 Er 2:17

*10 1Sam 8:5-6

*11 10:3,15; 7:7

12 "Yakki Efreem walitti hidhamee
jira,
cubbuun isaas iddoo tokko
kaa'ameera;

13 Akka dubartii da'uuf jettuu
ciniinsuun isa irra ga'e;
inni immoo ilma ogessa miti;
yeroo ta'utti gadameessa
keessaa
as hin mul'anne.

14 Ani qabaa iddoo lafa jalaa
keessaa
isaan gad dhiisuu ree?
Du'a jalaas isaan furuu ree?
Yaa du'aa, dha'ichi kee
meerre ree?
Yaa iddoo lafa jalaa,
ilkeen kee meerre ree?

Oo'a argisiisuun
ija koo duraa fagaateera*.
15 Efreem obbolloota gidduutti
ija yoo godhate iyyuu,
qilleensi ba'a-biiftuu,
qilleensi Waaqayyo biraa
abboomame,
lafa duwwaadhaa ka'ee
dhufuuf jira;
boolli bishaanij isaa akka gogu,
burqituun isaas akka gu'u in
godha;
wanta gati-jabeessa kaa'ame
hundumaas fudhatee in sokka.
*14 1Qor 15:55

16 "Samaariyaan Waaqayyo ishee
irratti waan kaateef,
yakka isheef adaba fudhachuun
in ta'aaf;
namoonni isbee billaadhaan in
kukkufu,
mucooliin isaanii humnaan
daddarbatamanii in cabu;
dubartoonni isaanii warri ulfis
garaan isaanii in tatarsaafama"
jedhe*.
*16 2Mot 17:5-6; 15:16

Warri Israa'el Gara Waaqayyootti
Akka Deebi'aniiif Waamuu Isaa

14 1 Yakka keessaniin gufattanii
waan kufaniif,
gara Waaqayyo gooftaa
keessaniitti deebi'aa,
yaa warra Israa'el*!
2 Wanta jechuuf jettan kana
fudhadhaatii,
gara Waaqayyootti deebi'aa!
"Yakka keenya guutummaatti nu
irraa fuudhi,
gaariitti nu simadhu!
Galata afaan keenyaas
akka qalma jibootaatti
aarsaa siif in dhi'cessina*.
3 Asor nu oolchuu hin danda'u,
lolaa fi farda hin fe'annu;
deebinees wanta barki keenya
tolbeen
'Waaqayyolii keenya' bin
jennu;
ati isa ijoolleen
abbaan irra hin jirre
biraa oo'a argatuu dha"
ittiin jedhaa*!

*1 Zak 1:4
*2 6:6; 8:13; Ibr 13:15
*3 5:13; 8:5-6

Waaqayyo Jireenya Gaarlitti Akka
Isaan Deebisu, Abdachiisuun Isaa

4 Waaqayyo, "Ana irraa garagaluu
isa dhukkuba itti ta'e irraa
isaan nan fayyisa;
aariin koo isaan irraa waan
deebi'eef,
fedha garaa kootiin isaan nan
jaalladha;
5 Warra Israa'eliiif
akka tiifuu bokkaa nan ta'a,
isaanis akka daraaraa in
daraaru,
akka mukkeetii Liibaanon
hidda isaanii in yaafatu;
6 Itni isaanii in diriira,
miidhagummaan isaanii
akka muka ejersaa,
fooliin isaanii
akka muka Liibaanon in ta'a;
7 deebi'anii gaaddisa koo jala in
jiraatu;
midhaan in qotatu,
akka muka waynii isa tolee
ija godhatuu in ta'u;
akka daadhii waynii biyya
Liibaanon maqaa in
godhatu.

Xumura Dubbil Isaa

8 Egaa sanyiin Efreem
waaqayyolii tolfaman biraa
maal qaba?
Anatu isaaniif dhaga'a,
anatu dhimnee isaan ilaala;
ani akka muka
yeroo hundumaa lalisuu ti,
ija godhachuu kan si
dandeessisu
ana biraa siif in argama"
in jedha.

*9 Far 1:1-6

Macaafa Yo'el Raajichaa

Hawaannisi Biyya Akka
Balleesse Himuu Isaa

1 1 Dubbiin Waaqayyoo inni gara
Yo'el ilma Pbetu'el dhufe kanatti
fufee kan jiruu dha.
2 Isin maanguddoota nana kana
dhaga'aa!
Sabni biyya kana keessa
jiraattan
hundiinuus mee dhaggeeffadhaa!
Wanti akkasii kun bara
isin jiraattan keessatti,
bara abboonni keessan jiraatan
keessattis
rakkaa ta'ee beekaa ree?
3 Waa'ee kanaa ijoollee keessanitti
bimaal
Ijoolleen keessanis
ijoollee isaaniitti baa himan!
Ijoolleen isaaniis
dhaloota dhufutti haa biman!

4 Isa gurmuu hawaannisaa
isa duraa irraa bafe,
gurmuu bawaannisaa
isa lammaffaatu nyaate;
isa gurmuu hawaannisaa
isa lammaffaa irraa hafe,
ilmaan bawaannisaatu nyaate;
isa ilmaan hawaannisaa irraa
hafe immoo
geerri hawaannisaatu nyaate*.
*4 2:25; Amo 4:9; 7:1-2; Bau 10:12-15;
Kes 28:38

5 Isin warri machooftuun
dammaqaatii boo'aa!
Daadhiin waynii isin irraa
waan citeef,
isin warri daadhii waynii
dhugdan hundinuu,
cuunfaa wayniitiif boo'aa!
6 Sabni jabaanii fi lakkoobsi isaa
dbuma hin qabne
biyya koo irratti dhufceera;
ilkaan isaa akka ilkaan leencaa ti,
qarriffaan isaas akka qarriffaa
leenca dhafaa ti*;
7 inni dhaabaa waynii koo in onse,
muka harbuu koos gad in cire;
qola isaanii irraa quncisee gate,
dameen isaaniis addaatee hafe;
*6 2:2; Mul 9:8

8 akka misirroo uffata gaddaa
uffattee,
dhirsa qaree isbeetiif
gaddituutti, gaddaa!
9 Kennaan nyaataa fi dhugaatii
mana Waaqayyoo irraa in cite,
kanaaf luboonni warri
Waaqayyo gooftaadhaaf
hojjetan
gaddanii in boo'u*.
10 Maasiin in one,
midhaan waan badeef
lafti in gadda;
mukti waynii inni baaraan in
goge,
dhadhaan ejersaas bin jiru.
*9 2:14

11 Isin warri qottuun abdi kutadhaa!
Warri waynii dhaabdanii
guddifanis gaddaa!
Wanti laficha irraa galfamu
waan badeef,
qamadiidhaaf, garbuudhaafis
gaddaa*!
12 Mukti waynii in goga,
mukti harbuus in collaga;
mukti rumaanii, mukti meexxii,
mukti hudhaa fi
mukkeetiin maasii keessaa
hundinuu in gogu;
gammachuun ilmaan
namootaas in bada.
*11 Er 14:4

Gara Yaada Garaa Geddarannaatti
Waamamuu Isaaniif

13 Yaa lubootaa!
Uffata gaddaa uffadhaa,
boo'ans!
Kennaan midhaanii fi kennaan
dbugaatii,
mana Waaqayyo keessanii irraa
waan ittifameef,
isin warri iddoo aarsaatii
hojjetan,
bojjetoonni Waaqayyo kootii
mana qulqullummaatti ol galaa!
Uffata gaddaa uffadhaatii
balkan guutuu gaddaa bulaa!
14 Soomii qulqulluu labsaa!
Walga'ii qulqullaa'aas waamaa!
Jaarsoliidhaa fi warra

- biyyicha keessa jiraatan
hundumaa,
mana Waaqayyo gooftaa
keessaniitti
walitti qabaa!
Gara Waaqayyootis iyyaa*1
15 Wayyoo! Guyyaan Waaqayyoo
dhi'aateera!
Maal guyyaan sodaachisaan
akkasii!
Inni isa hundumaa danda'u biraa
akka balleessiiti in dhufa*.
*14 2:15; Isa 58:5
*15 2:1,11; Isa 13:6; Amo 5:18-20
- 16 Utuma nuyi ilaalluu
nyaati akkuma dhibe,
akkasuma gammachuunii fi
ililleen
mana Waaqayyo keenyaatii
dhibeera mitii ree*?
17 Sanyiin kaboota jalatti tortoree,
midhaan waan badeef,
gombisaan in one,
gumbiin in caccabe.
18 Saawwan waan dheedan waan
dhabaniif, in mar'atu!
Bushaayeen in jooja'u;
hoolonni karri baay'eenis in
dhiphatu*.
*16 Kes 16:11; Far 118:24
*17-18 Sef 1:10-11; Er 3:3; 14:5-6;
1Mot 17:1-16; 18:1-6
- 19 Yaa Waaqayyo! Ibiddi
iddoo dheedumsa horii waan
fixeef,
arrabni ibiddaas muka bakkee
keessaa waan gubeef,
ani gara keetti nan iyya;
20 burqaan bishaanii waan gogeef,
ibiddis iddoo dheedumsa horii
waan fixeef,
bineensonni caakkaa illee
gara keetti in iyyu*.
*19-20 Amo 7:4; Far 104:27-28;
1Mot 17:1-16; 18:1-6
- Guyyaan Waaqayyoo Inni
Sodaachisaan Akka Dbi'aate
Fakkeenyaan Hilmun Isaa
- 2¹ Xiyoon gaara koo isa qulqulluu
irratti fiinoo afuufaa,
sagalee nama dammaqsu
dhageessisaa!
Guyyaan Waaqayyoo waan
dhufuuf,
- ammuma iyyuu waan
dhi'aateef,
warri biyyicha keessa jiraatan
hundinuu haa hollatan*!
2 Guyyichi guyyaa dukkanaa fi
guyyaa ifa hin qabnee dha,
guyyaa duumessaa fi
guyyaa dukkanaa limixii ti;
inni akka boruu tulloota irra
darbee
bal'achaa adeemuu ti;
sabni baay'eenii fi jabaan
kan akka isaa dur kan hin turin,
si'achis kan akkasii
kan hin argamne in dhufa*.
*1 1:15
*2 1:6
- 3 Fuula isaanii duraa arrabni
ibiddaa
gubaa in adeema;
isaan booddeedhaanis
ibiddi waxalaan gubaa in
adeema;
biyyi fuula isaanii duraa
iddoo dhaabaa Eden fakkaata,
biyyi isaan booddee immoo
lafa onaa barbadaa'aa fakkaata;
kan isaan jalaa ba'us
tokko illee hin jiru*.
4 Isaan farda fakkaatu,
akka farda lolaas in kaatu;
5 isaan akka konkolaataa fiiguutti,
akka ibidda yommuu
qarmii gubu xaaxa'uutti,
akka loltoota jajjaboo
lolaaf of qopheessaniitti,
sagalee isaanii dhageessisaa,
fixee tullootaa irra in
quruphisu*.
6 Sabni lafa irraa
yommuu isaan argan in rom'u,
namoonni hundinuu na'anii
fuula in badu;
7 isaan akka namoota jajjabooti in
fiigu,
akka loltootaattis
masaraa in yaabu;
hundumti isaaniis karaa isaanii
irraa utuu hin jal'atin,
tarreetti in yaa'u.
*Tokkon tokkon isaanii
karaadhuma isaanii irra
adeemu malee,
inni tokko isa kaanitti hin bu'u;

- tarree isaanii utuu wal irraa bin
kutin,
humnaan cabsatanii
waraana gidduu in darbu;
9 fiigani mandarattii irra in ba'u,
masaraa irra in fiigu,
manneetii in yaabbatu,
akka hattuus qaawwa manaatiin
ol in lixu*.
*3 1:19; Amo 7:4
*4-5 Mul 9:7-9
*9 Bau 10:4-6
- 10 Lafti isaan ga'an
fuula isaanii duraa in rom'iti,
waaqnis in socho'a;
aduunii fi jiini in dukkanaa'u,
urjoonnis ifa hin kennan*.
11 Waaqayyo fuula macca isaa
duratti
sagalee isaa in dhageessisaa;
humni waraanaa isaa sonaan
baay'ee dha;
warri isaaf abboomamanis
jajjaboo dha;
guyyaan Waaqayyoo guddaa
dha, sodaachisaa dhas;
eenyutu fuula isaa dura
dhaabacbuu danda'a ree*?
*10 2:31-32; Mul 6:12; 8:12; Isa 13:10;
Amo 8:9; Mat 24:29
*11 Far 29:3-9; Isa 10:5-6; His 38:4;
Mul 6:17
- Gara Yaada Garaa Geddarannaatti
Waamaman Isaanii
- 12 Waaqayyo garuu,
"Ammuma iyyuu garaa
keessan guutuudhaan,
soomuudhaan, boo'icbaan,
gadduudhaanis
gara kootti deebi'aa!" jedha.
13 Egaa garaa keessan tarsiisa
malee,
uffata keessan hin tarsiisa!
Gara Waaqayyo gooftaa
keessaniitti deebi'aa!
Inni araara-qabeessaa fi
oo'a-qabeessa waan ta'eef,
dheekkamsatti hin ariifatu,
gaarummaan isaas baay'ee dha,
wanta hamaa namatti erguu
irraas of in qusata*.
14 Maaltu beeka,
tarii Waaqayyo gooftaan
keessan
isa yaade in dhiisa, in oo'as;
- kennaa midhaanii fi kennaa
dhugaatii
akka isaaf dhi'cessuu
dandeessaniitti,
isin in eebbisa ta'a*!
*13 1Mot 21:27; 2Mot 19:1; Iz 9:3; Er 41:5;
Bau 34:6
*14 1:9-10; Amo 5:15; Yon 3:9; Sef 2:3
- 15 Xiyoon keessatti fiinoo afuufaa,
soomii qulqullaa'aa labsaa!
Walga'ii qulqullaa'aa
waamaa*!
16 Namoota walitti qabaa,
waldaa qulqulleessaa!
Maanguddootaa fi ijoollee,
daa'imoota harma hodhanis
walitti sassaabaa!
Dbirsi misirroo mana isaa
keessaa
gad haa ba'u,
misirroonis diinqa ishee keessaa
gad haa baatu!
17 Luboonni warri Waaqayyoo
hojjetan,
buusaa mana qulqullummaa fi
iddoo aarsaa gidduutti haa
boo'an!
Isaan, "Yaa Waaqayyo saba
keetiif oo'i,
saba kee warra dhuunfaa kee
ta'an,
saba warra kaan gidduutti
nama ga'oo fi nama
mammaaksaa bin godhin!
Maaliif isaan namoota
warra kaan gidduutti,
"Waaqayyoon isaanii cessa
jira?" jedhu ree?" haa
jedhan*!
*15 1:14
*17 Far 79:10
- Waaqayyo Saba Isaatiif
Deebi Kennuu Isaa
- 18 Waaqayyo biyya isaatiif in
hinaafa,
saba isaatiifis in oo'a*.
19 Waaqayyo saba isaatiif deebisee,
"Kunoo, ani midhaan, waynii
haaraa fi
dhadhaa ejersaa isiniif nan kenna,
isin in quufu;
si'achis saba lafa irraa gidduutti
akka isin yeellaatan bin godhu*;
20 loltoota warra gara bitaa jiranis
isinittii nan fageessa,

warra fuula duraa,
gara galaana ba'a-biiftuutti,
warra dugda duubaa immoo,
gara galaana lixa-biiftuutti,
gara lafa gogaa fi onaatti isaan
nan oofa;
sababii isaan of
gurguddisuudhaan
wanta akkasii isin irratti
hojjetaniif,
ani isaan nan balleessa,
reeffi isaanii in xiraa'a, in
ajaa'as.

*18 Zak 1:14; 8:2

*19 1:9-10; 2:26-27

21 "Ani Waaqayyo dhugumaan
wanta guddaa isaa waanan
godhuuf,

yaa lafaa hin sodaatin!
Gammadi, ililchis!

22 Bakkeedhaa iddoon dheedumsaa
lalisaa,
mukkeetiin ija naqachaa,
mukti harbuu fi dhaabaan waynii,
baay'inatti ija kennaa waan
jiraniif,
isin yaa horii bakkee keessaa
hin sodaatinaa!

23 "Isin yaa ijoollee Xiyoon!
Waaqayyo qajeelummaa isaa
irraa kan ka'e
bokkaa isa duraa isiniif
kenneera;
bokkaa isa duraa, isa booddees
akkuma kanaan duraatti
waan isiniif kennuuf,
Waaqayyo gooftaa keessanitti
gammadaa, ililchaas*!

*23 Kes 11:14; Er 5:24

24 "Oobdiin midhaaniin in guuta,
iddoon waynii itti cuunfanis
daadhii wayniitii fi
dhadhaa ejersaatiin in guuta.

25 Isa gurmuun hawaannisaa,
ilmaan hawaannisaa,
geeriin hawaannisaa,
qorophisii fi
loltoonni jajjaboonni
ani isinitti erge sun
dur isin duraa fixan,
amma iddootti isiniif nan
deebisa*.

*26 Yommuus isin nyaattanii in quufu;

maqaa ana Waaqayyo gooftaa
keessanii
isa dinqii isiniif hojjetees in
jajattu;
isin sabni koo
si'achi deebitanii hin
yeellaasifamtan*.

27 Yommuus ani Israa'el keessa
akkan jiru,
Waaqayyo gooftaa keessan
akkan ta'e,
ana malees kan biraa akka hin
jirre in beektu;
isin sabni koos si'achi
deebitanii
hin yeellaasifamtan" jedhe*.

*25 1:4; 2:1-11

*26 Er 36:13-15; Kes 8:10

*27 His 34:30

Guyyaan Waaqayyoo Inni Sodaachisaan Akka Dhufu Himuu Isaa

28 Waaqayyo ammas,
"Bara booddeetti ani hafuura
koo
nama hundumaa irratti nan
dhangalaasa;
ilmaan keessanii fi intalooni
keessan

raajii in dubbatu,
maanguddoonni keessan
abjuu in abju'atu,
dargaggoonni keessanis
mul'ata in argu;

29 bara sanatti, ani hojjetoota koo
warra dhiirotaa fi
warra dubartootaa irratti iyyuu
hafuura koo nan dhangalaasa.

30 Waaqa irratti, lafa irrattis
milikkita,
dhiigaa fi ibidda, utubaa aaraas
nan argisiisa.

31 Guyyaan koo inni guddaanii fi
sodaachisaan sun
utuun bin dhufin dura,
aduun dukkanatti,
jiinis dhiigatti in diddiramu.

32 Maqaa Waaqayyoo warri
waammatan
hundinuu garuu in oolu;
akkuma ani Waaqayyo jedhee
ture,
warri ani waame tulluu Xiyoon
irratti,

Yerusaalem keessattis
hafanii in fayyuu" jedhe*.

*28-32 Lak 11:25-29; HoE 2:17-21;
Mat 24:29; Mul 6:12-13; Rom 10:13

Saba Warra Kaan Irratti Firdiin Akka Dhufu Himuu Isaa

3¹ Waaqayyo, "Kunoo, bara sanatti,
guyyaa sanattis
Yihudaa fi Yerusaalem keessaa
warra booji'aman yommuun
deebisu*,"

2 saba lafa irraa hundumaa walitti
qabee,
dachaa Yoshaafaaxitti nan geessa;
sababii isaan saba dhuunfaa koo,
Israa'elin tamsaasanii,
biyya koos hirmaataniif
achitti isaanitti nan farada*;

3 isaan buufata mukaatiin
saba koo hirmaataniif
ijoollee dhiiraa
dubartii wajjin gaalamootaniif
gatii kennanii,
ijoollee durbaa immoo
daadhii wayniitii gurguratanii
ittiin in dhugan*.

*1 Er 29:14

*2 2Sen 20:1-30

*3 Naho 3:10

4 "Amma isin warri Xiirosii fi Si-
doon warri kutaawwan biyya Filiixi-
yaa keessa jirtan hundinuu maal ana
irraa qabdu? Wanta ani hojjedhe tok-
koof ijaa ana baafachaa jirtuu ree? Yoo
ijaa ana baafattu ta'eef, ani hojii kees-
san dafee ariitiidhaan mataa keessanitti
nan deebisa; *egaa isin meetti koo fi
warqee koo akkasumas mi'a koo isa
gati-jabeessa fudhattanii mana moo-
tummaa isa kan keessanii keessa in
kaa'attan. *Namoota Yihudaa fi na-
moota Yerusaalem biyyaa baaftanii
fageessuuf jettanii warra Griikotaatti
isaan in gurguran. *Kunoo, ani iddoon
isin isaan itti gurgurattan sanaa isin
irratti isaan nan kaasa, bojjii keessanis
mataa keessanitti nan deebisa; *ani
ijoollee dhiiraa keessanii fi ijoollee
durbaa keessan namoota Yihudaatti
nan gurgura, isaan immoo dabarsanii
namoota Saabaatti biyya fagootti isaan
in gurguratu" jedhe; Waaqayyo kana
dubbatera.

*Egaa saba lafa irraa waamaatii,

"Lolaaf qophaa'aa!
Loltootaa dammaqsaa!
Loltoonni hundinuu
as dhi'aatanii haa rukutan!

10 Maarashaa keessan billaa isaa,
haamtuu keessanis eeboo isaa
tursiifadhaa!

Inni dadhaabaanis, 'Ani jabaa
dha!' haa jedhu!

11 Isin sabni lafa irraa hundinuu
iddoon hundumaatii walitti
qabamaatii
dafaa as kottaa!" jedhaa!
Yaa Waaqayyo ati immoo
loftuu kee
gad ergi*!

*9-11 Zak 12:3; Isa 2:4; Mik 4:3

12 Sabni lafa irraa ka'anii
gara dachaa Yoshaafaax haa
dhufan!

Ani immoo achi taa'ee
saba iddoon garaa garaatii
dhufan

hundumaatti nan farada*;

13 midhaanichi haamamuu ga'eera,
egaa haamtuu keessan
fuudhaatii ka'aa!
Kottaa ija waynii sana irra
ejjedhaa!

Akka iji waynii walitti qabamee
yommuu cuunfamu daadhiin isaa
qodaa itti cuunfamu
guutee irra dhangala'u,
hammiin isaanis akkasuma
guddaa waan ta'eef isaan
cuunfaa*!

14 Guyyaan Waaqayyo, dachaa
firdii keessatti
waa hojjetu waan dhi'aateef,
namoonni baay'een,
namoonni baay'ee danuun
dachaa sanatti in yaa'u*;

15 aduunii fi ji'i in dukkanaa'u;
urjoonnis ifa isaanii hin
kennan*.

*12 Far 96:13; Mat 25:31-32

*13 Isa 63:1-6; Mat 13:30,39; Mul 14:14-20

*14 3:2

*15 2:10,31

16 Waaqayyo Xiyoon keessaa in
qaqawweessa'a,
Yerusaalem keessaas
sagalee isaa in dhageessisa;
waaqanii fi lafti in raafamu,
Waaqayyo garuu saba isaa

ijoollee Israa'eliif
iddoo baqaa fi masaraa in ta'a*;
17 kanaafis saba isaatiin,
"Yommus ani Waaqayyo
gooftaan keessan
Xiyoon tulluu koo isa
qulqullaa'aa irra
akkan jiraadhu in beektu;
Yerusaalemis qullooftuu in taati;
sabni ormis deebi'ee
ishee hin qabatu*.

*16 Zak 12:3; Amo 1:2

*17 2:27; Far 76:2; His 34:30

18 "Guyyaa sanattis tulloonna
daadhii haaraa in coccophsu,
gaaronnis aannan in baasu;
laga Yihudaa hundumaa keessas
bishaan in yaa'a;
bishaan mana qulqullummaa
keessaa burqus
dachaa Shiixiim in obaasa*;
19 sababii namoonni Gibxii fi
namoonni Edoom

namoota Yihudaa irratti
humnaan ka'anii
biyya isaanii keessatti
dhiiga nama balleessaa hin
qabne dhangalaasaniif,
biyyi Gibxii in onti,
biyyi Edoomis ontee in
barbadoofti*.
20 Biyya Yihudaa keessa bara
baran,
Yerusaalem keessas
dhalootaa hamma dhalootaatti
namoonni in jiraatu;
21 gumaa isan dur
namoota Yihudaa fi
namoota Yerusaalemiif
hin baasin ture,
amma nan baasaaf;
kana booddee ani Waaqayyo
Xiyoon keessa nan jiraadha"
jedheera*.

*18 Amo 9:13; Isa 30:23,25; His 47:1-12

*19 Amo 1:11; Oba 10:11

*20-21 Isa 60:15; 65:18; Zak 14:10-11

Macaafa Amos Raajichaa

Ittiin Lixa

1 ¹ Kun dubbii Amos, inni warra
mandara Teqo'aa keessatti hoolota
horsiisan keessaa tokko ture dubbatee
dha; inni bara biyyi Yihudootaa iddoo
lamatti hiramee, Uziyaan biyya Yihu-
daatti, Yerobi'aam ilni Yeho'aash im-
moo biyya Israa'elitti mootota tura-
nitti, waa'ee Israa'eliif waan itti
mul'ate dubbate; kun immoo raafamuu
lafaa isa beekamaa sana dura waggaa
lama ture*.

2 Inni, "Waaqayyo tulluu Xiyoon
irraa in qaawweessa'a,
Yerusaalem keessaas
sagalee isaa in dhageessisa;
kaloon warra tiksituu in goga,
gubbee tulluu Qarmelos irraas
margi in coollaga"
jedhee dubbate*.

*1 7:14; Zak 14:5; 2Mot 15:1-7; 14:23-29;
Isa 1:1; Hos 1:1

*2 Er 25:30-31; Yoe 4:16; Hos 11:11;
Far 29:3-9

Firdii Irra-Daddarbaa Isaaniif
Biyya Warra Olloota Israa'el
Irratti Dhufanf Jiru
(Isa 17:1-3)

Isa Sooriyaa Irratti Dhufuuf Jiru

3 Amos itti fufee,
"Waaqayyo akka jedhu!
'Warri mandara Damaasqoo
ulee sibiilaa
isa ittiin midhaan cagadaniin
warra biyya Giil'aad
waan cagadaniif,
ani irra-daddarbaa isaanii
isa keessa deddeebi'aniif
adabni akka irraa deebi'u hin
godhu!

4 "Kanaaf ani
mana Hazaa'el mootichaa irratti
ibidda nan erga;
inni immoo mana jajjabaa
isa kan Ben-Hadaad mootichaa
sana in fixa*.
5 Danqaroota karra Damaasqoo nan
caccabaa;
warra dachaa Aween keessa
jiraatan,
isa ulee mootummaa baatus
Bet-Edeenii nan buqqisa;
warri Sooriyaas booji'amanii
biyya Qiir in dhaqu'
jedba Waaqayyo" jedhe*.

*4 2Mot 13:3

*5 2Mot 16:9; Amo 9:7

Isa Filiisixiyaa Irratti Dhufuuf Jiru
(Isa 14:28-31)

6 "Waaqayyo akka jedhu!
'Warri mandara Gaazaa
dabarsanii warra Edoomitti
kennuudhaaf,
saba guutummaatti waan
boojiisaniif,
ani irra-daddarbaa isaanii
isa keessa deddeebi'aniif
adabni akka irraa deebi'u hin
godhu!

7 "Kanaaf ani kella Gaazaa irratti
ibidda nan erga;
inni immoo mana ishee warra
jajjaboo in fixa.

8 Ani warra mandara Ashdood
keessa jiraatan,
isa ulee mootummaa baatus
mandara Ashqalon
keessaa nan buqqisa;
mandara Eqroon irratti
harka koo ol nan fudhadha,
warra Filiisixiyaa keessaas
kan hafan badduu in ba'u'
jedha Waaqayyo gooftaan"
jedhe.

Isa Xiros Irratti Dhufuuf Jiru

9 "Waaqayyo akka jedhu!
Warri mandara Xiros
saba guutummaatti dabarsanii
boojiudhaaf warra Edoomitti
waan kennaniif,
kakuu obbolummaas
waan hin yaadataniif,
ani irra-daddarbaa isaanii

isa keessa deddeebi'aniif
adabni akka irraa deebi'u hin
godhu!

10 Kanaaf 'Ani kella Xiros irratti
ibidda nan erga;
inni immoo mana ishee warra
jajjaboo in fixa' jedha"
jedhe.

*9-10 Isa 23:1-16; His 26:1—28:19;
Yoe 4:4; Mat 11:21-22

Isa Edoom Irratti Dhufuuf Jiru

11 "Waaqayyo akka jedhu!
Warri biyya Edoom
billaa fudhatanii
obboloota isaanii waan ari'aniif,
oo'as waan hin argisiisaniif,
aariin isaanii yeroo hundumaa
waan boba'uuf,
dheekkamsi isaanis bara
hundumaa
waan itti fufee,
ani irra-daddarbaa isaanii
isa keessa deddeebi'aniif
adabni akka irraa deebi'u hin
godhu!

12 Kanaaf, 'Ani mandara Temaan
irratti
ibidda nan erga;
inni immoo mana mandara Bozraa
warra jajjaboo in fixa'
jedha" jedhe*.

*11-12 Isa 34:5-17; Kes 23:7; Er 49:7

Isa Amoon Irratti Dhufuuf Jiru

13 Waaqayyo akka jedhu! "Warri
biyya Amoon
daarii biyya isaanii
bal'ifachuudhaaf jedhanii,
biyya Giil'aaditti
garaa dubartoota ulfaa iyyuu
waan tarsiisaniif,
ani irra-daddarbaa isaanii
isa keessa deddeebi'aniif
adabni akka irraa deebi'u hin
godhu!

14 Kanaaf, 'Ani kella Raabaa irratti
ibidda nan bobeeessa;
inni immoo mana ishee warra
jajjaboo in fixa;
kunis guyyaa duulli wacutti,
guyyaa qilleensi bubbisuttis in
ta'a.

15 Mootiin warra Amoon
gurguddoonni isaas
isaa wajjin,

booji'amanii in adeemu'
jedha gooftichi" jedhe*.
*13-15 Er 49:1-6

Firdii Biyya Mo'aab Irratti Dhufuuf Jiru

2¹ Amos ammas, "Waaqayyo akka
jedhu!

'Warri biyya Mo'aab
lafee mootii Edoom gubanii
nooraa mana diban waan
godhataniif,
ani irra-daddarbaa isaanii
isa keessa deddeebi'aniif
adabni akka irraa deebi'u hin
godhu!

2² Kanaaf, ani biyya Mo'aab irratti
ibidda nan erga;

innj immoo mana jajjaboo
mandara Keriyot in fixa;
warri duulaa utuu wacanii,
sagalee fiinoos dhageessisanii,
namoonni Mo'aab
goolii keessa in du'u.

3¹ Isa biyya seerratus
ishee keessaa nan balleessa,
gurguddoota ishee hundumaas
isaa wajjin nan ajjeesa'
jedha Waaqayyo" jedhe*.

*1-3 Isa 15:1-16:14; Er 48:1-47

Firdii Biyya Yihudaa Irratti Dhufuuf Jiru

4¹ Waaqayyo akka jedhu! "Warri
biyya Yihudaa

seera koo seera Waaqayyo
isaanii tuffatanii
seerrata koos eegu didanii,
waaqayyolii sobaa warra
abboonni isaanii

duukaa bu'aa turaniin
waan wallaalchifamaniif,
ani irra-daddarbaa isaanii
isa keessa deddeebi'aniif
adabni akka irraa deebi'u hin
godhu!

5¹ Kanaaf, 'Ani biyya Yihudaa irratti
ibidda nan erga;
inni immoo mana jajjaboo
Yerusaalem
in fixa' jedha" jedhe*.

*5 Hos 8:14

Firdii Irra-Daddarbaa Isaatiif Biyya Israa'el Irratti Dhufuuf Jiru

6¹ Waaqayyo akka jedhu!

"Warri Israa'el
irra-daddarbaa isaanii keessa
waan deddeebi'aniif,
adabni akka irraa deebi'u
ani bin godhu!
Isaanoo nama qajeelaa meetiitti,
nama dhabaa immoo
gatii kophee baaqqee cimdii
tokkoof
jedhanii in gurguru*.

7¹ Isaanoo mataa warra dadhaboo
awwaara keessatti lafatti
dhidhiitan;

warra gad qabamoos
karaa irraa in daddarbatu;
maqaa koo isa qulqulluu
xureessuudhaaf,
ilmis abbaanis

dubartii ejjituu tokko bira in
ga'u*.

8¹ Isaan iddoo aarsaa
hundumaa bukkeetti immoo,
uffata qabsiisaaf fuudhan irra
in ciisu;

daadhii waynij warra adabaman
biraa dhufes,
mana Waaqayyo isaanii
keessatti in dhugu*.

*6 5:11-12; 8:4-6; Isa 1:17; Mat 3:1-4;
Far 35:10

*7 8:4; Bau 21:7-11

*8 Bau 22:25-26

9¹ "Ani immoo, 'Amoorota
warra akka birbirsaa dheeratan,
warra akka muka boonii
jabaatan fiula isaanii duraa
hundeedhaan buqqisee

sanyii isaanii lafa irraa
balleesseen ture*.

10¹ Lafa warra Amoorotaa
kan keessan akka godhattaniif,
anatu biyya Gibxiitii
ol isin baasee,
lafa onaa keessa waggaa
afurtama isin geggeesse*.

11¹ Ilmaan keessan keessaa raajota,
dargaggoota keessan keessaas
warra addaan baafamanii:-
Naaziroota jedhamanii
beekaman nan kaase;
kun dhuguma akkas mitii ree,
yaa warra Israa'el?

Kanas ana Waaqayyo keessantu
isin gaafata*!

12¹ Isin garuu
Naaziroota daadhii waynii

akka dhugan in gootan;
raajotaanis:- Raajii hin
dubbatinaa!

jettanii abbootan*.

*9 Lak 13:27-33; 21:21-25

*10 Bau 20:2; Kes 2:7; Hos 13:4-5

*11 Lak 6:2-12

*12 7:12-13; Lak 6:2-3; Isa 30:10;
Er 11:21

13¹ "Ammas akkuma konkolaataan
bissii midhaanii baatu wal
rigee iyyu,

kunoo, anis gidiraa jalaa
akka iyyitan nan godha.

14¹ Namni fiigicha danda'u
lafa itti baqamu bin qabu;
jabinni nama jabaa in laafa;
jagni lubbuu isaa hin oolfatu.

15¹ Inni iddaa qabu achi hin
dhaabatu,
inni fiigicha danda'us
miilla isaatiin of hin baasu;
abbaan fardaas lubbuu isaa hin
oolfatu.

16¹ Guyyaa sanatti jagnoota keessaa
inni laphe-jabeessi iyyuu
harka qullaa in baqata'
jedhee dubbateera Waaqayyo"
jedhe*.

*14-16 9:1

Warri Fo'aman Iyyuu Adabamuu Isaanii

3¹ Yommuu raajichi,
"Yaa namoota Israa'el,
dubbii Waaqayyoo isa inni isin
irratti,

guutummaa saba inni ofii isaatii
biyya Gibxii baase irratti
dubbate dhaggeeffadhaa*!

2¹ Innoo, 'Saba lafa irraa hundumaa
keessaa

ba'eessa godhee beekke isin
duwwaa ofitti qabeera;
kanaafis ani yakka keessan
hundumaa
isinitti nan ilaala' jedheera"
jedhe*.

*1 Bau 20:2

*2 Bau 19:5; Kes 4:34

Waaqayyo Hojii Isaa Karaa Raajotaa Mul'isuu Isaa

3¹ Namoonni lama walitti dhufanii
utuu waliif hin galin

walii wajjin dhimma tokkoof
adeemuu ree?

4¹ Leenci yoo waa qabachuuf
utaale malee,
caakkaa keessaa aadee of
dhageessisaa ree?

Leenci saafelli
yoo waa hin qabanne ta'e,
mann'ee isaa keessaa sagalee
isaa dhageessisaa ree?

5¹ Allaattiin waan isheen barbaaddu
kiyyoo keessa yoo jiraachuu
dhaabaate,
isa keessa galtii ree?

Futtaasaan, wanti qabamu
utuu itti hin bu'in
lafaa futta'aa ree?

6¹ Fiinnoon lolaa mandara keessatti
yeroo afuufamu
namoonni hin warceranii ree?
Unu Waaqayyo biraa hin dhufin,
wanti hamaan
mandara tokko irra ga'aa ree*?

7¹ Waaqayyo gooftaan
murtoo isaa isa dhokatee jiru
hojjetoota isaa warra raajotatti
utuu hin mul'isin,
takko illee hojii irra hin oolchu.

8¹ Leenci in aada,
egaa eenyu ree kan hin
sodaanne?

Waaqayyo gooftaan in
dubbachiisa,
egaa eenyu ree

raajii kan hin dubbanne*?

*6 Isa 45:7; Faru 3:37-38

*7-8 Uma 18:17; Er 20:7-9; IQor 9:16

Balleffamuu Mandara Samaariyaa (Amo 4:1-3; 6:1-7)

9¹ Mana jajjaboo mandara Ashdood
keessa,

mana jajjaboo biyya Gibxii
keessas warra jiraataniin,
"Tulloota naannoo Samaariyaa
gubbaatti

walitti qabamaatii
raafama gurguddaa
namoota ishee gidduutti ta'uu fi
cunqurfamuu ishee keessatti
ta'u ilaalaa!"
jedhaatii dhageessisaa!

10¹ "Isaan wanta qajeelaa
akka itti hojjetan hin beekan;
wanta hummaan nama irratti
ka'anii

saamanii argatan
manneetii isaanii warra
jajjaboo keessa
tuullatan" jedha Waaqayyo.
11 Sababii kanaaf Waaqayyo
gooftaan.
"Diinni biyyicha in marsa,
aangoo kees in cabsaa;
manneetiin kee warri
jajjaboonnis in saamamu"
jedha.
12 Waaqayyo, "Akkuma tiksituun
horiu leenci qabatu irraa
kottee lama
yookiis ciituu gurraa
huufatee dhi'eessu,
hafteen namoota Israa'el
warra Samaariyaa keessa
afata gaggaarii irratti
aara galfachuudhaan
itti tolee jiraatanii
akkasuma in ta'a" jedha*.

*12 Bau 22:12

13 Waaqayyo gooftaan maccaa akka
jedhu!
"Dhaggeeffadhaa, sanyii
Yaaqoobis gorsaa!
14 Guyyaa ani irra-daddarbaa
Israa'el ilaalutti,
iddoo aarsaa mandara Bet'el
diiguudhaaf nan dhufa;
gaanfonni iddoo aarsaas
muramanii lafa in bu'u*.
15 Mana yeroo qorraa keessa
taa'anii fi
mana yeroo bonaa keessa
taa'an nan jijjigsa,
manneetiin ilka arbaatiin
miidhagfamanis
iddoodhaa in hadu,
manneetiin warri jajjaboonnis
deebi'anii hin argaman" jedha;
Waaqayyo kana dubbateera*.

*14 1Mot 12:32; 2Mot 23:15

*15 5:11-12; 6:8,11; 1Mot 22:39; Far 45:8

Dubartoota Mandara Samaariyaa Irratti Dubbachuu Isaa

4 1 Isin yaa giiftolii,
warra akka saawwan biyya
Baashaan
tulluu Samaariyaa irratti
gabbattanii,
warra dadhaboo immoo
cunqursitanii,

warra wanta barbaachisaa
dhaban caccabsitanii,
abboota manaa keessaniin
"Dhugaatii as fidaa,
in dhugnaa!" jettanii,
dubbii kana dhaga'aa*!
2 Waaqayyo gooftaan
qulqullummaa isaatiin kakatee,
"Kunoo, guyyaan itti
hokkoodhaan
isin barkisanii,
warra isin hooddees
hokkoo qurxummiitiin baasan
in dhufa.
3 Adduma addaan qaawwa dallaa
fuula keessan dura jiru
keessa in haafamtu,
gara tulluu Hermoonittis
in daddarbatamtu" in jedhe;
Waaqayyo kana dubbateera.
*1 His 39:18

Warri Israa'el Cubbuu Irraa Deebi'uu Didduu Isaanii

4 "Bet'el iddoo itti sagadan dhaqaa,
irra-daddarbaa keessanis ittuma
dabalaa!
Giilgal iddoo sagadaa isa
kaanittis
irra-daddarbaa keessan ittuma
haay'isaa!
Borumtaa qalma aarsaa,
guyyaa sadaffaattis
kudhan keessaa tokko
dhi'eessaa*!
5 Mee buddeena bukaa'aa irraa
iyyuu
aarsaa galataa dhi'eessaa,
jaalala keessaniin aarsaa
dhi'eessuu keessan
mul'isaa beeksisaa!
Akkas gochuu in jaallattu'o,
yaa namoota Israa'el"
jedhee dubbateera Waaqayyo
gooftaan*.

*4 Hos 12:12; Kes 14:28; Hos 4:15

*5 Lew 2:11; Amo 5:4-5

6 "Mandara keessan hundumaa
keessatti
wanti afaanitti deebifattan
akka hin argamne,
iddoo jirtan hundumaattis
buddeenni akka dhabamu anatu
godhe;
kanuma irratti iyyuu

isin gara kootti hin deebine"
jedhee dubbateera Waaqayyo.
7 "Midhaan sassaabuuf ji'i sadii
hafee utuu jiruu,
bokkaa isin nan dhowwadhe;
mandara isa tokkotti bokkaan
akka roobu,
mandara isa kaanitti immoo
akka hin roobne nan godhe;
maasii isa tokkotti bokkaan in
roobe,
maasiin inni bokkaa dhabe
immoo in goge.
8 Kanaaf namoonni
mandara lama sadii,
bishaan dhuguudhaaf
gara mandara isa tokkootti
tiratan;
haa ta'u iyyuu malee dheebuu
ba'uu hin dandeenye;
kanuma irratti iyyuu isin
gara kootti hin deebine"
jedhee dubbateera Waaqayyo*.
*7-8 1Mot 17:1; Yoe 1:17-20

9 "Waagiidhaa fi gogiidhaan isin
nan rukute,
lafa isin biqiltuu dhaabbattan,
dhaabaa waynii keessanis nan
gogse,
harbuu keessanii fi ejersa
keessan
hawaannisatu nyaatee fixe;
kanuma irratti iyyuu isin gara
kootti hin deebine"
jedhee dubbateera Waaqayyo*.
10 "Dha'icha sanyii isa
biyya Gihxii keessatti ta'e
isin irratti nan erge;
dargaggoota keessan hillaadhaan
nan ajjeesise,
fardeen keessanis nan
boojisiise;
raqni iddoo huufata keessaniis
funyaan akka isin rukutu nan
godhe;
kanuma irratti iyyuu isin gara
kootti hin deebine"
jedhee dubbateera Waaqayyo*.

*9 Kes 28:21-22; Hag 2:17; Yoe 1:4

*10 Bau 11:4-5; 12:29; 9:3

11 "Ani Waaqayyo,
Sodoonii fi Gomoraa
akkuman harbadeesse,
isin keessaas

akkasuma nan barbadeesse;
isin akka mukukkula
ibidda boha'aa jiru keessaa
butamee taatan;
kanuma irratti iyyuu isin gara
kootti hin deebine"
jedhee dubbateera Waaqayyo*.
*11 Uma 19:24-25

12 "Kanaafis ani kana si irratti nan
raawwadha,
yaa Israa'el!
Ani kana si irratti waanan
raawwadhuuf,
ati immoo achuma dhaabadhuu
Waaqayyo kee eegi,
yaa Israa'el!" jedha gooftichi.
13 Kunoo, inni tulloota tolche,
inni qilleensa uume,
inni wanta yaada isaa keessa
jiru namatti beeksisu,
inni barii ganamaas dukkana
godhu,
inni lafa ol jedhaa
gararraa adeemu,
maqaan isaa Waaqayyo gooftaa
maccaa ti*!
*13 5:8-9; 9:5-6; Mik 1:2-3

Yaada Garaa Akka Geddaratanii Waamuu Isaa

5 1 Yaa warra biyya Israa'el, dubbii
ani boo'aa isin irratti dubbachuuf
ka'u kana dhaggeeffadhaa*!
2 Israa'el isheen akka durbaa
lafa dhoofteetti,
deebitees hin kaatu;
biyya ofii ishee keessatti kuftee
ciifti,
kan ishee kaasus hin jiru.
3 Waaqayyo gooftaanoo,
"Biyya Israa'el keessaa
mandarri tokko nama kuma,
duulatti yoo baase,
isaan keessaa namni dhibbi in
hafaaf;
mandarri tokko immoo nama
dhibba tokko duulatti yoo
baase,
namni kudhan in hafaaf" jedheera*.
*1 5:16-17; His 28:12
*3 6:9; Kes 28:62

4 Waaqayyo, warra biyya
Israa'eliin,

"Ana barbaaddadhaa,
jiraadhaas*!
5 Iddoo sagadaaf beekaman
Bet'elin hin barbaadinaa!
Giilgalin hin dhaqinaa!
Bersheebaattis hin ce'inaa!
Warri Giilgal hoojuutti in galu,
Bet'el gad deebitee
wanta waa'ee hin baafne
in taati" jedha*.
6 Egaa Waaqayyoon barbaaddadhaa,
jiraadhaas! Kanaa achi inni
akka ibiddaatti
mana Yoseef irra in bu'a, xaph
in godhas;
Bet'el irraa kan dhaamsus hin
argamu.

*4 Er 29:13
*5 4:5; 5:14-15

7 Isin warra dhugaa namaa
dubbii hadhaa'aatti geddartanii,
qajeelinas lafatti gattaniif
wayyoo*!

8 Inni urjoota "Torhii" jedhaman,
urjoota "Sadee"
jedhamanis uume,
inni dukkana ifa ganamaatti
diddiiru,
guyyaas dukkaneessee halkan
godhu,
inni bishaan galaanaa waamee,
irra lafaatti lolaasus,
maqaan isaa Waaqayyoo dha*!
9 Inni isa jabaa irratti badiisa in
bobeessa,
masaraattis balleffamuu in fida.

*7 6:12; Isa 5:20; Mik 3:9
*8 Iyo 9:9; 38:31; Amo 9:6

10 Isin isa walga'ii karra dallaa
keessatti
dhugaadhaaf falmuu in jibbitu,
nama dubbii hir'ina hin qabne
dubhatu in ciiggaatu*.

11 Isin nama dadhabaa
dhidhiittanii bulchitanii,
midhaan isaas karaa malee
waan irraa fudhattaniif,
dhagaa soofamaadhaan mana in
ijaarrattu,
garuu keessa hin jiraattan;
iddoo dhaabaa waynii
ija namaa harkisus in
qopheeffatni,

garuu daadhii waynichaa hin
dhugdan!

12 Isin warri nama qajeelaa
cunqursitanii
gabbarsuus fudhattanii,
nama dhabetes firdii
akka hin arganne gootan,
irra-daddarbaan keessan
attam akka baay'atu,
cubhuun keessanis attam akka
guddatu ani beeka*!
13 Kanaafis kun yeroo hamaa waan
ta'eef,
namni hufataan yeroo
akkasiitti calluma in jedha.

*10 Isa 29:21
*11-12 2:6-8; 8:4-6; Sef 1:13

14 Isin akka jiraattanitti
wanta gaarii barbaadaa malee,
wanta hamaa gochuu hin
barbaadinaa!
Yoos akkuma isin jettan in ta'a;
Waaqayyoo gooftaan maccaas
dhuguma isinii wajjin in
jiraata*.

15 Wanta hamaa jibhaa,
wanta gaariis jaalladhaa!
Walga'ii karra dallaa keessatti
dhugaan jabaatee akka dhaabatu
godhaa!
Yommuu Waaqayyoo gooftaan
maccaa, sanyii Yoseef
keessaa warra hafanitti
araara in argisiisa ta'a*.

*14 Er 7:1-11
*15 Far 34:14; Rom 12:9

16 Amma garuu Waaqayyoo
gooftaan maccaa gooftichi,
"Walga'ii karaa
hundumaa irratti in hoo'u,
karaa jiru hundumaa irrattis,
wayyool wayyoo! in jedhu;
warra qotiisa qotan gaddaaf,
boossiftuus boo'ichaaf in
waamu.

17 Iddoo dhaabaa waynii
hundumaatti iyyuu
boo'ichi in ta'a;
ani isin adabuudhaaf isin gidduu
waan darbuuf kun hundinuu
isinitti in dhufa" jedhe;
inni kana dubbate Waaqayyoo
dha*.

*16-17 5:1; Er 9:16-21

Gar-Malee Amanachuu Israa'el

18 Isin warra guyyaa Waaqayyoo
hawwaan eeggattaniif wayyoo!
Guyyaan Waaqayyoo maal
isiniif godha?
Inni isiniif dukkanaa'aa dha
malee ifaa miti!
19 Akka nama leenca jalaa utuu
baqatuu
amaaketi itti dhufuutti,
isa jalaa ba'ees manatti galee
keenyaa yommuu qabatu
bofni harka isaa idduu in taatu.
20 Guyyaan Waaqayyoo sun ifaa
utuu hin ta'in
dukkanaa'aa dha mitii ree?
Innoo duumessaa'aa dha aduus
hin qabu*.

*18-20 Yoe 2:1-11; 3:14-16; Sef 1:2-18;
Mil 3:2-5; Er 48:43-44

21 Waaqayyoo,
"Ani ayyaana ayyaanefachuu
keessan nan jibbe,
waa'ee isaas nan dhiise,
walga'iin keessanis
anatti in ajaa'e.

22 Qalma gubamuu fi keunaa
midhaanii
anaaf yoo dhi'eessitan iyyuu
ani itti hin gammadu;
horii coccoomoo
qalma galataaf dhi'eessitanis
ani hin ilaalu.

23 Iyya faarfannaa keessanii ana
irraa fageessaa!
Sagalee maseenqoo keessanii
ani dhaga'uu hin barbaadu.

24 Qooda kanaa hulchi qajeelaan
akka hishaaniitti,
qajeelummaanis akka laga
yeroo hundumaa yaa'uutti haa
burqu*!

*21-24 Isa 1:10-20

25 "Yaa warra Israa'el,
yeroo lafa onaa keessa
waggaa afurtama turtan,
qalma, kennaas
anaaf dhi'eessitanii mo
ree*?"

26 Ammas isin waaqayyolii
tofamoo keessan
'Saakuut' isa akka mootiitti
fudhattan,
'Kiiyoon' isa bifa urjii

laattaniif itti sagaddan
ol fudhattanii in baadhatni.
27 Kanaaf ani biyyaa isin haasee
mandara Damaasqoo garasitti
boojuutti
isin nan dabarsa" jedhee
dubbateera;
inni immoo maqaan isaa
Waaqayyoo gooftaa maccaa ti*.

*25 Er 7:21-23
*27 6:7; 9:4; 2Mot 17:6

Sohaani Of Jajjaheessanii Gad-Dhiisatti Jiraachuu Warra Gurguddootaa

6 1 Isin gurguddoonni saha
isa saha warra kaan irra caaluu,
warri namoonni Israa'el
gorsaaf gara keessan dhufanii,
isin Xiyoon keessa yaaddoo
tokko malee,
tulluu Samaariyaa gubbaas
homtuu hin jiru jettanii
amanattanii in jiraattu;
garuu isin warra akkasii kanaaf
wayyoo!

2 Darbaa mandara Kaalnee ilaalaa!
Achi immoo gara mandara
Haamaat
ishee guddittii dhaqaa!
Gara mandara biyya Filiisxiyaa
gara Gaatitti gad hu'aa;
isaan moonummoota
warra kan keessanii irra in
wayyuu ree?
Yookiis hiyyi isaanii biyya
keessan irra in bal'ataa
ree*?

3 Isin guyyaa hamaa
achi fageessuu in yaaddu,
wanti humnaan nama irratti
dhufu garuu
akka dhi'aan in gootu*.

*2 Uma 10:10; Isa 10:9-10
*3 9:10; Far 10:4

4 Isin siree ilka arbaa irra ciiftanii,
iddoo ciisicha keessanii irras
isinitti tolee in diriifattu;
hoolota keessaa warra xoxobhee,
tuntunoo keessaas
warra coccoomoo in nyaatni;
isiniif wayyoo*!

5 Isin sagalee maseenqootiin
waan waa'ee hin baafne in
weeddiiftu,

Daawitin fakkaachuufis
mi'a ittiin weeddisan in baafu;
* isin daadhii waynii soondoodhaan
dhuguuf,
dibata isa keessaa caalu
dibacbuu malee,
badiisa sanyii Yoseef irratti
dhufuuf jiruuf hin gadditan*.
* Kanaafis isin warra booji'aman
dura buutanii
gara booji'amu in dhaqxu,
inni isin nyaattanii dhugdani,
isinitti tolee iddoo ciisicha
keessanii irra
diriirfattanis in hafa.

*4 3:12

*5-6 Isa 5:11-12; Amo 2:8; 4:1

Israa'el Yakka Isaatiin Balleeffamu

* Waaqayyo gooftaan ofii isaatiin
kakatee,
"Of gurguddisuu sanyii
Yaaqoob
ijaan ilaaluu na jibbiisee,
manneetii isaanii warra
jajjaboo nan jibbe,
mandarattii, waan ishee
keessa guutes dabarsee
nan kenna" jedhee dubbateera
Waaqayyo gooftaan maccaa*.

*8 3:15; Isa 2:11-12

* Namni kudhan hafanii mana
tokko keessa
yoo jiraatan iyyuu, isaanis in
du'u.

* Egaa aantiin namicha du'ee
reeffa isaa gubuuhaaf,
mana keessaa gad in baasa;
yommuu isa gola manichaa
keessa jiruun,
"Kan biraa si bira jiraa?" in
jedhaan;
inni garuu, "Tokko iyyuu hin
jiru"
jedhee in deebisa;
namichis, "Maqaa Waaqayyoo
akka hin yaadannetti
mee hin dubbatin!" in jedha*.

* Kunoo, Waaqayyo akkas in
godha;
inni in abbooma,
manni guddaan in hunkutaa'a,
manni xinnaan isin in hurraa'a.

*10 8:3

* Fardeen dhagaa kakattaa irra in
fiiguu ree?

Namni qotiyyoodhaan galaana
in qotaa ree?

Isin garuu wanta qajeelaa
ta'ee fudhatame
wanta hadhaa ta'utti,
qajeelina hadhoofuutti
geddantaniitu*.

* Isin warri mandara Lodbaar
ishee "Waan tokkotti hin
galle" qabachuutti
gammaddanii,

"Jabina keenyaan mandara
Karnaayim
ishee 'Gaanfee' jedhamtus
fudhanne"

jettanii of jajattaniitu*!

* Waaqayyo gooftaan maccaa
immoo,

"Yaa mana Israa'el,
kunoo, ani saba tokko sitti nan
kaasa,

inni immoo karaa mandara
Haamaat

isa gara bitaatii jalqabee
hamma dachaa lafa duwvaa
isa gara mirgaattis si
cunqursuuf jira"
jedhee dubbateera*.

*12 5:7

*13 Kes 8:17; Hos 1:7

*14 2Mot 17:5-6

**Firdil Israa'elin Eeggatu
Mul'ataan Arguu Isaa**

* Wanta Waaqayyo gooftaan
mul'ataan anatti argisiise
isinitti himuufan jira.
Kunoo, marga isa duraa
mootichaaf erga haamanii
booddee,
marga isa deebi'ee biqilutti
gurmuu hawaannisaa yaase.

* Hawaannisichi biqila lafaa
nyaatee fixuuf jennaan,
"Yaa Waaqayyo gooftaa ko,
Yaaqoob ilma xinnaa waan ta'eef,
attamitti kana dura
dhaabachuu danda'a ree?
Ati dhiisiifi!" nan jedhe*.

* Yommuu Waaqayyo
isa itti fiduuf yaade in dhiise;
gooftichi,
"Kun itti hin dhufin!" jedhe*.

*1-2 Yoe 1:4

*3 Yoe 2:14,17-18

* Wanta Waaqayyo gooftaan
mul'ataan anatti argisiise
dabalee isiniitti nan hima;
kunoo, Waaqayyo gooftaan
firdii biyya sana irratti
raawwachuudhaaf,
ibidda irratti in waame;
ibiddichis galaana guddaa
isa lafa jalaa gubee fixee,
lafa qotiisaas xaph gochuuf
jedhe*.

* Kana irratti, "Yaa Waaqayyo
gooftaa,
Yaaqoob ilma xinnaa waan
ta'eef,
attamitti kana dura dhaabachuu
danda'a ree?
Ati wanta kana irraa ittisi!"
nan jedhe.

* Yommuu Waaqayyo
isa itti fiduuf yaade in dhiise;
Waaqayyo gooftichi, "Kunis
immoo
itti hin dhufin!" jedhe.

*4 Yoe 1:17-20

* Waaqayyo waan tokko immoo
mul'ataan
anatti argisiiseera;
kunoo, gooftichi
fo'aa tumbii isa ittiin
masaraa qajeelchanii ijaaran
harkatti qabatee,
masaraa akkasitti ijaarame irra
in dhaabata ture.

* Inni, "Yaa Amos,
maal argita?" naan jedhe;
Kana irrattan, "Tumbii nan
arga" jedhee deebiseef;
gooftichi immoo, "Ilaa,
tumbii ittiin
jal'inni saba koo Israa'el
qoramee ilaalamu
isaanitti nan qaba;
ani deebi'ee irra isaaniif hin
darbu*.

* Iddoon ol
jedhoon warri maatiin Yisihaq
irratti sagadan hundinuu in onu;
iddoo qulqullaa'oon
warri kan Israa'el in diigamu;
mana Yerobi'aam irrattis
billaadhaan nan ka'a" jedhe*.

*8 Isa 34:11; Amo 8:2

*9 Kes 12:2-3

Raajichi Arl'atamuu Isaa

* Kana booddees Amaasiyaan lubni
Bet'el,
Yerobi'aam mootii Israa'elitti
ergee,

"Amos namoota Israa'el gidduu
dhaabatee sitti korateera;
wanta inni dubbates
lafti baachuu hin danda'u*.

* Namichi, 'Yerobi'aam
billaadhaan in du'a,
namoonni Israa'el is biyya
isaaniitti inuma baafamu,
inuma booji'amus'
jedheera" jedhe.

*10 2Mot 14:23-29; Er 38:4

* Amaasiyaan yommuu Amosiin,
"Yaa namicha mul'ata argituu,
asii adeemi,
biyya Yihudaatti baqadhu!
Achitti raajii dubbadhu
ittiin buddeena nyaadhu*!

* Bet'el iddoo manni qulqullummaa
inni mootichi keessatti sagadu,
manni sabni mootummaa kanaa
itti wal ga'us jiruu dha;
asitti matumaa deebitee
raajii hin dubbatin!" jedhe*.

*12 ISam 9:6-7; 1Mot 14:2-3; 2Mot 4:42;
Mik 3:4,11

*13 1Mot 12:26-32

* Amos immoo deebisee
Amaasiyaadhaan,
"Ani horii nan horsiisa,
harbuus dhaabee nan guddisa
malee,
hojiin koo raajii dubbachuu
miti,
sanyiin koos raajii hin
dubbanne*.

* Waaqayyo garuu horii ani tiksu
biraa na fudhatee,
'Dhaqii saba koo Israa'elitti
raajii dubbadhu!' naan jedhe.

* Ati immoo, 'Israa'el irratti
raajii hin dubbatin,
mana Yisihaq irrattis
hin lallabin!' anaan jetteetta;
egaa amma dubbii Waaqayyoo
dhaggeeffadhu*!

*17 Waaqayyo,

'Haati manaa kee mandara
keessatti ejjituu in taati,
ilmaan kee fi intallooni kee
billaadhaan in kufu,
lafti kee funyoo safaraatiin in
hirmama,
atis ofii keetii biyya xuraa'aa
keessatti in duuta;
namoonni Israa'elis biyya
isaaniitii inuma baafamu,
inuma booji'amus'
siin jedha" jedhe*.

*14 1:1; Zak 13:2-6

*16 2:12

*17 5:27; Hos 9:3-4

Firdiin Israa'elin Eggatu Dbi'aachuu Isaa

8¹ Waaqayyo waan tokko immoo
mul'ataan anatti argisiiseera;
kunoo, guuboo ija mukaa
bilchaataa baatu tokko nan
arge.

2² Waaqayyo yommuu,
"Yaa Amos, maal argita?"
naan jedhe;
kana irrattan, "Guuboo ija mukaa
bilchaataa baatu
tokko nan arga" jedhee
deebiseef;

Waaqayyo immoo, "Sabni koo
Israa'el dhumuu ga'eera,
ani deebi'ee irra isaaniif hin
darbu.

3³ Guyyaa sanatti
warri mana mootummaa keessaa
weeddisan in boo'u,
reeffi warra du'anii in baay'ata;
calluma jedhaniis
iddoo hundumaatti in gatu"
naan jedhe;

Waaqayyo gooftaan
akkas jedhee dubbateera*.

*1-3 7:1-9; 9:1-4; Er 24:1; Amo 5:16-17;
6:10; Er 9:21

4⁴ Isin yaa namoota warra dhaban
dhidbiittanii,
warra gad qabamoos
balleessitanii,
mee kana dhaga'aa*!

5⁵ Isinoo, "Quunnaa ittiin safarru
xiuneessinee
gatii immoo ol kaasuudhaan
mijana sobaatiinis
gowwoomsuudhaan midhaan
akka gurgurrutti,

ayyaanni baatii yoom darba?
Gombisaa midhaanii banuudhaafis
Sanbanni yoom darba*?

6⁶ Silaa ungulaallii midhaanii in
gurgurra;
warra dadhaboo meetiidhaan,
warra dhabanis
gatii kopbee baaqqee cimtii tokko
irra jiruun
in binna" in jettu*.

*4 2:7

*5 Lew 19:35-36; Mik 6:10-11; Nah 13:15

*6 2:6

7⁷ Waaqayyo ulfina isaa isaa
Yaaqoob jajatuun kakateera,
"Hojii isaaniis isa hamaa
hundumaa
ani matumaa hin irraanfadhu.

8⁸ Sababii kanaaf lafti bin raafamuu
ree?

Warri isa keessa jiraatan
hundinuus hia gaddanii ree?
Guutummaan biyyichaa akkuma
laga Abbayyaa ol in ka'a,
akka laga isa Gibxi keessa
daddarbatamaa yaa'uus
gad in gala" jedhe*.

*8 9:5

9⁹ Waaqayyo gooftaan,
"Guyyaa sanatti biiftuun
waareetti akka lixxu,
ifni guyyaa utuma jiruus
lafti akka dukkanaa'u nan
godha*.

10¹⁰ Cidha keessan gaddatti,
faarfannaa keessan
hundumaas boo'ichatti nan
geddara;

mudhii keessanii gaditti
uffata gaddaa isin nan
hidhachiisa,
mataa keessanis akka
haaddattan nan godha;
boo'icba kana

akka boo'icba isa ilma
tokkicbaaf boo'anii nan
godha;

wanti guyyaa sanatti ta'us
bamma dhumaatti jibbisiisaa
in ta'a" jedhee dubbateera*.

*9 5:18; Yoe 2:10

*10 Er 48:37-38; 6:26

11¹¹ Waaqayyo gooftaan,
"Kunoo, barri ani itti.

biyya kana irratti beela
ergu dhufuuf jira;
beelicbis isa namoonni
dubbii Waaqayyoo dhaga'uu
dhabanii

beela'an malee,
beela buddeenaa fi dheebuu
bisbaanii miti.

12¹² Isaan dubbii Waaqayyoo
barbaaddachuudhaaf
galaana

isa gara tokkootii hamma
galaana

isa gara kaaniitti,
gara bitaatii hamma

ba'a-biiftuutti in tiratu;
garuu argachuu hin danda'an*.

*11-12 ISam 3:1; 28:6; Fak 1:28; Far
74:9; Hos 5:6; Mik 3:6-7

13¹³ "Guyyaa sanatti durboonni
babbareedonni fi
dargaggoonni dheebuudhaan in
gaggabu.

14¹⁴ Isaan warri Waaqayyo tolfamaa
isa warri Samaariyaa
ittiin yakkanii kakatan,
Daaniin, 'Dbugaa isa ati

waqessituu ti!'
Bersheebaadhaanis,
'Dhugaa karaa isa kan keetii
ti!'

jedhan in kufu, deebi'anii
matumaa bin ka'an!"
jedhee dubbateera*.

*14 Hos 8:5-6; Amo 5:5; Abo 18:30

Firdiin Israa'elin Eggatu Kan Hin Oolle Ta'uu Isaa

9¹ Ammas Waaqayyo gooftaan
iddoo aarsaa gararraa
utuu dhaabatuu mul'ataan nan
arge;

inni, "Manichi guutummaatti
akka raafamutti
mataa utubaa isaa rukuti!
Mataa bunduma isaani irrattis
caccabsi!

Warra kana irraa hafanis
billaadhaan nan ajjeesa,
isaan keessaa tokko illee
danda'ee jalaa hin baqatu,
tokko illees jalaa hin ba'u*.

2² Isaan qotanii
iddoo lafa jalaa yoo ga'an
iyyuu,

harki koo qabee achi keessaa
ol isaan in baasa;
bantii waaqaatti yoo ol ba'an
iyyuu,

achii gad isaan nan buusa*.

3³ Gubbee tulluu Qarmelos irra
yoo dhokatan iyyuu,
achi irratti argee isaan nan
qaba;

ija koo duraa galaana gad fagoo
keessa

lafa bira ga'anii yoo miliqan
iyyuu,

achitti iyyuu bofni galaana
keessaa

akka isaan idduuf nan abbooma.

4⁴ Booji'amanii diinota isaani dura
yoo oofaman iyyuu,
achittis billaa isaaniitti nan
ajaja,

innis isaan in ajjeesa;
gaariidhaaf utuu hin ta'in,
ija hamaadhaan isaan nan
ilaala" jedhe*.

*1 7:1-9; 8:1-3; Isa 6:1; Amo 8:8

*2 Iyo 26:6; Far 139:7-12; Er 23:24

*4 5:27; Er 44:11

5⁵ Waaqayyo gooftaan maccaa
harka isaatiin laficha in tuqa;
lafichi in raafama,

warri isa irra jiraatanis in
boo'u;

guutummaan biyyichaa akkuma
laga Abbayyaa ol in ka'a,
akka laga Abbayyaa

isa Gibxi keessa yaa'uus
gad in gala*.

6⁶ Waaqayyo gooftaan mana isaa
isa gararraa,
bantiiwwan waaqaa keessatti in
ijaare;

bantii waaqaa isa naannoos
lafa gararraa in dhaabe;
inni bishaan galaanaa waamee,
irra lafaatti lolaaus
maqaan isaa Waaqayyoo dha*!

7⁷ Waaqayyo, "Yaa namoota
Israa'el, isin anaaf
akkuma ijoollee Knush
warra fagoo sanaa mitii ree?
Warra Israa'el biyya Gibxiitii
akkuman ol baase,
warra Filiisixiyaa biyya Kaftor
keessaa,

warra Aaramis biyya Qiir
keessaa
nan fide mitii ree?"
jedhee dubbateera*.

*5 8:8; Far 104:32

*6 Far 104:3

*7 3:1-2; Er 47:4

* Kunoo, Waaqayyo gooftaan
mootummaa

biyya cubbamaa kana
ija dbeekkamsaatiin in ilaala;
Waaqayyo, "Ani lafa irraa
isa nan balleessa;
baa ta'u iyyuu malee, sanyii
Yaaqoob guutummaatti bin
balleessu*.

* Kunoo, ani saba lafa irraa
isinitti nan abbooma,
akka nama midhaan
gingilchuus,
isin warra Israa'el
akka gingilchan nan godha,
kan bin barbaadamnes tokko illee
gingilcbaa keessa bin darbu.

* Saba koo keessaa cubbamooni
warri,
'Wanti bamaan nutti bin
dhi'aatu, nu bin qaqqabus'
jedhan
bundinuu billaadhaan in du'u"
jedhee dubbateera*.

*8 6:8-10

*10 6:3; Mik 3:11

Israa'el Deebitee
Dhaabamnuuf Akka Jirtu

* Ammas Waaqayyo,
"Gaaf tokko immoo manni
Daawit
inni jige ol ka'ee
akka dhaabatu oan godha,
keenyan mana isaa isa dhagaas
nan deddeebisa,
isa hurraa'es wal nan
qabacbiisa,
akka isaa duriittis deebisee nan
ijaara.

* Isaan biyya Edoom keessaa
warra hafan,

saba lafa irraa keessaa
warra kan koo ta'anii beekaman
bundumaas haa qabatan!"
jedhee dubbateera;
gooftichiis kana in godha*.

*11-12 2Sam 8:1-14; 1Mot 5:1;
HoE 15:16-18; Oba 19-20

* Waaqayyo, "Kunoo, barri tokko
in dhufa;

bara sanas utuu
namni sanyii facaasuu,
booddee isaatiin immoo inni
tokko haamaatti in ka'a;
akkasumas utuu inni tokko
ija waynii cuunfuu,
inni kaan dhaabuuf
lafa baqaqsuutti in ka'a;
tulloonni, cuunfaa waynii
isa haaraa in coccophsu,
gaaronni bundinuu in fiilu*.

* Saba koo Israa'elin gara gaariitti
nan deebisa;
isaan mandaroota diigaman
deebisanii ijaaranii keessa
jiraatu;
iddoo dhaabaa waynii in
qopheeffatu,
daadhii waynichaas in dhugu,
lafa muka ija kennu dhaabbatan
in qabaatu,
ija isaas in nyaatu*.

* Biyya isaanii irra isaan nan
dhaaba,
biyya ani isaaniif kenne
keessaa
deebi'anii hin buqqifaman"
jedhe*;
inni kana dubbate immoo
Waaqayyo gooftaa kee ti*.

*13 Lew 26:5; Yoe 4:18

*14 Kes 30:3; Isa 65:21-22; Er 31:5;
Hos 14:8

*15 Er 24:6

Macaafa Obaadiyaa Raajichaa

Firdiin Edoom Irratti Akka
Dhafu Himuu Isaa

(Isa 34:5-17; 63:1-6; Er 49:7-22;
His 25:12-14; 35:1-15; Amo 1:11-12;
Mil 1:2-5)

* Mul'anni Waaqayyo gooftaan
waa'ee biyya Edoomiif
Obaadiyaatti mul'ise
kanstti fufee jira;
ergamaan tokko
gara saba biyya lafaa irra
jiraniitti ergamee,
"Ka'aa! Dhaqnee
biyya Edoom in lollaa!"
jechuuf akka jiru
nuyi Waaqayyo irraa
dbageenyecerra.

* Ammas Waaqayyo, "Kunoo,
saba lafa irraa keessaa ati akka
xinnaattu,
raawwatees akka tuffatamtu
nan godha;

* ati yaa isa mana kee
iddoo ol jedhaa irratti
ijaarrattee,
yaa isa holqa dhagaa keessa
jiraattuu,

'Eenyutu lafatti gad na buusa?'
jettuu,
of tuulummaa garaa keetiitu si
gowwoomse*.

* Ati akka joobiraa yoo ol kaate
iyyuu,
mann'ee kees urjoota gidduutti
yoo ijaarrattee iyyuu,
ani achii gad sin buusa"
jedhee dubbateera*.

*3 Lak 24:21

*4 Isa 14:13

* Hattuun yookiis saamtuu
balkaniin mana kee dhufuun
si balleessuudhaaf yoo ta'e
iyyuu,
bammuma barbaadan hatu mitii
ree?

Warri ija waynii ciratanis
yoo dhufan,
qarmii in bambisu mitii ree?

* Garuu attamitti qabeenyi
Esaawuu fonqolfame,
badhaadhummaan inni
dhokfates

attamitti akka jirutti saamame
ree?

* Warri garee keetii hundinuu
gara daariitti si in dhiibu,
firoonni kees

gowwomsaadhaan si
mo'u;
firoonni kee warri amanamoon
dhoksaatti kiyyoo si dura in
kaa'u,
"Inni immoo hin hubatu" siin
jedbu.

* Guyyaa sanatti Waaqayyo,
"Ani warra ogeessota Edoom
keessaa,
warra hubatoo tulluu Esaawuu
irraa bin balleessuu ree?"
jedhee dubbateera.

* "Yaa Teraan! Loltoonni kee in
sodaacbiifamu,
warri tulluu Esaawuu irra
jiran hundinuu
ajjeefamanii in dhumu.

* Obboleessa kee Yaaqoob irratti
bumnaan waan kaateef,
in yeellaasifamta,
bara baraanis in badda.

* Yommuu warri ormas loltoota
isaa buuji'anii
dallaa isaatti ol lixanii
Yerusaalem irratti muka
buufatan,

atis akkuma warra kaanii
isaanitti taatee,
irras fagaattee in dhaabatte*.
* Guyyaa obboleessi kee rakkatutti
isa tuffachuun,
guyyaa badiisa namoota

Yibudaatti, gammaduun,
yeroo dhipbina isaaniittis
isaanitti baannachuun
siif hin ta'u ture!

* Guyyaa badiisi saba kootti
dhufutti
dallaa isaaniitti ol lixuun,
guyyaa badiisa isaaniitti isaanitti
ga'isuun,
isaan saamuunis
siif hin ta'u ture*!

* Guyyaa dhipbina isaaniitti
karaa qaxxaamuraa irra
dhaabattee

cegdee warra baqatanii ba'an

rukuttee ajjeesuun,
warra bafanis dabarsitee
kennuun,
siif hin ta'u ture!

*10-11 Amo 1:11; Yoe 3:19; Far 137:7;
Faru 4:21-22

*12-13 Faru 1:7

15 "Guyyaan ani Waaqayyo
saba hundumaatti faradu
dhi'aateera;

akkuma ati nama irratti hojjette
si irratti in bojjetama;
bojiin kees mataa keetti in
deebi'a*.

16 Akkuma sabni koo tulluu koo isa
qullaa'aa irratti
xoofoo dbeekkamsaa keessaa
dhugan

akkasuma immoo sabni hundinuu
utuun wal irraa bin kutin
isa in dhugu;

isaan qodaa isaa keessaa
xuruufatanii in dhugu,
akka waan hin jirrees in ta'u*.

17 Warri hafan garuu
tulluu Xiyoon irra in jiraatu,
tullicbis qulqullaa'aa in ta'a;
sanyiin Yaaqoob immoo
warra lafa isaanii fi
qabeenya isaanii
isaan irraa fudhatee harkaa
deebisanii in fudhatu*.

18 Yommuu ega sanyiin Yaaqoob
ibidda,

sanyiin Yoseefis
barbadaa itti ta'anii,
sanyii Esaawuu isa akka babaqii
gubanii in fixu;
sanyii Esaawuu keessaa kan
oolu
tokko illee bin jiru" jedhee
dubbateera*.

*15 Yoe 3:14-16

*16 Er 25:15; Faru 4:21

*17 Yoe 2:32; 3:17; Isa 14:32

*18 Zak 12:6

19 Warri biyya gara mirgaa tulluu
Esaawuu,

warri gaara jala jiraatan immoo
biyya Filiisxiyaa in qabatu;
isaan Samaariyaadhaa fi
lafa sanyii Efreem in qabatu,
sanyiin Beniyaamin immoo
Giil'aadin in qabatu.

20 Loltoonni Israa'el

warri booji amanii turan
biyya Kana'aan hamma
Zaarefaatitti in qabatu;
warri Yerusaleemii booji amanii
Sefaaraad jiran immoo
mandaroota biyya
gara mirgaa keessa jiran in
qabatu.

21 Warri isaan furan tulluu Xiyoon
irratti

ol ba'anii Esaawuutti in faradu;
yommuu mootummaan
kan Waaqayyoo in ta'a*.

*21 Isa 24:23; Far 99:1-2

Macaafa Yoonas Raajichaa

Yoonas Hojil Itti Waamame
Dblisee Iddoo Biraatti Ka'uu Isaa

1 Gaaf tokko dubbiin Waaqayyoo
gara Yoonas ilma Amiitaayi dhu-
fee*, 2 "Ka'ii, gara Nanawwee mandara
guddittii dhaqi! Hamminni namoota
ishee guddatee na bira waan ga'eef,
irratti labsi!" jedhe. 3 Yoonas garuu isa
dhiisee, fuula Waaqayyoo duraa manda-
ra Tarshiishitti baqabuudhaaf ka'e;
mandara Yopbeetti gad bu'ee markaba

Tarshiish dhaqu argate; inni warra mar-
kabicbaa wajjin adeemuudhaaf gatii
isaa baafatee, fuula Waaqayyoo duraa
gara Tarshiishitti sokkuudhaaf keessa in
lixee*.

*1 2Mot 14:25

*3 Far 139:7-10

Waaqayyo Qilleensa Jabaa Itti
Kaasee Yoonasni Adabuu Isaa

4 Yommuu Waaqayyo qilleensa ja-
baa galaanichatti kaase; bubbleen

humna-qabeessis galaanichatti waan
ka'eef markabicbi caccabun bira
ga'e*. 5 Yeroo sanatti warri markaba
oofan in sodaatan; namnis adduma
addaan gara Waaqayyo isaatti iyye;
akka itti salphatuuf mi'a markabicba
irraa galaanatti gad daddarbatan; Yoo-
naas gara kutaa markabicbaa keessa
lixee ciisee, rafees of gatee ture*.
6 Ajajjuun markabicbaa immoo isatti
dhi'aate, "Attamitti akkas of gattee
rafta? Ka'ii, Waaqayyo kee waamma-
dhu! Tarii Waaqayyo kun akka nuyi
bin badneef nu yaadata ta'a!" jedhe*.

*4 Far 107:23-26

*5 HoE 27:18

*6 Mar 4:38

7 Kana booddees warri markabaa
adduma addaan, "Wanti hamaan kun
sababii eenyuutiif akka nu irra ga'e
beekuudhaaf, kottaa muka buufannaa!"
waliin jedhan; kanaaf isaan muka buu-
fannaan, mukti Yoonas irra bu'e*.
8 Kana irratti isaan, "Wanti hamaan
kun sababii eenyuuf nu irra ga'e?
Hojiin kee maali? Eessaa dhufte? Biyyi
kee cessa? Sanyiin kee maali? Nutti
himi!" ittiin jedhan. 9 Inni immoo,
"Ani Ibricba; Waaqayyoon isa gooftaa
ta'ee waaqa irra jiraatu, isa galaanaa fi
lafa uume nan waaqeffadha" jedhee,
isaaniif deebise*. 10 Inni waa'ee ofii
isaa waan isaanitti himeef, jarri fuula
Waaqayyoo duraa baqachaa akka inni
jiru in hubatan; kanaaf isaan guddaa
sodaatanii, "Maali, ati attamitti akkas
goote?" ittiin jedhan. 11 Galaanichi it-
tuma dabalee hunkuramaa waan adee-
meef isaan, "Galaanichi nu irraa akka
gab jedhuuf attam si goonu ree?"
jedhanii isa in gaafatan. 12 Kana irratti
Yoonas, "Fuudhaatii galaanicha kees-
sa na buusaa! Yoo galaanichi isin
irraa gab in jedha; bubbleen humna-qa-
beessi isinitti ka'e kunis sababii kootiif
ta'uu isaa anoo beekeera" isaaniin
jedhe.

*7 Fak 16:33

*9 Uma 1:9-10

13 Jarri immoo markabicba deebi-
sanii gara lafaatti baasuudhaaf jabees-
sanii in mooqan; garuu hunkuramuun
galaanichaa isaanitti dabalaa waan
adeemeef, kana gochuu hin dandeenye.
14 Yommuu isaan Waaqayyoon isa ga-
laanaa fi lafa uume waammatanii, "Ha-

daraa yaa Waaqayyo! Lubbuu namicha
kanaa nu harkaa barbaaddees nu hin
balleessin! Akka warra dhiiga nama
balleessaa bin qabne dhangalaasaniittis
nu hin lakkaa'in! Yaa Waaqayyo, kana
akka sitti tolutti situ hojjete" jedhan.
15 Yoonasin immoo fuudhanii galaani-
cha keessa buusan; galaanichis hunku-
ramuu isaa isa sodaachisaa in dhaabe.
16 Jarri ittumaa guddisanii Waaqayyoon
sodaatan; Waaqayyoof aarsaa in
dhi'eessan, warcegas in wareegan.

2 1 Waaqayyo yeroo sanatti, qur-
xummiin guddaan tokko achitti
argamee, Yoonasin akka liqimsu go-
dhe; akkasitti Yoonas garaa qurxum-
michaa keessa guyyaa sadii fi halkan
sadii ture*.

*1 Mat 12:40; 16:4

Yoonas Waaqayyoon
Kadhatee Oolfamun Isaa

2 Yoonas immoo garaa
qurxummichaa keessaa
Waaqayyo isaa goofticba in
kadhate;

3 "Yaa Waaqayyo,
ani rakkina koo keessatti si
nan waammadhe,
ati yommuu ana jalaa in
owwaatte;
garaa iddoo lafa jalaa keessaa
sitti nan iyyadhe,
ati immoo sagalee koo anaaf in
dhageesse*.

4 Ati tuujjuba keessatti,
garaa galaanaa keessatti na
darbatte;
bishaan humnaan lola'us
ana marsee ture,
dha'aan kee fi tuulamee
darbatamuun bishaan keetii
bundinuu ana irra in yaa'an*.

5 Yommuu, 'Anoo fuula kee
duraa gatameera,
deebi'ee mana qulqullummaa
kee nan arga laataa?'
jedhee nan yaade*.

*3 Far 120:1; Faru 3:55

*4 Far 42:7

*5 Far 31:22

6 "Bishaanonni mataa koo irra
yaa'anii,
lubbuu koof in sodaachisan;
tuujjubni na marsee,

margi bishaan keessaas mataatti na marme*.

⁷ Yommis ani gara hundee tullootaatti;

gara biyya danqaraan isaa bara baraan

ana irratti cufameetti gad nan bu'e;

ati garuu yaa Waaqayyo gooftaa ko,

boolla gad fagnu sana keessaa fayyaatti ol na baafte*.

⁸ Yeroo lubbuun koo na keessatti gaggabdetti,

yaa Waaqayyo ko, ani sin yaadadhe;

kadhanni koo mana kee isa qullaa'aa keessatti gara kee anaaf in dhufe*.

*⁶ Far 18:4; 69:1-2

*⁷ Far 40:2; 103:4

*⁸ Far 18:6; 142:1-3

⁹ "Warri waaqayyolii tolfaman warra waa'ee hin baafneef safuu buufatan,

Waaqayyoon isa gaarummaa isaanitti argisiisu in dhiisu*.

¹⁰ Ani garuu sagalee galataatiin, aarsaa siif nan dhi'eessa;

wanta ani wareeges nan baasa; fayyisuun kan Waaqayyoo ti!" jedhe*.

¹¹ Ergasii Waaqayyo qurxummi-chatti in dubbate, inni immoo gara lafa gogaatti baasee Yoonas in ol deebise.

*⁹ Far 31:6

*¹⁰ Far 22:25; 50:14; 116:17-18

Yoonas Lafa Waaqayyo Itti Ergee Ture Dbaquu Isaa

3 ¹ Ergasii dubbii Waaqayyoo si'a lammaffaa gara Yoonas dhufee,

² "Ka'ii, gara Nanawwee mandara guddittii dhaqi, wanta ani akka ati labsituuf sitti himus irratti labsti!" jedhe*.

³ Kana irratti Yoonas akkuma Waaqayyo isatti himetti ka'ee gara Nanawwee dhaqe; Nanawween fuula Waaqayyoo duratti iyyuu mandara baay'ee guddoo turte, gara tokkoon lixanii gara kaaniin ba'uudhaaf adeemsa guyyaa sadii in fudhata ture*.

⁴ Yoonas mandarttii keessa lixuu jalqabee, adeemsa guyyaa tokkoo erga adeemee booddee, "Nanawween garagagaluudhaaf guy-

yaa afurtama duwwaatu hafe!" jedhee labse.

*¹⁻² 1:2

*³ 4:11

Warri Nanawwee Gara Waaqayyooitti Deebi'anii Ooluu Isaanii

⁵ Warri Nanawwee dhaamsa Waaqayyoo kana amananii fudhatan; gurguddaan, xixinnaanis akka soomaniif labsanii, uffata gaddaas in uffatan*.

⁶ Dubbiin kun mootii Nanawwee bira in ga'e, yommus inni teessoo isaa irraa ka'ce, uffata isaa isa surra-qabeessa of irraa fuudhee, uffata gaddaa uffatee daaraa keessa in taa'e.

⁷ Achumaan mootichi guutummaa mandara Nanawweetti labsiin akka labsamu in godhe; labsiin ba'e sunis, "Mootichaa fi gurguddoota isaa biraa akka abboomametti namni, sa'i, bushaayeen, horiin qe'ee warri kaanis, waa afaaniin hin qabin, marga hin dheedin, bisbaan iyyuu bin dhugin!"

⁸ Namni fi horiin gadda baa uffatan; jabeessaniis gara Waaqayyooitti haa iyyan; namni adduma addaan karaa isaa isa bamaa irraa, irree isaa nama irratti argisiisuu irraas haa deebi'u!

⁹ Waaqayyo isa fiduuf yaade dhiisee in deebisa ta'a, maaltu beeka? Akka nuyi hin badnettis aarii isaa isa finiinaa irraa in deebi'a ta'a" kan jedhu ture*.

*⁵ Isa 58:5; Mat 12:41; Yoe 1:14

*⁹ Yoe 2:13-14; Amo 5:15

¹⁰ Waaqayyo kana goobuu isaani, karaa isaani isaa bamaa irraa deebi'uu isaaniis in arge; kanaaf inni wanta hamaa isaanitti fiduudhaaf dubbate sana in dhiise, irrattis bin fidne*.

*¹⁰ Er 18:7-8

Aarii Yoonasii Fi Araara Waaqayyoo

4 ¹ Yoonas waa'ee kanaaf baay'ee dallanee, aaree in boba'es; ² yommus inni Waaqayyoon kadhatee, "Maaloo yaa gooftaa, utuun biyya koo-tii hin ka'in, inni ani sodaadhe isuma kana mitii ree? Ati Waaqayyo araara-qabeessa, oo'a-qabeessa, aariitti suuta-jedhaa dha, gaarummaan kee baay'ee dha, wanta hamaa fiduuf jettees in dhiifta; ani kana beekkeen harka si dursee Tarshiishitti sokke*." ³ Amma

immoo yaa Waaqayyo, ani jiraachuu irra du'uu anaaf wayya, hadaraa lubbuu koo ana keessaa fuudhi!" jedhe*.

*² Bau 34:6

*³ 1Mot 19:4

⁴ Waaqayyo immoo deebisee, "Ati aaruun siif in ta'aa ree?" jedheen.

⁵ Yommus Yoonas mandaricha keessaa ba'ee, mandaricha irraa gara ba'a-biiftuutti gorce taa'e; achitti godoo baalaa walitti qabatee, wanta mandarattiitti dhufu hamma argutti gaaddisa isaa jala taa'e.

⁶ Yommus Waaqayyo gooftaan biqiltuun akka qobboo biqilee, gaaddisa isaa mataa Yoonas irra buufatee dallansuu isaa akka itti fooyyeessuuf godhe; Yoonas immoo biqiltuu sanatti baay'isee in gammade.

⁷ Borumtaa garuu yeroo boruun baqaqutti Waaqayyo, raammoon tokko biqiltuu akka qobboo sana akka ciniintu in godhe; biqiltuun sunis in goge; ⁸ yeroo aduun baatetti immoo Waaqayyo, qilleensi ba'a-biiftuu inni gubaan akka isatti qilleensa'u

in godhe; aduunis hamma Yoonas gaggabutti mataa isaa waraane; yommus inni, "Jiraachuu irra du'uu anaaf wayya" jedhee du'uu in hawwe*.

*⁸ 4:3

*⁹ 4:4

⁹ Waaqayyo ergasii Yoonasiiin, "Ati waa'ee biqiltuu sanaaf aaruun nan tolchitee?" jedhe; inni immoo, "Ani hamma du'aatti aaruuf iyyuu nan tolche" jedhee deebiseef*.

¹⁰ Waaqayyo garuu, "Ati biqiltuu waan tokko itti bin dabbaniif, isa hin guddisiniif, isa halkan tokkotti ba'ee halkanuma tokkotti immoo badeef in gaddita; ¹¹ mandara Nanawwee keessa namoota kumaatama dhibba tokkoo fi kuma digdama irra caalanii fi horii qe'ee baay'eetu jiraata; namoonni ishee keessa jiraatan sun warra bitaa fi mirga iyyuu gargar baasuu hin dandeenyee dha; egaa ani immoo mandara guddittii namoonni fi horiin hammasii keessa jiraatan kanaaf garaan ana hin jibbuu ree?" jedhe.

*⁹ 4:4

Macaafa Miikiyaas Raajichaa

Ittilin Lixa

1 ¹ Kun dubbii Waaqayyoo isa bara Yotaam, Ahaaz, Hisqiyaa is tarreetti Yihudaa irratti mo'anitti gara Miikiyaas nama mandara Mooresheet dhufee, mul'ata isa waa'ee Samaariyaa fi waa'ee Yersaalemiif itti mul'atee dha*.

*¹ Isa 1:1; Er 26:18; Hos 1:1

Firdiin Israa'elli Fi Yibudaatti Dhufuuf Akka Jiru Hlmuu Isaa

² Waaqayyo gooftaan mana qulqullummaa isaa keessaa isin irratti dhugaa in ba'a; sabni lafa irraa guutummaatti waan gooftichi jedhu haa dhaga'an!

Biyyi lafaa, warri isa keessa guutanis yaadaan haa qaban!

³ Ilaa! Waaqayyo iddoo jiruu in ba'a, gadiis in bu'a, lafa ol jedhaa gararraas in adeema*.

⁴ Tullooni akka gagaa ibiddi baqsuu isa jalatti in baqu, akka lafa bishaan irraan-gadee lola'u qotuutis dachaawwan in tatarsa'u*.

*²⁻³ Isa 26:21; Amo 4:13

*⁴ Far 97:5

⁵ Kun hundinuu immoo sababii irra-daddarbaa Yaaqoobiif sababii cubbuu mana Israa'elliif ta'e; Yaaqoob akka irra daddarbu eenyutu godhe? Samaariyaa dha mitii ree? Yihudaa keessatti iddoo itti waaqayyolii tolfamaniif

sagadan cenyum qopheesse?
Yerusaalem mitii ree*?

- ⁶ Kanaafis Waaqayyo,
"Ani mandara Samaariyaa
caccabsee lafatti nan dabala,
lafa muka waynii dhaabanis
isa nan godha;
dhagaa ijaarsa mana isheetii
dachaatti gad nan naqa,
bundee ishees bakkeetti nan
baasa.
⁷ Bifni fakkeenyaas isheen
waaqessitu
bundinuu in burreeffamu,
galchiin ishee keessatti argamu
bundinuus ibiddaan in gubama,
waaqayyoliin tolfamoon ishee
akka gatii dhaban nan godha,
wanti isheen waaqayyolii
isheetiif hojjechuuf
ejjaan argatte immoo deebi'ee
hojii ejjumaaf in ta'a" jedbe*.

*5 1Mot 16:24-26; 2Mot 23:13;
Er 23:13-14

*7 Hos 8:4; 13:2; 4:14

Rakkinni Waan Dbufuuf Jiruuf Boo'uu Isaa

- ⁸ Sababii kanaaf ani nan boo'a
nan wawwaadha,
miilla qullaa, uffata malees
nan adeema;
akka waangoo nan wawwaadha,
akka gubii goromtiis nan
boo'a*.
⁹ Madaan rukuttaa mandarattii
isa fayyu miti;
gara biyya Yibudaa dhufecra,
karra Yerusaalem
ishee kan saba kootii bira
iyyuu ga'eera.

*8 Iyo 30:29

- ¹⁰ Mandara Gaatitti kana hin
biminaal
Mandara Aakoo keessatti hin
boo'inaa!
Mandara Bet-Le'aafraatti
immoo
awwaara keessa gangaladhaa*!

¹¹ Isin warri mandara Sbaafiir
qullaa keessan yeellloodhaan
ba'aa!
Warri Zaanaan mandaraa
isaaniitii
gad hin ba'in!

- Boo'icbi mandara Bet-Ezel
achi isin hin dhaabachiisu;
¹² warri mandara Maaroot
wanta gaarii dhimmanii
eeggatu;
wanti bamaan immoo.
Waaqayyo biraa
balbala kellaa Yerusaalem
irratti
gad in dhufa.
¹³ Yaa warra mandara Laakiish,
teepha konkolaataa,
farda isa harkiautti hidhaa!
Irra-daddarbaan Israa'el keessatti
bojjetamaa ture
isin gidduutti argame;
warra Xiyoonis isintu
cubbuu hojjechuu jalqabsiise*.
¹⁴ Kanaafis isin
mandara Mooresheet-Gaati
gad in dhiiftu;
manneetiin mandara Akziib
mootota Israa'el in
gowwoomsan.

*10 2Sam 1:20

*13 Isa 2:7; 30:16

- ¹⁵ Isin yaa warra Mareshaa,
isa ammas dhufee
mandara keessan qabatu
Waaqayyo isinitti in fida;
Israa'el keessaa warri
ulfina qaban
gara Adulaam in dhufu*.
¹⁶ Gadda ijoollee warra
mararsiifattaniif
rifeensa mataa keessanii
murmuradhaa
yookiis mataa keessan
haaddadhaa!
Isaan isin duraa
waan booji'amaniif,
mataa keessan akka mataa
goggocoroo
isa rifeensi irra hin jirree
godhadhaa*!

*15 1Sam 22:1

*16 Er 7:29

Qooda Warra Namoota Cunqursanii

- ² Warra siree isaaniirra ciisanii
akeeka jal'inaa baasanii
hamaa qopheessaniif wayyoo!
Kana gochuudhaaf humni

- harka isaani keessa waan
jiruuf, yommuu lafti bari'u
isaan kana hojii irra in oolchu*.
² Isaan lafa namaa
isa kajeelan humnaan in qabatu;
mana namaa isa barbaadanis in
fudhatu;
nama tokko mana isaa wajjin,
isa kaanis dhaala isaa wajjin in
cunqursu.

*1 Far 36:4

- ³ Kanaafis Waaqayyo in dubbata,
"Ani dhaloota kana irratti
wanta hamaa nan yaada;
yeroo hamaan ta'uuf waan jiruuf,
isin morma keessan
isa jalaa baafachuu hin
dandeessan;
mataa irra-keessa qabattaniis
hin adeemtan.
⁴ Gaafas weedduu yaada gad fagoo
of keessaa qabu
isinitti in weeddisu,
boo'icha hadhaa'aadhaanis in
boo'u,
'Nuyi raawwannee diigamneerra,
Waaqayyo ga'aa saba keenyaa
in geddara;
attamitti nu harkaa baasa laata!
Inni lafa keenya
warra isa gananiif in hira' in
jedhu.
⁵ Kanaafis walga'ii goofichaa
keessatti,
nama muka buusuudhaan
lafa isiniif hiru
tokko illee hin argattan" in
jedha.

Waan Isaanitti Dhufu Raajii Dubbachuu Isaa

- ⁶ Isaan, "Hin lallabinaa!
Wanti akkasii waan lallabamu
miti!
Salphinnis nu irra hin ga'u*!
⁷ Yaa mana Yaaqoob,
wanti akkasii in jedhamaa ree?
Hafuurri Waaqayyoo obsa
dhabee ree?
Hojiin isaas kan akkasiitii ree?
Isa gara-qajeelinaan
deddeebi'uuf immoo dubbiin
isaa
waan gaarii hin godhufii ree?"
jedhanii in lallabu.

*6 Isa 30:10; Amo 7:16; 2:12

- ⁸ Waaqayyo immoo, "Isin garuu
akka diinaatti saba koo irratti
in kaatan,
warra duulaa deebi'anii 'Nagaa
dha'
jedhanii amanatanii
achiin darban irraas
wayyaa isaani
isa irra-keessatti uffatan
irraa in baafattan*.
⁹ Dubartoota saba koo mana
isaanii
isa isaanitti tolu
keessaa gad oftan;
simboo ani ijoollee isaaniiif
kennes
bara baraan irraa fudhattan*.
¹⁰ Xuraa'ummaan waan isa
balleessuuf,
badiisi gaddisiisaanis
waan isa mancaasuuf,
iddoon kun lafa
itti boqotan miti;
ka'aa asii adeemaa!" jedhe.
¹¹ Namni tokko dhufee qilleensa
keessaa fundhee
soba yoo dhageessise,
"Ani waa'ee daadhii waynii fi
waa'ee dhugaatii jabaa isinitti
nan lallaba"
yoo jedhes, saba kanaaf
isatu lallabaa dha*.

*8 Bau 22:25-26

*9 2Mot 4:1

*11 His 13:9-10; Er 6:13-14

Abdii Deebi'anii Dhaabamuu

- ¹² Waaqayyo, "Ani dhuguma
hunduma keessan
walitti nan sassaaba, yaa sanyii
Yaaqoob!
Saba Israa'el keessaas
warra hafan walitti nan qaba;
akka hoolotaa karra tokko keessaa
walii wajjin
isaan nan teessisa,
akka karra dheedicha irra jiruus
tuuti namootaa in huursu"
jedhe*.
¹³ Inni cabsee karaa banu
isaan dura in ba'a;
isaan cabsanii
balbala kellichaa keessa
darbanii jalaa in ba'u;
mootiin isaani darbee

isaan dura in adeema,
Waaqayyo isaan dura in bu'a*.

*12 His 34:15; 6:37-38; Er 31:10

*13 Isa 52:12

**Warra Jal'inaan Saba Gegeessan
Irratti Dubbachuu Isaa**

- 3 ¹ Yommu ani warra ijoollee
Yaaqoobiif
dura buutu ta'aniin,
warra mana Israa'el
gegeessaniinis,
"Mee dhaggeeffadhaa!
Wanta qajeelaa ta'ee fudhatame
beekuun isiniif hin ta'uu ree?
² Isin garuu wanta gaarii in jibbiru,
wanta hamaa immoo in
jaallattu;
namoota irraa gogaa isaanii,
lafee isaanii irraas foon isaanii
in qunciftu.
³ Foon saba kootii kan nyaatu,
gogaa isaanii kan irraa baasu,
lafee isaanii kan caccabsu,
akka nama foon
xuwweetti naquudhaaf
murmuruu,
huurootti naquudhaafis
kukutuu
kan godhu, isin!
⁴ Yeroon itti isin
gara Waaqayyooitti iyyitan in
dhufa,
inni garuu isiniif hin deebisu;
isin hamaa waan hojjettaniif,
inni yeroo sanatti
fuula isaa isin duraa in
dhoksa" nan jedhe*.
*1-4 2:1-3,8-9; 3:9-11; 6:12; Isa 1:17;
Far 14:4; 58:1-2; Fak 1:28; His 8:18
- ⁵ Raajooni warri saba koo karaa
irraa kaachisan,
waan nyaatan argannaan
"Nagaa dha" jedhanii in himu;
nama waa afaan hin keenyeen
immoo
"Lolatu ka'e" in jedhu;
Waaqayyo warra akkasii
kanaa*.
⁶ "Isin raajota kanatti
halkan isinitti in ta'a,
mul'ata hin argitan;
isinitti in dukkanaa'a,
hoodas hin dubbattan;
aduun isin duraa in lixxi,

guyyaanis isinitti in
dukkanaa'a.

- ⁷ Warri waan akka mul'ataa
argaa ruran in yeella'u,
warri hooda dubbachaa ruranis
in qaana'u;
Waaqayyo biraa deebiin waan
dhabameef,
bundumti isaanii mataa in
qabatu*.
⁸ Ani garuu Yaaqoobitti
irra-daddarbaa isaa,
Israa'elitti cubbuu isaa
himuudhaaf humna,
hafuura Waaqayyoo,
wanta dhugaa ta'e beekuu,
ija jabina guutuus argadheera*.
*5 Er 6:13-14
*6-7 Amo 8:11-12
*8 Isa 58:1
- ⁹ "Isin warri mana Yaaqoobiif
dura-buutu taatan,
warri mana Israa'el
gegeessitan kana
dhaggeeffadhaa!
Wanti qajeelaa ta'ee fudhatame
isin in jibbisisa,
wanta qajeelaa bundumaas in
jal'iftu.
¹⁰ Isin Xiyooniin dhiiga
dhangalaasuudhaan,
Yerusaaleminis jal'inaan in
ijaartu*.
¹¹ Warri dura-buutu isbee ta'an
gabbarsuu fudhatanii firdii in
kennu,
luboorni ishee gatii fudhatanii
nama in gorsu,
raajooni ishees horii fudhatanii
hooda in dubbatu;
kanuma irratti iyyuu,
'Waaqayyo nu gidduu jira mitii
ree?
Wanti hamaan nu hin argaru'
jedhanii ana Waaqayyoon in
abdatu" jedhe*.
¹² Ammas sababii keessaniif
Xiyoon lafa qotiisaa taatee in
qotanti,
Yerusaalem lafa nullaa dhagaa
caccabaa in taati,
tulluun manni qulqullummaa irra
jirus
lafa ol jedhaa
caakkaan fudhate in ta'a*.

*10 Amo 5:11-12; Anb 2:12

*11 Er 7:4,10; Amo 9:9-10; Mik 2:6-7

*12 Er 26:18; Far 79:1

**Mootummaan Gooftichaa Inni
Nagaan Dhufuuf Akka Jiru**
(Isa 2:2-4)

- 4 ¹ Bara booddeetti
tulluun manni Waaqayyoo irra
jiru,
tulloota bundumaa keessaa
akka isa caaluutti
jabaatee in dhaabata;
gaarota hundumaa gararraatti
ol in ka'a;
sabni hundinuus gara isaatti in
yaa'u.
² Sabni lafa irraas baay'atanii in
dhufu;
Xiyoon keessaa scerri,
Yerusaalem keessaas
dubbiin Waaqayyoo waan
ba'uuf,
"Karaa isaa akka inni nu
barsiisuuf,
nus daandii isaa irra akka
adeemnuuf,
kottaa gara tulluu mana
Waaqayyooitti,
gara mana Waaqayyoo isa kan
Yaaqoobitti
ol in baanaa!" in jedhu.
³ Inni saba baay'ee gidduutti
firdii in kenna,
saba jajjaboo fagoo jiraataniifis
murtoo in godha;
isaan billaa isaanii maarashaa,
eeboo isaanis isa ittiin muka
qeexxa'an
in tumsiifau;
egaa sabni sabarti billaa hin
luqqifatu,
isaan deebi'aniis lola hin
baran*.
⁴ Garuu isaan adduma addaan
muka waynii isaanii jala,
harbuu isaanii jalas in taa'u;
namni tokko illee isaan hin
sodaachisu;
isa kana immoo afaan
Waaqayyo
gooftaa maccaatu dubbate*.
*1-3 Isa 2:1-4
*4 1Mot 5:5; 2Mot 18:31; Zak 3:10
- ⁵ Sabni warri kaan hundinuu
adduma addaan

maqaa waaqayyolii isaanitiin
in deddeebi'u;
nuyi garuu yeroo hundumaa bara
baraan
maqaa Waaqayyo keenya
gooftichaatiin in
deddeebina.

**Sabni Israa'el Inni
Bittimfame Deebi'uu Isaa**

- ⁶ Waaqayyo, "Gaafas
ani warra hokkolan walitti nan
sassaaba,
warra bittimfaman,
warra ani hamaa irratti
hojjedhes walitti nan
qaba*.
⁷ Ani warra hokkolan,
warra hafanii qusataman,
warra achi fagaatanii turanis
saba jabaa nan godha;
tulluu Xiyoon irrattis, gaafasii
jalqabee
hamaa bara baraatti isaan
irratti nan mo'a"
jedhee dubbateera*.
*6 Er 31:8; His 34:12-16; Kes 30:4
*7 Isa 60:22; Far 48:2-3; 99:1-2
- ⁸ Ati immoo yaa riqaa eegduun
hoolotaa
irra ijaajjuu,
yaa tulluu mandara Xiyoon!
Akka duriitti mo'uun
harka keetti in deebi'a,
mootummaan mandara
Yerusaalem in dhufa.
- ⁹ Ammas mootiin si keessa hin jiru
moo?
Ati maaliif guddiftee iyyita?
Gorsiruum kee badnaan
akka dubartii da'uuf jettuu
ciniinsuun si argatee*?
¹⁰ Yaa mandara Xiyoon
ciniinsifadhu,
ijoollee kees of keessaa baasi!
Isinis ijoolleen ishee
amma mandara keessaa in
baatu,
biyya keessattis bakkee in
buufatu;
biyya Baabilon in dhaqxu;
achitti in ooltu,
achitti harka diinota keessanii
keessaa,

Waaqayyo isin in fura*.

*9 Er 8:19

*10 2Mot 24:15-16; 25:11

¹¹ Amma yeroo kanatti immoo sabni lafa irraa baay'een si irratti walitti in qabamu, "Isbeen haa xurooftu, nus Xiyoon akkas ta'uu ishee arguutti in gammanna" in jedhu.

¹² Garuu isaan yaada Waaqayyoo hin beekan, inni akka bissii oobdii irraatti akka walitti isaan qabes, akeeka isaa hin bubatan.

¹³ Ka'aa! Yaa ijoollee Xiyoon, siribsiisaa!
Ani gaanfa keessan sibiila, kottee keessanis sibiila.
boorrajii nan godha; isin saba baay'ee rukuttanii in burreessitu, waan isaan saaman Waaqayyoof, badhaadhummaa isaaniis gooftaa guutummaa biyya lafaatiif addaan in baafu*.

*11-13 Isa 17:12-14

Rakkina Ammaa Booddee Inni Oolchu Dbuuf Akka Jiru Dubbachuu Isaa

5 ¹ Nuyi amma marfamneerra, yaa warra mandara loltootaa, loltummaa keessaniin walitti qabamaa!

Warri nu marsan isa Israa'elin seerratu uleedhaan maddii isaa in rukutu*.

*1 Isa 1:8

² Ati immoo yaa mandara Betlibem-Efraataa, mandaroota Yihudaa warra gurguddoota keessaa ati ishee xinnoo dha; Israa'elin kan mo'u tokko si keessaa anaaf in ba'a; bundeen isa si keessaa ba'uuf jiruus kan bara durii durii bara baraa ti*.

³ Hamma bara isbeen isa da'uuf jirtu sun deessutti,

gooftichi waa'ee namoota sanaa in dhiisa; obboloota isa dhalatu sanaa keessaa warri hafan gara biyyaa, gara ijoollee Israa'elitti in deebi'u*.

⁴ Inni mo'u sun jabaatee in dhaabata, humna Waaqayyootiin, ulfina maqaa Waaqayyo gooftaa isaatiinis isaan in tiksa; guddinni isaa hamma andaara lafaatti in beekama; warri tika isaa jala jiranis nagaatti in jiraatu*.

⁵ Isumatu immoo nagaa isaanii ti; yommuu warri Asor biyya keenyatti darban, mana keenya warra jajjaboottis lixan,

nuyi geggeessituu torba, gurguddaa namaa saddeetis itti in kaafna*.

⁶ Isaan warra biyya Asor billaadhaan, warra biyya Naamrodos billaa luqqifamaadhaan in tiksu; inni sun immoo harka warra Asorii dhufanii biyya keenyatti darbanii lafa keenya irra ejjetanii, nu oolcha.

*2 1Sam 16:1,13; Isa 11:1; Er 23:5; Mat 2:4-6; Yoh 7:42

*3 Isa 7:14

*4 His 34:23

*5 Efe 2:14

Warri Hafan Saba Lafa Irraa Keessatti Humna Godhachuu Isaanii

⁷ Ijoollee Yaaqoob keessaa warri hafan saba baay'ee gidduutti akka fixeensa Waaqayyo biraa dhufuu, akka tiifuu biqiltuu irratti roobuus in ta'u; nama hin abdatan, ijoollee namaas bin eeggatan*.

⁸ Ijoollee Yaaqoob keessaa warri hafan namoota lafa irraa keessatti saba baay'ee gidduutti, akka leenca bineensa caakkaa gidduu jiruu ti; isaan akka leenca saafela

isa karra hoolotaa gidduu lixee qabee tatarsaasuu, isa namni afaan isaa keessaa oolchu hin jirrees in ta'u.

⁹ Harki keessan warra isin cunqursan irratti ol haa ka'u; diinonni keessan hundinuu lafa irraa haa balleeffaman!

*7 Far 110:3

Waaqayyo Saba Isaa Secca'uuf Akka Jiru

¹⁰ Waaqayyo, "Gaafas waanan godhu beeka! Fardeen kee si gidduudhaa nan balleessa, konkolaataa ati lolaaf qopheeffattes nan caccabsa;

¹¹ mandaroota biyya keetii lafa irraa nan balleessa, marsaa ati qabdu hundumaas lafatti nan dabala;

¹² qoricha ittiin nama doorsiftu si harkaa nan balleessa; moora-ilaaltuus deebitee hin qabaattu;

¹³ bifa fakkeenya kee, utuboota dhagaa ati jalatti hirreeffattus biyya kee keessaa nan balleessa;

ati wanta harka keetiin qopheessitetti deebitee hin sagaddu.

¹⁴ Mukkeetii ati qiqqirixxee waaqayyittii tolfamtuuf dhaabde si gidduudhaa nan bubuqqisa, mandaroota kees nan jijjigsa*.

¹⁵ Saba lafa irraa warra anaaf hin dhageeny hundumaa aariidhaa fi dheekkamsaan ijaa nan ba'a" jedhee dubbaterra.

*10-14 Isa 2:6-8; Zak 9:10; Isa 31:1-3; Zak 13:2

Hadheeffamuu Suba Israa'el

6 ¹ Ammas wanta Waaqayyo jedhu dhaga'aa! "Ka'ii, dhimma koo tulloota duratti dhi'eessi, gaaronnis sagalee kee haa dhaga'an!"

anaa jedhe*.

² Isin yaa tulloota nana, isinis hundeeffan lafaa warri bara baraan jiraattan, hadheessa Waaqayyo dhi'eessu dhaggeeffadhaa!

Waaqayyo saba isaa waan ittiin hadheessu qaba, Israa'elittis in falma.

*1 His 6:2

³ Waaqayyo, "Yaa saba ko, ani maalan si godhe? Maaliinan si dallansiise? Anatti himi*!"

⁴ Anoo biyya Gibxiitii sin baase, garbummaa jalaa sin fure; Museen, Aaronii fi Miiryaam akka si geggeessanii' isaan ergera*.

⁵ Yaa saba ko, wanta Balaq mootiin Mo'aab gochuuf korate, wanta Bala'aam

ilmi Be'or deebiseccis, hojii koo isa qajeelaa akka hubattuuf

iddoo 'Shiixiiim' jedhamuu hamma mandara Giilgalitti wanta ta'es yaadadhu!" jedhe*.

*3 Er 2:5

*4 Bau 20:2; 4:13-16; 15:20

*5 Lak 22:17-18; 23:7-8; 24:10; Iya 4:19

Wanta Waaqayyo Nema Irraa Barbaadu

⁶ Ani maal fudhadhee Waaqayyo duratti dhi'aadhu? Waaqayyo isa ol gararraa jiru durattis attamitti gugguufu?

Qalma gubamuu fi jabboota waggaa tokkoo fudhadhee

fuula isaa duratti dhi'aadhuu ree*?

⁷ Gooftichi korbeeyyii hoolaa kumatti, dhadhaa ejersaa akkuma bishaaniitti

lagoota kuma kudhan keessa yaa'utti in gammadaa ree?

Irra-daddarbaa koo fi ilma koo isa angafa, lubbuu koo oolfachuudhaafis

- dhala koo aarsaa cubbuu
godhee dhi'eessuu ree*?
- ⁸ Inni wanta gaarii ta'e sitti
bimeera.
Yaa namaa! Wanta qajeelaa
ta'ee fudhatame hojjechuu,
gaarummaa jaallachuu, gad of
deebiitees
Waaqayyo kee wajjin
deddeebi'uu malee,
gooftichi maal si irraa
barbaada ree*?
- ^{*6} Far 50:8-13; Amo 5:22
^{*7} Bau 22:29; His 20:25-26
^{*8} Kes 10:12; Hos 12:7; 1Sam 15:22
- ⁹ Sagaleetu dhaga'ama!
Waaqayyo mandaricha in
waama;
maqaa isaa sodaachuun
ogummaa dha,
kanaaf yaa gosaa,
yaa walga'ii mandarichaa
dhaga'aa!
- ¹⁰ Waaqayyo, "Qabeenyi gar-malee
walitti qabame,
qodaan safaraa gad deebi'aan
inni abaaramaanis
amma iyyuu mana warra
jal'ootaa keessa jiraa ree*?"
- ¹¹ Nama miijana jal'isuudhaan
dhagaa safaraas korjoo
keessaa fuudhee
waliin dha'udhaan hojjetu
calluma jedhee nan dhiisaa
ree*?
- ¹² Hojiin dureessota isbeetii
humnaan nama irratti
ka'udhaan guuteera,
warri achi keessa jiraatanis
soba in dubbatu,
arrabni isaaniis
haxxummaadhaan in
gowwoomsa*.
- ^{*10} Lew 19:35-36
^{*11} Fak 20:10
^{*12} 3:1-4
- ¹³ "Kanaafis ani rukutee' sin
dhukkubsachiisa,
sababii cubbuu keetiifis sin
onsa.
- ¹⁴ Ati in nyaatta garuu hin quufu,
garaan kee keessi amma iyyuu
in beela'a;
in dhokfatta, garuu siif hin oolu;
isa ati baqachiifattu immoo

- ani billaadhaaf nan kenna.
¹⁵ In facaafaa garuu hin galfattu,
dhadhaa ejersaa in baafatta,
garuu ofii hin dibattu;
ija waynii in cuunfatta,
garuu daadhii isaa bin dhugdu*;
¹⁶ ani akkan si onsuuf,
warra si keessa jiraatanis
ga'oof akkan godhuuf,
salphina saba koos akka
baattuuf,
ati waan bara mooticha
Omriitti amala ta'e,
wanta mana mooticha Ahaab
keessatti
hojjetamu hundumaa
eegdeetta" in jedha*.

^{*15} Kes 28:38-40; Amo 5:11-12; Sef 1:13
^{*16} 1Mot 16:23-33; Sef 2:15; Er 18:16

Biyya Badeef Boo'uu Isaa

- 7** ¹ Ani akka nama
erga iji mukaa ciramee
iji wayniis muramee booddee,
haftee barbaadatee dhabee
waanana ta'eef, anaaf wayyoo!
Ija waynii akkan hin nyaanneef
irratti hin hafne,
ija barbuu isa dura bilchaatu illee
garaan koo kajelee ture,
garuu irraa nan dhabe.
- ² Namni Waaqayyoof of kenne
lafa irraa badeera,
namni yaada qajeelaa qabus
isaan keessa hin jiru;
hundumti isaanii dhiiga namaa
dhangalaasuudbaaf
riphanii in eeggatu;
namni adduma addaan
kiyyootti wal in oofa*.
- ³ Harki isaanii waan bamaa
hojjechuu
ba'essa godhee beeka;
namni guddaan barka fuudhaa
in gaafata,
abbaan firdiis gabbarsuu
fudhachuudhaan
firdii in kenna;
inni dubbii in isaa dhaga'amuuf
akkuma garaan isaa barbaade
in dubbata,
isaan kun dubbii micciiranii
walitti in fidu.

^{*2} Far 12:1; 14:3; Er 5:1; Isa 57:1

- ⁴ Isaan keessaa inni hundumaa
caalaa
"Ba'eessa" jedhamu akka
qoraattii ti,
inni yaada qajeelaa "Qaba"
jedhamus
dallaa qoraattii caalaatti in
sodaachisa;
guyyaan adabamuu kee inni
warri ilaaltuun
si irratti dhufuu isaa argan
ga'eera;
walii wallaalchifamuun isaaniis
amma ta'uu isaa ti.
- ⁵ Hidhata keessan hin amaninaa;
fira isinitti dhi'aatus hin
amanatinaa;
haadha manaa kee ishee
ammatee ciiftutti iyyuu
waa himuu irraa of eeggadhu!
- ⁶ Ilmi "Joonja"aa dha"
jedhee abbaa isaa in tuffata,
intalli haadha ishee irratti,
haati manaa ilmaas
amaatii ishee irratti in kaati,
diinonni nama tokkoos
warra mana isaa keessaa in
ta'u*.
- ⁷ Ani garuu abdiidhaan
gara Waaqayyoo nan ilaala,
Waaqayyo koo isa ana fayyisu
nan eeggadha,
Waaqayyotu anaaf dhaga'a*.
^{*5-6} Er 9:3-4; Mat 10:35-36; Luq 12:53
^{*7} Isa 8:17; Anb 2:1
- Waaqayyo Deebisee Saba Isaa Ol
Qabunf Akka Jiru**
- ⁸ Ani kufcera garuu deebi'ee nan
ka'a,
dukkana keessa nan jiraadha;
Waaqayyo garuu ifa koo ti;
yaa diinota ko,
egaa anatti hin gammadinaa*!
- ⁹ Ani Waaqayyoon waanan yakkeef
hamma inni dubbii koo ilaalee
dhugaa koo anaaf baasutti
dheekkamsa isaa isa boba'aa nan
baadha;
inni gara ifaatti na baasa,
ani immoo qajeelina isaa
argee nan gammada*.
- ¹⁰ Diinonni koo warri,
"Waaqayyo gooftaan kee eessa
jira?"
anaa jedhan kana in argu,

yeelloonis isaan in qabata;
karaa keessattis akkuma kosiitti
dhidhiitamu isaanii arguutti
nan gammada*.

^{*8} Oba 12-13; Far 27:1

^{*9} Er 14:7

^{*10} Far 79:9-10

- ¹¹ Gaaf tokko masaraawwan kee
deebi'anii in ijaaramu;
gaafas daariin kee in bal'ata.
- ¹² Bara sanatti namoonni kee
warri biyya Asorii
hamma biyya Gibxiitti,
Gibxii hamma laga Efraaxiisitti,
galaanaa hamma galaanaatti,
tulluudhaa hamma tulluutti
tamsa'anii jiraatan
gara kee in dhufu.
- ¹³ Ija hojii hamaa warri isa irra
jiraatan
hojjetan irraa kan ka'e,
lafi in ona*.
^{*11-13} Isa 10:5-6; Nah 2:1-3:32

Gara Gaarlitti Deebi'udhaaf Waaqayyoon Kadhachuu Isaa

- ¹⁴ Saba kee, warra hoolota
dhuunfaa kee godhatte,
ulee keetiin tiksii!
Isaan lafa gaggaarii
isa naannoo isaanii jiru
dhabanii,
caakkaa keessa kophaatti in
jiraatu;
akka bara duriitti biyya
Baasbaanii fi
Giil'aad keessa akka dheedan
godbi*!
- ¹⁵ Akkuma bara biyya Gibxiitii
isaan baafte sanaatti
dinqii nutti argisiisi*!
- ¹⁶ Sabni lafa irraa kana arganii,
humna isaanii hundumaa
keessaa immoo in
yeellaasifamu,
afaan isaanii in qabatu,
gurri isaanii in duuda.
- ¹⁷ Isaan akka bofaa,
akka warra lafa munyuuqaniis
biyyoo in araabu, rom'aas
iddoo cufatanii taa'an keessaa in
ba'u;
si sodaachuu irraa kan ka'e
rifatanii gara kee,

gara Waaqayyo gooftaa
keenyaatti
gara in galu*.

*14 Er 50:19; Far 74:1

*15 Bau 14:5-31

*17 Uma 3:14; Isa 2:19,21; Far 72:9

¹⁶ Yaa Waaqayyo, kan akka kee
cubbuu namaaf dhiisu eenyu
ree?

Ati dbuunfaa kee kan ta'an
keessaa warra hafaniif
balleessaa isaanii irra in
darbitaaf;

ati gaarummaatti in gammadda
malee,
dheekkamsa keessa hin ooltu*.

¹⁹ Ati deebitee araara.

nutti in argisiifta;
yakka keenya miilla kee jalatti
in gatta,

cubbuu keenya hundumaas
galaana gad fagoo keessa in
buufta.

²⁰ Ati akkuma bara duriitti abboota
keenyaaf kakattetti,

ijoollee Yaaqoobitti
amanamummaa

kan Abrahaamittiis
gaarummaa in argisiifta*.

*18 Er 50:20; Far 103:8-12; Bau 34:6

*20 Uma 22:16-18; 28:13-15; Luq 1:73-74

Macaafa Naahom Raajichaa

Waaqayyo Nanawweetti Dheekkamnu Isaa

1 ¹ Mul'anni waa'ee Nanawweetiif
Naahom Elqosbichatti mul'ate
macaafa kana keessatti
caafamee jira*.

*1 Yon 1:1-2; Isa 10:5-19

² Waaqayyo hinaafaa dha,
gootaa ijaa baafatu dhas;
Waaqayyo ijaa in baafata,
dheekkamsi isaas sodaachisaa
dha;

Waaqayyo warra isaan morman
irratti

ijaa in baafata,
dheekkamsi isaas baruma baraan
dijibota isaa irratti in hafa.

³ Waaqayyo aangoo guddaa qaba,
dheekkamuuf bin ariifatu;
isa yakke immoo adabuu hin
dhiisu;

inni qilleensa bubbisuu fi
bubbee humna-qabeessa keessa in
adeema,

duumessoonnis awwaara miilla
isaatii ti*;

⁴ inni galaana ifatee in gogsa,
lagoonni hundumuus
akka gogan in godha;

Baashaanii fi Qarmelos in
coollagu,
daraaraan Liibaanonis in harca'a*.

⁵ Fuula isaa duraa tulloonna in
raafamu,

gaaronnis in baqu;
lafti, biyyi lafaa,
wanti ishee keessa jiraatu
hundumuus,

fuula isaa duraa in bollatu*.

⁶ Dheekkamsa isaa dura
eenyutu dhaabachuu danda'a?
Aarii isaa isa sodaachisaa duras
eenyutu ijaajja?

Dheekkamsi isaa akka ibiddaa in
boba'a,

kattaawwanis fuula isaa duraa
in caccabu.

*2-3 Bau 20:5-6; 34:6-7; Kes 4:24

*4 Far 106:9; Amo 1:2

*5 Far 18:7; 97:4-5

⁷ Waaqayyo gaarii dha,
yeroo rakkinaatiis iddoo baqaa ti,
warra isa amanatanis beeka*;

*Nanawwee garuu tinfa lolaatiin
raawwatee in balleessa,
diinota isaas ari'ee
dukkanatti in galcha.

⁹ Isaan Waaqayyo irratti maal
koratu?

Inni raawwatee isaan in
balleessa;
egaa rakkinni deebi'ee bin
argamu.

¹⁰ Isaan akka qoraattiitti wal
xaxanii,
dhugaatii isaaniitiinis
machaa'anii,
akka cidii gogaatti in gubatu.

¹¹ Yaa Nanawwe, inni Waaqayyo
irratti koratu,
inni wanta jal'aa mari'atus si
keessaa ka'e*.

*7 Far 18:2

*11 2Mot 19:35-36

¹² Waaqayyo gooftaan, "Isaan
humna guutuu
yoo qabaatan, baay'ee yoo
ta'anis,

duguugamanii in balleeffamu;
yaa Yihudaa, ani kanaan dura
si dhiphiseera yoon ta'e iyyuu,
si'acbi deebi'ee si bin dhiphisu;

¹³ egaa ani waanjoos isaanii
gurmuu kee irraa nan cabsa,
hudhaa isaas si irraa nan cira"
jedhe*.

*13 Isa 9:4

¹⁴ Yaa Nanawwe, Waaqayyo,
"Mana waaqayyolii keetii
keessaa

bifa qirixamaa fi
waaqayyolii baqfamanii

bojjetaman
dijgee nan balleessa;
ati jibbisiiisaa waan taateef,
akka ati awwaalantu nan
godha;

si'achi immoo sanyiin maqaa kec
waamsisu

siif hin dhalatin!" jedhe;
Waaqayyo waa'ee keetiif jedhee
murtoo kana dabarseera.

¹⁵ Yaa Yihudaa, gara ergamaa
isa tulloota irratti misraachoo
himuu,

gara isa nagaa labsuus ilaali!
Ayyaannan kee ayyaanefadhu,
wareega kee raawwadhu!
Warri bamoonna raawwatanii
waan balleeffamaniiif,

si'achi deebi'anii si hin
balleessan*.

*15 Isa 52:7

Nanawween Kufuu Ishee

2 ¹ Yaa Nanawwe, inni rukutee
si caccabsu sitti in dhufa,
masaraa irra eegduu dhaabi,
karaas eegsis!
Mudhii kee jabeeffadhu,
bumna waraanaa kees
cimsii qopheeffadhu*!

*1 Yoe 3:9

² Warri saamtuun sanyii Yaaqoob
saamanii,
waynii isaanii yoo duraa
balleessan iyyuu,

Waaqayyo akkuma isaanii duriitti
Israa'eliif ulfina in deebisa*.

*2 Er 48:11; 2Mot 18:13,17

³ Loltoonni diinaa
uffata dbiilgee uffatu,
gaachanni loltoota isaa warra
jajjaboo diimaa dha;
sibiilli konkolaattota isaatii,
yeroo qopheeffamee ba'u
akka arraba ibiddaa in ifa,
eeboon isaas in mirmirfama.

⁴ Konkolaattonni ija mataa hin
qabneen
karaa irra asii fi acbi in fiigu,
waltajjii karaa irras
gara fuula duraa fi
dugda duubaatti in kaatu;
bifni isaanii guca boba'u in
fakkaata,
akka bakakkaas asii fi achi in
darbatamu.

⁵ Diinni loltoota isaa warra
ulfina-qabeeyyii in waama,
isaan karaa isaanii irratti in
gufatu,

gara dallaa mandarattiittis
ariitiidhaan in fiigu,
da'oonis iddoo isaatti in
qopheeffama;

⁶ karri lagichaa caccabee baamaa
in ta'a,
manni mootummichaas buursee
in jiga;

⁷ mootittiin qullaatti haftee
booji'amtee in adeemti;
xomboreewwan ishee

qoma isaanii rurrukutatani,
akka gugee in guungumu.

⁸ Nanawween akka kuufama
bishaanii ti,
akkuma bishaan kuufamicha
keessaa
yaa'ee sokku,
namoonni ishee ishee keessaa
yaa'anii in sokku.
"Dhaabadhu! Dhaabadhu!"
yommuu ittiin jedhanis,
tokko illee kan deebi'u hin jiru.

⁹ Wanti achi keessa jiru,
badhaadhummaan gombisaa
ishee keessaas

dhumma hin qabuutii,
egaa meeticha saamaa,
warqichas saamaa!
¹⁰ Isheen saamamtee onteetti,
duwwaatti hafteettis;
sodaatee lapheen dha'ateera;
jilbis raafameera,
dhagni in hollata,
fuulli hundinuus in geddarama*.

*¹⁰ Isa 13:7-8

¹¹ Iddoon leenconni
keessa dhokatan meerree?
Lafti isaan ilmoolee isaanii
itti sooran,
iddoon leenci kormaanii fi
leenci dhalaan dhaqaa turan,
lafti ilmooleen leencaa
bir'aa malee taa'aa turanis
meerree?

¹² Leencichi nyaata ilmoolee isaatiif
hamma ga'u ajjeeseera,
leenca dhaltuu ishee kan isaatiifis
hamma ga'u qabeera;
boolla isaa wanta ajjeeseen,
iddoo dhokannaa isaas
wanta qabeen guuteera.

¹³ Waaqayyo gooftaan maccaa,
"Kunoo, ani siin nan morma;
konkolaataa kee aaraan nan guba,
ilmoolee leencaa kees
billaan in fixa;
ani wanta ati qabatee nyaattu
lafa irraa raawwadhee nan
balleessa,
sagaleen ergamoota keetiis
deebi'ee hin dhaga'amu"
jedhee dubbateera.

Nanawweedhaaf Boo'uu Isaa

3 ¹ Mandara dhiiga namaa
dhangalaaftuuf,
mandara sobduuf,
ishee waa butattuuf,
ishee saamichattii hin
deebineefis wayyoo*!

² Sagaleen qaccee qu'aafamuu,
sagaleen geengoowwan
achi keessa naanna'anii,
kaacbuun fardeenii,
gugugsaan konkolaattotaas
ishee keessaa in dhaga'ama.

³ Abboonni fardeenii billaa isaanii
isa balaqqisuu fi
eeboo isaanii isa calaqqisu in
mirmirsu;
namoonni baay'een rukutamarii
in dhumu,
reeffi nama lakkoobsa hin
qabnees in tuulama,
namoonnis reeffa tuulame
sana in gufatu.

⁴ Kun sababii baay'ina ejjummaa
isheen ejjituun,
isheen miidhagduun giiftiin
qoricha namatti gootu,
saba lafa irraa ejja isheetiin,
qoricha namatti gochuu
isheetiinis gurgurteef ta'e*.

*¹ His 24:6,9

*⁴ Isa 23:16; Mul 17:1-2

⁵ Waaqayyo gooftaan maccaa,
"Kunoo, ani siin nan morma;
uffata kee mataa keetti
ol nan garagalcha,
sabni lafa irraa qullaa kee,
mootummoonnis salphina kee
akka argan nan godha" jedhe*.

⁶ Itti fufees,
"Ani dhoqqee sitti nan
dhooba,
sin tuffadhas,
akka namni sitti yaa'ee
si ilaalus nan godha.

⁷ Warri si argan hundinuu, si
baqatanii,
'Nanawween onteetti,
eenyutu isbeedhaaf boo'a?' in
jedhu;
egaa nama si jajjabeessu
eessaan siif arga ree?" jedhe.

*⁵ Isa 47:3

⁸ Ati mandara Tebes!
ishee laga Abbayyaa biraa,
ishee bishaan itti naanna'ee jiru
sana caaltee ree?
Lagichi da'oo ishee ti,
bishaan immoo dallaa ishee ti*.

⁹ Kuushii fi Gibxi
jabina daarii hin qabne in
ta'aniif;
Fuxii fi Liibiyaanis
gargaartota ishee turan*.

¹⁰ Garuu namoonni ishee
booji'amarii in adeeman,
golee karaa hundumaa irrattis
ijjooleen ishee in bubburuqfaman;
namoota ishee warra
ulfina-qabeeyyii irratti
muka buufatan;
gurguddoonni ishee hundinuu
funyoo sibiilaatiin in
hidhaman*.

¹¹ Yaa Nanawwe, atis akkuma
isaanii
in machoofta, in dhokattas,
diina duraa miliquudhaaf
iddoo baqaa in barbaaddatta*;
¹² masaraan kee hundinuu
akka muka barbuu,
isa iji isaa, inni duraa
bilchaatee
yommuu namni isa raasu,
afaan isa nyaatuu keessatti
harca'uu ti.

¹³ Kunoo, loltoonni kee hundinuu
akka dubartootaa in ta'u,
balballi kellaa biyya keetiis
diinota keef bal'atee in banama,
danqaraa isaas ibiddi in fixa*.

*⁸ Er 46:25-28; His 30:13-16

*⁹ His 30:5

*¹⁰ Yoe 3:3

*¹¹ Er 25:15

*¹³ Er 51:30

¹⁴ Marfamuudhaaf waan jettuuf
bishaan waraabbadhu!
Masaraa kee jabeeffadhu!
Suphee kutii bukeessi!
Xuuphii jabeessii tolfadhu!

¹⁵ Yommuu achitti ibiddi si fixa,
billaan gad si cira,
ibiddi akkuma qorophisa xaph
godhu,
akkasuma gubee si in fixa;
ati akka gurmuu hawaannisaa fi
akka qorophisaa
baay'achuma baay'adhu*!

¹⁶ Ati naggaadota kee urjoota
waaqa keessaa
caalaatti baay'ifatteetta,
isaan garuu biyyicha qullaatti
hambisanii,
akka hawaannisa balali'uutti
keessaa ba'anii in sokku*.
¹⁷ Gurguddoonni kee akka
hawaannisaa ti,
angafoonni loltoota keetii
akka gurmuu hawaannisaa
isa yeroo dhaamochaatti keenyan
irra qubatee,
yeroo aduun baatu immoo
baalleedhaan ka'ee sokkuu,
iddoo inni dhaqus
namni tokko illee hin beeknee ti.

*¹⁵ Yoe 1:4

*¹⁶ Isa 47:15

¹⁸ Yaa mootii Asor!
Eegdonni biyya keetii in mugu,
gurguddoonni biyya keetiis in
boqotu;
sabni kee tulloota irra in
tamsa'an,
namni walitti isaan sassaabus
tokko illee hin jiru*.

¹⁹ Caba kee namni dhidhiibu hin
jiru,
madaan kees
isa fayyuu danda'u miti;
namni oduu kee dhaga'u
hundinuu,
kufaatii keetiif gammadee
harka walitti in rurrukutata;
baay'inni gara-jabina keetii
kan itti hin dhaga'amin jiraa
ree?

*¹⁸ 1Mot 22:17

Aubaaqom Waa'ee Firdii Jal'atee Dubbacbuu Isaa

1 ¹ Dubbiin mul'ata Anbaaqom kanatti fufee jira.

² Ani Anbaaqom, "Yaa Waaqayyo! Hamma yoomiittan gargaarsaaf gara keetti iyya?

Atis hamma yoomiitti hin dbageessu?

Hamma yoomiitti anis gara keetti wawwaadha?

Atis hamma yoomiitti warra bumnaan nama irratti ka'an jalaa nu hin nalchin?

³ Balleessuu fi humnaan nama irratti ka'uu waanan arguuf, gargar ba'uunii fi lolli ka'aa waan jiraniif, maaliif wanta jal'aa na argisiifta?

Maaliifis yommuu namni gad nama qabu cal jettee ilaalta?

⁴ Kanaafis abboomiin gatii dhabe, firdii qajeelaan jiruu irra nalu dide, warri jal'oonnis warra qajeelota danganii, firdii in jal'isiisan!" nan jedhe*.

*2-4 Mik 3:1-4

Waaqayyo Deebii Kennuu Isaa

⁵ Waaqayyo immoo deebisee, "Ani bara keessan keessa wanta yoo isiniitti bimame iyyuu isin amanuu hin dandeenye waanan godhuuf, mee saba warra kaan ilaalaa, baay'isaa dinqisiifadhaas*!"

⁶ Kunoo, ani warra Kaldootaa saba hamootaa fi jal'oota, warra lafa nama irraa fudhachuudhaaf, biyya hundumaa keessa yaa'an nan kaasa*;

⁷ isaan saba sodaacbisoo fi naasisoo dha; firdii ofuma isaaniitiif in baafatu,

ulfinas ofii isaaniitiif in kennu. ⁸ Fardeen isaanii qeerransa caalaa collee dha;

yeeyyii galgalaa caalaas in sodaacbisu;

abboonni fardeenii, fardeen isaaniittin in dha'atu, akka joobira wanta nyaatu irratti lafa dha'nutti, fagoodhaa ka'anii fiigaa in dhufu*;

⁹ hundumti isaanii bumnaan nama irratti ka'uudhaaf in dhufu, gara ba'a-biiftuntti fuula qajeelfatanii jiru;

boojun isaaniis akka cirracba galaana qarqaraa in baay'ata.

¹⁰ Moototatti in ga'isu, warra biyya bulbanitti in kolfu,

mandaroota masaraa qaban bundumaatti in qoosu, koobii itti ijaarannii lixanii isaan in qabatu;

¹¹ garuu warri yakkannii humna isaanii Waaqayyo isaanii godhatan kun, ergasii achii ka'anii akka qilleensaatti fiiganiin in sokku" jedhe*.

*5 HoE 13:41

*6 2Mot 24:1-2,10; 25:1

*8 Kes 28:49; Sef 3:3

*11 Isa 10:13

¹² Ani Anbaaqom immoo, "Yaa Waaqayyo, ati kan durii durii ti, mitii ree? Yaa Waaqayyo ko, yaa isa qulqulluu, ati hin duutu; ati kattaa keenya! Isaan kana firdiif kaafte, adabaafis isaan dhaabde*!"

¹³ Ati baay'ee qulqulluu waan taateef,

jal'ina hojjetamuu fi cunqurfamuu namaa cal jettee ilaaluu hin dandeesu erga ta'ee,

yoos maaliif warra gantoota cal jettee ilaalta ree?

Maaliifis yommuu warri hamoonni, warra isaan caalaa qajeelota ta'an balleessan calluma jetta ree*?

¹⁴ Ati namoota akka qurxummii galaana keessaa, akka uumama galaana keessa ajajjuu malee munyuuqaniis gooteetta.

¹⁵ Warri Kaldootaa kun, akka qurxummiitti qonyeedhaan qabanii acbi keessaa isaan in baasu; kiyyoo isaaniittin isaan in harkisu; kiyyoo isa ittiin harkisan keessattis

walitti isaan in qabu, gammadaniis in ililchu;

¹⁶ isaan kiyyoo isaaniitiif kiyyoo isaanii isa ittiin harkisaniin qannootti waan jiraataniif, nyaata fo'amaas waan nyaataniif, isaan mi'a isaanii kanaaf aarsaa in dhi'eessu, ixaanas in aarsuuf.

¹⁷ Egaa isaan ittuma fufanii, billaa isaaniitiin saba lafa irraa oo'a malee gad ciranii haa balleessanii ree?" nan jedhe.

*12 Isa 10:5-6; Er 10:24

*13 Far 5:4-6

Si'a Lammaffaa Waaqayyo Deebii Keenuufil Isaa

2 ¹ Ani iddoo dhaabatanii eegan irra dhaabadhee nan eega, koobii sana irras nan ijaajja; kunoo, dubbii inni anatti dubbatu nan dhaga'a, wanta ani isa komadheefis waan inni deebisu nan ilaala*.

*1 Mik 7:7; Isa 21:8

² Yommuu Waaqayyo anaaf deebisee,

"Mul'ata argite kana, akka namni rakkina malee dubbisu danda'utti, mul'isii gabatee irratti caafi*!"

³ Mul'anni kun yeroo itti raawwatamuun isaaf ta'u in eega,

waa'ee guyyaa booddee in dubbata, garuu soba miti; yoo lafa irra barkifame iyyuu isa eeggadhu!

Inni dhuguma in dhufa, hin nirus" jedhe*.

⁴ Kunoo, namni afuufamu nama yaada qajeelaa miti, namni qajeelaan garuu amantii isaatiin in jiraata*.

*2 Isa 8:1; 30:8; Mul 1:11,19

*3 His 12:23; 2Phe 3:9

*4 His 18:5-9; Rom 1:17; Gal 3:11; Ibr 10:38

⁵ Namni daadhii wayniitiin mo'amee of tuulu in gowwoomfama, inni albaadhessa akka boollaa fi akka du'aa,

isa saba lafa irraa bundumaa walitti qabatu, isa namoota hundumaas ofitti sassaabbatuu ti; inni gonkumaa hin quufu, na ga'as hin jedhu.

⁶ Hundumti isaanii isatti ga'isanii, isatti kolfaa isatti mammaakanii, "Yaa nama qabeenya namaa battee nullattuu, borii jal'inaatiinis sooromtuu, siif wayyoo!

Kun bamma yoomiitti itti fufa?

⁷ "Warri gatii si irraa qaban dingata sitti hin ka'anii ree? Isaan sitti dammaqanii si hin dhiphisanii ree?

Atis barka isaanii keessa hin galnuu ree?

⁸ Ati saba baay'ee waan saamteef, sabni warri hafan immoo si saamu;

ati dhiiga namaa dhangalaafteetta, biyya baay'ee, mandarootaa fi wanta isaan keessa jiran hundumaas balleessiteetta*.

⁹ Yaa nama bu'aa jal'inaatiin mana kee ijaarrattuu, diina jalaa ba'uudhaafis lafa itti galuu iddoo ol ka'aa irratti tolfattuu, siif wayyoo*!

- ⁸ Ati namoota baay'ee
balleessuudhaaf koracbuu
keetiin,
mana kee irratti salpbina
fiddeetta,
of irrattis cubbuu hojjetta.
¹¹ Kanaafis dhagaan keenyan
manichaa in iyya,
mukti manichi ittiin ijaarames
jalaa in qaba*.

*7-8 Isa 33:1

*9 Oba 4

*11 Luq 19:40

- ¹² "Yaa nama dhiiga
dhangalaasuudhaan
manneeti ijaartuu,
jal'inaanis mandara gurguddaa
cimsitee dhaabbatuu, siif
wayyoo*!
¹³ Waaqayyo gooftaan maccaa,
dadhabbiin namootaa akka
qoraan ibiddatti nam'uu,
dhama'uan saba lafa irraas
akkasumaan
akka ta'u murtoo hin goonee ree*?
¹⁴ Akkuma galaanni bishaaniin
guutamuu,
akkasuma lafti
ulfina Waaqayyoo
beekuudhaan in guutamti*.
¹⁵ Yaa nama qullaa fira keetii
ilaaluudhaaf jettee,
hamma inni macbaa'utti
daadbii waynii isa obaafuu,
siif wayyoo!
¹⁶ Ati ulfina utuu bin ta'in,
yeelloo in quufta;
yommuu darabeen kee ga'u,
dheekkamsa harka Waaqayyoon
keessaa sitti dhufu
dhugdee in gatantarta,
ulfinni kees yeellootti in
diddiirama*.
¹⁷ Ati dhiiga namaa dhangalaaftee,
biyya balleessitee,
mandarootaa fi
wanta isaan keessa jiraatan
waan barbadeessiteef,
inni ati Liibaanon irratti
humnaan kaale
sitti gara in gala;
isa bineensota caakkaa
balleessiteefis
naasuun si qabata*.

*12 Er 22:13; Mik 3:10

*13 Er 51:58

*14 Isa 11:9

*15-16 Er 25:15,26

*17 Isa 14:8; 37:24-25

- ¹⁸ "Bifni Waaqayyo tolfamaa,
inni namni muka irraa qirixee
tolche
maal waa'ee baasa?
Inni namni baqsee tolchee,
ittiin soba nama barsiisus
maal gatii qaba?
Waaqayyo tolfamaan
inni dubbacbuu hin dandeenye kun,
namichi isa tolche
akka isa amanatuuf
waa goobuufii hin danda'u*.
¹⁹ Warqee fi meetiin
yoo isaanitti uffifame iyyuu,
isaan lubbuu hin qaban waan
ta'eef,
yaa nama mukaan 'Ka'ii,
sokoksi!
yookiis dhagaa lubbuu hin
qabneen,
'Dammaqii, ka'ii!' jettuu,
siif wayyoo*!
²⁰ Waaqayyo garuu mana
qulqullummaa isaa
keessa jira,
lafti guutummaatti isa duratti
calluma baa jedhu!" in jedbu*.

*18 Isa 44:10-20

*19 Far 115:4-8

*20 Far 11:4; 76:8

Kadhata Anbaaqom

- 3** ¹ Kadhanni Anbaaqom raajichi
qooqa gaddaatiin kadhate
kanatti fufee jira.
² Ani Anbaaqom, "Yaa Waaqayyo!
Gocha beekamaa ati goote
dhaga'eera.
Yaa gooftaa! Gocbaa kee kana
yommuun dhaga'u
sodaacbuutu anatti dhufa;
mee bara keenya kanatti wanta
akkasii deebisii hojjedhu,
yeroo keenya kanattis
akka isaan beekaman godhi!
Yoo aarte iyyuu araara keetiin
nu yaadadhu!" nan jedhe.
³ Waaqayyo inni qulqulluun biyya
Temaanii,
tulluu Pbaaraan irraa in dhufa;
surraan isaa bantiwwan waaqaa,

- galanni isaas biyya lafaa irra
in guuta*;
⁴ ifni ulfina isaatiis
akka ifa aduu ti,
harka isaa isa humni isaa
keessa dhokatee jiru keessaa
balaqqeessi as in ba'a;
⁵ dha'icha of dura in erga,
dugda isaa duubaan immoo
dhukkuba nama fixutu dhufa.
⁶ Yommuu dhaabatu lafa in
rom'isiisa,
mil'uu ija isaatiinis
saba lafa irraa in bollachiisa;
tulloonni durii durii
caccabaniin in burraa'u,
gaaronni dur turanis
lafatti in dabalamu;
karaan inni irra adeemu garuu
bara baraan in jiraata*.
⁷ Warri Kushaan rakkina keessa
akka jiran,
biyyi Miidiyaanis
akka rom'ite nan arga.
*3 Kes 33:2
*6 Far 68:8-9; 104:32; Isa 17:12-14
⁸ Yaa Waaqayyo! Ati lagootatti in
aartee?
Burqootattis in dheekkamtee?
Yommuu fardeen kee yaabbatte,
konkolaataa mo'umsa kee irras
teeesse,
galaanotatti in aartee?
⁹ Ati iddaa kee luqqifatee
xiyya baay'ee in qopbeeffatte;
lafas lagootaan in tatarsaafte;
¹⁰ tulloonni si arganii in hollattan,
bokkaa yandoon in roobe,
tuujjubnis huursee,
dha'aan isaa ol in ka'e*.
*10 Far 77:16
¹¹ Yommuu xiyyi kee isaanitti calaqqisee
eeboon kee isaanitti ifu,
aduunii fi ji'i
calluma jedhanii
iddoo isaanii in dhaabatan*.
¹² Ati dheekkamsaan lafa irra in
adeemta,
aariidhaanis saba lafa irraa in
dhidhiitta;
¹³ aii saba kee fayyisuudhaaf gad in
baata,
isa dibame sanas
oolchuuf in dhufata;
dura-butuu warra jal'ootaa
lafatti in rukutta,
mataadhaa bamma miillaatti
qullaatti in hambifta*.
¹⁴ Yommuu loltoonni isaa
gargar nu facaasuudhaaf,
warra rakkatoota dhokatanii
jiranis
fixuudhaaf burmaan ka'anitti,
ati eeboodhuma isaatiin
dura-butuu isaanii in waraanta.
¹⁵ Ati fardeen keetiin
bishaan guddaa hoomacheessaa,
galaana keessa karaa in baafatte.
*11 Iya 10:13
*13 Far 18:15
¹⁶ Kana dhaga'uu irraa kan ka'e
garaan koo in raafama,
sodaachuu irraa kan ka'e
hidhiin koo in bollata,
lafeen koo in bututa,
miilli koos in gatantara;
haa ta'u iyyuu malee,
rakkina Waaqayyo warra nu
dhiphisan irratti
fiduuf jiru sana
arguudhaaf calluma jedhee nan
eggadha*;
¹⁷ mukti harbuu yoo daraaruu
dhaabaate iyyuu,
mukti waynii, mukti ejersaas
yoo ija godhachuu dhaabaatan
iyyuu,
maasiin midhaan yoo baasuu
dhaabaate iyyuu,
hoolonni goorantoo keessa,
saawwanis dallaa keessa
yoo jiraachuu dhaabaatan iyyuu,
¹⁸ ani Waaqayyotti nan ililcha,
Waaqayyo isa na fayyisutti nan
gammada*;
¹⁹ Waaqayyo gooftaan jabina koo ti,
inni akka borofaa
collee akkan ta'u in godha,
iddoo ol ka'aa irras
ana in dhaabachiisa*.
(Geggeessituu warra
faarfattootaaf; mi'a isa
ribuu qabuun kan
faarfatamu*.)
*16 Isa 21:3-4; Anb 2:3
*18 Isa 61:10
*19 Far 18:33

Yihudaa Irratti Firdiin Akka Dhufu Himuu Isaa

1 Kun dubbii Waaqayyoo isa bara Yosiyas ifmi Amoon mootii Yihudaa ture gara Sefaaniyaa ilma Kuu-shii, ilma Gedaalayaa, ilma Amaariyaa, ilma Hisqiyaa dhufee dha*.

2 Waaqayyoo, "Ani wanta hundumaa lafa irraa haxaa'ee nan balleessa;

3 nama, horiis haxaa'ee nan balleessa;

allaattii qilleensa keessa balali'u,

qurxummii galaanaas haxaa'ee nan balleessa;

yommuu ani nama lafa irraa balleessu,

warri hamoonni

akka tuullaa kosii in ta'u;

kana ana Waaqayyotu dubbate*.

*1 2Mot 22:1; Er 1:2

*2-3 Uma 6:5-7

4 Ani Yihudaa irratti, Yerusaalem keessa warra jiraatan hundumaa irrattis,

harka koo ol nan fudhadha;

hambaa warra Ba'aaliif hojjetanii,

warra waaqayyolii tolfamoodhaaf sagadanis

luboota isaanii wajjin achi keessaa raawwadhee nan balleessa*;

5 warra bantii manaa irratti macca waaqa keessaatiif qoomma'anii sagadan,

warra maqaa Miilkom Waaqayyoo tolfamaatiin kakachaa,

ana Waaqayyooqis qoomma'anii sagadan*;

6 warra ana Waaqayyoo duukaa bu'uu

dhiisanii garagalan,

warra ana hin barbaaddanne, ana hin kadhannes raawwadhee nan balleessa" jedhe.

7 Guyyaan Waaqayyoo dhi'aateeraatii

Waaqayyoo gooftaa duratti calluma jedhaa!

Waaqayyoo wanta aarsaa ta'u qopheesseera,

warra waames qulqulleesseera*.

8 Waaqayyoo, "Guyyaa aarsaa sanatti

ani Waaqayyoo gurguddootaa fi ilmaan mootichaa akkasumas

warra uffata ormaa uffatan hundumaa nan adaba.

9 Warra buusaa balbalichaa irra utaalaa hundumaa,

warra nama irratti ka'uudhaan, nama gowwoomsuudhaanis

galma waaqayyolii isaanii guutan hundumaa

guyyaa sanatti nan adaba" jedha.

*4 2Mot 21:3-7; 23:4-7

*5 Er 19:13; 2Mot 23:13

*7 Isa 34:5-8; Er 46:10; Anb 2:20

10 Waaqayyoo, "Guyyaa sanatti, karra qurxummii duraa, iyyatu,

kutaa mandarichaa isa lammaffaa keessaa, wawwaannaatu,

gaara irraa immoo sagalee wanta diigamee kukkufu

guddaatu dhaga'ama.

11 Isin warri dachaa mandarichaa keessa jirtan,

naggaadonni keessan hundinuu raawwatanii waan

balleeffamaniif, warri meetiidhaan nagadan

hundinuu waan barbadeeffamaniif

wawwaadhaa!

12 Guyyaa sanatti ani Yerusaalemin fonqolchee ibsaadhaan nan

ilaala, namoota ishee warra akka

daadhii waynii isa siicoo irratti hafee ta'an,

warra of irraa bu'anii, "Waaqayyoo wanta gaarii

yookiis hamaa hin hojjetu" jedhanii yaadan nan adaba*.

13 Badhaadhummaan isaanii in saamama,

manneetiin isaanii in ona; mana in ijaarratu,

garuu keessa hin jiraatan; muka waynii in dhaabbatu,

garuu daadhii waynii isaa

hin dhugan" jedha*.

*12 Er 5:12-13

*13 Amo 5:11-12; Kes 28:39

Guyyaan Waaqayyoo Inni Guddaan Akka Dhufu Himuu Isaa

14 Guyyaan Waaqayyoo inni guddaan dhi'aateera,

dhi'aateera, dafees in dhufa;

guyyaa Waaqayyoo sanatti loltoonni jajjaboonni iyyuu

sodaatanii iyya jabaa in iyyu*.

15 Guyyaan sun guyyaa dheekkamsaa ti,

guyyaa dhiphinaatii fi guyyaa gidiraa ti;

guyyaa rakkinaatii fi guyyaa badiisaa ti;

guyyaa dimimmisaatii fi guyyaa dukkanaa ti;

guyyaa duumessaatii fi guyyaa dukkanaa limixii ti*;

16 guyyaan sun guyyaa fiinoo fi iyyi lolaa

mandaroota kellaa dhagaa qabanii fi

masaraa ol ka'oo irratti dhaga'amu dha.

*14 Yoe 1:15

*15 Er 30:7

17 Waaqayyoo, "Ani namoota irratti rakkina nan fida,

isaan ana Waaqayyoon waan yakkaniif,

akka namoota jaamotaatti in deddeebi'u;

dhiigni isaanii akka awwaaraatti gad in nam'a,

reeffi isaanii akka kosiitti in gatama" jedha.

18 Guyyaa dheekkamsa Waaqayyoo sanatti meetiin isaanii

yookiis warqeen isaanii isaan oolchuu hin danda'u;

warra lafa irra jiraatan hundumaatti

dingata lafa irraa balleeffamuu waan fiduuf,

biyyi lafaa guutummaatti ibidda dheekkamsa isaatiin in

dhuma*.

*18 His 7:19

Gara Waaqayyootti Akka Deebi'anii Waamuu Isaa

2 ¹ Isin yaa saba hin yeellaanee nana,

walitti qabamaa, walitti sassaabamaa!

² Guyyichi jedhame sun utuu hin ga'in,

akka habaqii qilleensi fuudhee adeemuuttis

utuu hin darbin, dheekkamsi Waaqayyoo inni

boba'aan utuu isiniitti hin dhufin,

guyyaan dheekkamsa Waaqayyoo sun

utuu isiniitti hin dhufin walitti qabamaa*!

³ Isin warri gad deebi'oon biyyicha keessa jiraattan,

warri isa duratti wanta qajeelaa ta'e hojjetan

hundinuu Waaqayyoon barbaaddadhaa!

Guyyaa dheekkamsa isaa sanatti inni isiu golboobee

isin in oolcha ta'a, isin immoo qajeelinaa fi

garraamummaa barbaaddadhaa*!

*2 1:14-18

*3 Amo 5:15; Yoe 2:12; Yon 3:8-9

Saboota Naannoo Israa'elitti Faraduu Isaa

4 Mandarri Gaazaa in dhiifama, Ashqalonis in ona;

Ashdood keessaa guyyaa saafaa namoonni oofamanii in ba'u,

Eqroon immoo hundeedhaan in buqqa'a.

5 Yaa warra galaana qarqara jiraattanii,

yaa saba Keret isiniif wayyoo! Yaa Kana'aan biyya

Filisxeemotaa, "Ani isin nan balleessa,

namni tokko iyyuu hin hafu" kan jedhu,

dubbiin Waaqayyoo isin irratti dubbatameera.

6 Biyyi galaana qarqara iddoon warri Keret jiraatan;

iddoo horii dheechifatanii fi

"Yaa Yerusaleem hin sodaatin, harki kees lawwaasa'ee kan gad rarra'u bin ta'in!
 17 Waaqayyo gooftaan kee sii wajjin jira, inni oolchuudhaaf aango-qabeessa; inni of irraa bu'ee sitti in gammada, jaalala isaatiin gabii siif in kenna; akka warra guyyaa ayyaana beekamaatti gammadanii, sitti gammaduu isaas sagalee isaa ol fuudhee in dhageessisa" in jedhu*.
 18 Waaqayyo ammas, "Ani iyya isaanii, wawwaannaa isaanii, yeelloo isa akka ba'aa isaanitti ulfaates isaan irraa nan kaasa*.
 19 Kunoo, ani guyyaa sanatti warra isin cunqursan hundumaa nan adaba,

warra naafa nan fura, warra tamsa'anis walitti nan qaba;
 warri guutummaa biyya lafaa keessatti yeellaasifaman, ulfinaa fi jajamuu akka argatan nan godhe*.
 20 Yeroo sanatti ani walitti isin qabee, biyyatti isin nan galcha; yeroo sanatti warra isin duraa booji'aman, utuu isio ilaaltanii isiniif nan deebisa; ani saba lafa irraa hundumaa gidduutti, ulfinaa fi jajamuu akka argattan nan godha" jedha; kana Waaqayyotu dubbate*.
 *14 Isa 12:6; Zak 2:10; 9:9
 *16-17 Isa 62:4,12; 65:19; Er 32:41
 *18 Far 137:1
 *19 Isa 11:11-12; His 34:11-16
 *20 2:7; Er 29:13-14

Macaafa Haagee Raajichaa

Mana Qulqullummaa Deebisanii Akka Ijaaranii Waamuu Isaa

1 Daariyos biyya Faares irratti mo'ee waggaa lammaffaatti, waggicha keessaa ji'a ja'ffaatti, ji'icha keessaa guyyaa tokkoffaatti, dubbiin Waaqayyoo karaa Haagee raajichaa gara Zarubaabel ilma She'altii'el isa biyya Yihudaa bulchuu akkasumas gara Iyaasuu angafa lubootaa ilma Yozaadaaq in dhufe*; 2 Waaqayyo gooftaan maccaa, "Sabni kun, 'Yeroon manni qulqullummaa Waaqayyoofti itti ijaaramu hin geenye' in jedhu" jedhe.
 *1 Zak 1:1; Iz 4:24-5:2; Hag 1:12; 2:2,21; Iz 2:2; Zak 4:6; Mat 1:13

3 Yommuu dubbiin Waaqayyoo karaa Haagee raajichaa dhufee, 4 "Yaa saba ko, manni qulqullummaa koo kun diigamee utuu jiruu isin ofii keessanii mana ba'eessa ta'ee ijaarama keessa taa'uun yeroo isaa tii ree?" jedhe*.

5 Waaqayyo gooftaan maccaa, "Mee, wanta isin irra ga'aa jiru ilaala! 6 Baay'ee facaafuu, muraasa galfattu; in nyaattu, garuu beela hin baatan; in dhugdu, garuu hin quuffan; in uffattu, garuu isinitti hin bo'u; namni qacaramee hojjetus mindaa argatu korojoo tarsa'aa keessa in kaa'ata" jedha*.
 *4 2Sam 7:2
 *6 2:16; Kes 28:38

7 Waaqayyo gooftaan maccaa, "Mee, kun maaliif akka isin irra ga'ee ilaala! 8 Amma gara tulluutti ol ba'aa muka fidaatii, mana qulqullummaa koo ijaaraa! Yommuu ani isatti nan gammada, ittis nan galateeffama. 9 Isin baay'ee galfanna jettanii abdattan; garuu muraasa galfattan; wanta isin galfattan sanas ani afuufee nan balleesse; maaliifan kana godhe? Manni qulqullummaa koo diigamee utuu jiruu isin immoo adduma addaan waa'ee mana

keessaniitiif asti fi achi waan fiigdaaniif kun ta'e. 10 Sababii keessaniifi waaqni fixeensa in dhowwata, laftis midhaan hin baasu*; 11 ani lafa irratti, tulloota irratti, midhaan irratti, muka waynii irratti, muka ejersaa irratti, waanuma lafti biqilechu irratti, nama irratti, horii irratti, wanta harki keessan hojjete hundumaa irrattis gogii nan fida" jedhe*.
 *10 1Mot 17:1
 *11 2:17; Yoe 1:17-20; Ama 4:9

12 Ergasii Zarubaabel ilma She'altii'el, Iyaasuu angafni lubaa, ilma Yozaadaaq, saba keessaa warri hafan hundinuu Waaqayyo raajicha waan ergeef, sagalee Waaqayyo gooftaa isaanitiif, ergaa Haagee raajichi isaanitti hime sanaafis in abboomaman; jarris Waaqayyoon in sodaatan. 13 Kanaaf Haageen inni Waaqayyo erge sun, ergaa kanatti fufee jiru sabatti in hime.

Waaqayyo, "Ani isinii wajjinan jira" jedhee dubbateera*. 14 Ergasii Waaqayyo bafuura Zarubaabel ilma She'altii'el isa Yihudaa bulchuu, hafuura Iyaasuu ilma Yozaadaaq isa angafa lubaa turee fi hafuura saba warra bafan hundumaa in dammaqse; yommuu isaan dhufanii hojii mana qulqullummaa Waaqayyo isaanii isa kan Waaqayyo gooftaa maccaa sana hojjechuu in jalqaban. 15 Kun immoo Daariyos mo'ee waggaa lammaffaa isaatti, waggicha keessaa, ji'a ja'ffaatti, ji'icha keessaas guyyaa digdamii afuraffaatti ta'e.
 *13 Isa 41:10

Waa'ee Ulfina Manicha Isa Haaraa Dubbaebun Isaa

2 Ji'a torbaffaatti, ji'icha keessaa guyyaa digdamii tokkoffaatti dubbiin Waaqayyoo ammas karaa Haagee raajichaa dhufee, 2 "Zarubaabel ilma She'altii'el isa Yihudaa bulbutti, Iyaasuu angafa lubaa ilma Yozaadaaqitti, saba warra hafanittis dubbadhu, gaaffii kanas isaan gaafadhu*! 3 Isaaniinis, 'Isin keessaa namni manni kun dur attam ulfina-qabeessa akka ture yaadatu jiraa? Amma immoo inni maal fakkaata? Inni akkuma waan bin jirree ti mitii ree?' jedhi*! 4 Amma garuu yaa Zarubaabel, yaa Iyaasuu angafa lubaa

ilma Yozaadaaq, jabaadhaa! Isin, sabni biyyicha keessa jirtan hundinuu ani isinii wajjinan jira, jabaadhaatii hojjedhaa! 5 Kakuun ani Biyya Gibxii yommuun isin baasee, 'Hafuurri koo isin gidduu in jiraataatii isin hin sodaati-naa!' jedhee isiniif kakadhe isa kana*.
 *2 1:1
 *3 Iz 3:12
 *4-5 Zak 4:6; Bau 20:2; 19:5; 29:45-46

6 "Ani Waaqayyo gooftaan maccaa, ammas immoo yeroo gabaabaatti bantiwwan waaqaa, lafa, galaana, lafa gogaas nan sochoosa*; 7 saba lafa irraa hundumaa nan sochoosa, badhaadhummaan saba lafa irraa hundinuu as in fidama; ani mana kana ulfinaan nan guuta; kana ana Waaqayyo gooftaa maccaatu dubbate*. 8 Meetichi kan koo ti, warqichis kan koo ti; kana ana Waaqayyo gooftaa maccaatu dubbate. 9 'Ulfinni mana isa ammaa kanaa ulfina mana isa durii irra in caala; ani iddoo kanatti nagaa nan kenna' jedha Waaqayyo gooftaan maccaa, jedhiitti itti humi!" jedhe; kana Waaqayyo gooftaa maccaatu dubbate*.
 *6 Ibr 12:26
 *7 Isa 60:6-7,13
 *9 1Mot 7:13-51; Zak 1:17

Mana Qulqullummaa Deebisanii Ijaaruudbaan Eebiffamuu Isaanii

10 Daariyos mo'ee waggaa lammaffaatti, waggicha keessaa ji'a salgaffaatti, ji'icha keessaa guyyaa digdamii afuraffaatti, dubbiin Waaqayyoo ammas gara Haagee raajichaa dhufee*, 11 "Waaqayyo gooftaan maccaa, 'Mee wanta seerri jedhu luboota gaafadhaa! 12 Namni tokko foon addaan baafame fiixee uffata isaatiitti baatee utuu adeemuu, fiixeen uffatachaa buddeenichatti yookiis ittootti yoo bu'e yookiis daadhii waynii yookiis dhadhaa ejersaa yookiis waan nyaatamu tokko yoo tuqe, wanti sun kanaan qulqulluu in ta'aa ree?' jedha" jedhe.

Luboannis deebisanii "Lakkii" jedhan*. 13 Yommuu Haageen, "Namni reeffatti bu'e tokko, nyaata kana keessaa tokkotti yoo bu'e nyaatichi in xuraa'aa ree?" jedhee in gaafate; luboannis deebisanii, "Eyyee, in xuraa'a!" jedhan*. 14 Kana irratti Haageen, "Sabni kun, namoonni kunis ana

duratti akkasuma wanti isaan barka isaaniitiin hojjetan, wanti isaan iddoo sanatti dhi'eessanis akkasuma xuraa'aa dha; kana Waaqayyotu dubbate* jedhe*.

*10 1:1; 2:1

*12 Lak 18:8-10

*13 Lew 5:2; Lak 19:11,22

*14 Iz 4:1-3

15 Waaqayyo, "Mana qulqullummaa dhagaadhaan ijaaruu utuu hin jalqabin waan ta'aa ture ba'eessa godhaatii yaadadhaa! 16 Yeroo sana namni, 'Guuboo digdama nan argadha' jedhee gara tuullaa midhaanii dhaqu, guuboo kudhan duwwaa in argata; yommuu inni, 'Liitrii dhibba laman argadha' jedhee gara qodaa waynii itti cuunfanii dhaqu, liitrii saddeettama duwwaa in argata; 17 ani Waaqayyo isinin, wanta isin itti dadhabdani harka keessaniin hojjetan bundumaa gogiidhaan, waagiidhaan, cabbidhaanis nan rukute; garuu isin amma illee gara kootti hin deebine. 18 Egaa guyyaa bar'aatii jalqabee gara fuula duraatti ji'a salgaaffaa, ji'icha keessaa guyyaa digdamii afuraaffaa, guyyaa hundeen mana qulqullummaa itti kaa'ame kana garaatti qabadhaa! 19 Sanyiin gombisaa

keessa bin jiru yoo ta'e iyyuu, mukti waynii, mukti harbuu, mukti rumaanii fi mukti ejersaa ija bin godhanne yoo ta'e iyyuu, ani har'aa jalqabee isin nan eebbisa* jedha*.

*15-19 1:5-11; Zak 8:9-13; Amo 4:9;

Hag 1:11; Iz 3:10

Zarubaabellif Abdii Kennuu Isaa

20 Ammas dubbiin Waaqayyoo ji'icha keessaa guyyaa digdamii afuraaffaatti si'a lammaffaa gara Haagee raajichaa dhufee, 21 "Zarubaabel isa Yihudaa bulchutti dubbadhuutii, Waaqayyo, 'Ani Waaqayyo waaqaa fi lafa nan sochoosa*, 22 teessoo mootummootaa gara nan galcha, humaa mootummootaa saba lafa irraas nan balleessa, konkolaataa isaani fi abboota fardeenii isaanii garan gaggalcha, fardeenii fi abbootni fardeenii adda addaan billaa walii walii isaaniitiin in dhumu*. 23 Guyyaa sanatti ani Waaqayyo gooftaan maccaa, si garbicha koo Zarubaabel ilma She'altii'el si fo'adhee akka amartii mallattoo kootti sin godhadha' jedha" jedhe; kana Waaqayyo gooftaa* dubbate*.

*21 2:6; Ibr 12:26

*22 Bau 15:1; Abo 7:21-22

*23 Zak 3:8; 6:12-13; Er 22:24

Macaafa Zakaariyaas Raajichaa

Sabni Israa'el Gara Waaqayyooti Akka Deebi'uuf Waamamu Isaa

1 Daariyos mo'ee waggaa lammaffaa isaatti, waggichattiis ji'a saddeettaffaatti dubbiin Waaqayyoo gara Zakaariyaas raajichaa ilma Baraakiyaa akaakayyuu Iddoo dhufee*, 2 "Waaqayyo, abboota keessanitti baay'ee aareera" jedhe.

*1 Iz 5:1; Hag 1:1

3 Kanaaf Waaqayyo gooftaan maccaa, ati saba kanatti, "Waaqayyo gooftaan maccaa, 'Gara kootti deebi'aa! Anis gara keessanitti nan deebi'a' jedhe" jedhii himi! Kana ana Waaqayyo gooftaa maccaatu dubbate*. 4 Isin akka ab-

boota keessan warra dur raajonni, "Waaqayyo gooftaan maccaa, 'Karaa keessan isa jal'aa irraa, hojii keessan isa bamaa irraas deebi'aa! jedha' jedhanii utuma isaanitti bimanii, isaan anaaf dhaga'uu, anaaf abboomamuus dhiisan sanaa bin ta'inaa! Kana ana Waaqayyotu dubbate*; 5 abbootni keessan amma cessa jiru? Raajounis bara baraan in jiraatuu ree? 6 Garuu dubbiin koo fi seerranni koo warri ani garboota koo warra raajota abboomee ajaje, abboota keessan irratti hin raawwatamnee ree? Ergasiis isaan gara kootti deebi'anii- Waaqayyo gooftaan maccaa, akkuma dur murtoo godheeturetti nuuf kennu jedhan" jedhe.

*3 Mil 3:7; Yaq 4:8

*4 Er 3:12; His 33:11

Raajicbi Mul'ata Arguu Isaa

7 Daariyos mo'ee waggaa lammaffaa isaatti, waggichattii ji'a kudha tokkoffaa isa "Sbebaax" jedhamutti; ji'ichattiiis guyyaa digdamii afuraaffaatti, dubbiin Waaqayyoo gara Zakaariyaas raajichaa ilma Baraakiyaa akaakayyuu Iddoo in dhufe.

8 Ani Zakaariyaas halkan mul'ataan nama farda diimaa yaabbatee taa'u tokko nan arge; inni mukkeetii baala lalisaa qaban gidduu dachaa keessa in dhaabata ture; isa duuba immoo fardeen diddiimoo, boorrii fi adiitu ture*. 9 Yommuu ani, "Yaa gooftaa ko, fardeen kun maali?" jedheen gaafadhe; ergamaan inni anatti dubbachaa ture immoo, "Maal akka isaan ta'an ani sitti nan mul'isa" jedhe: 10 Namichi inni mukkeetii baala lalisaa qaban gidduu dhaabatu sunis deebisee, "Isaan warra Waaqayyo biyya keessa asii fi achi akka adeemaniif ergee dha" jedhe; 11 isaan immoo ergamaa Waaqayyoo isa mukkeetii baala lalisaa qaban gidduu ijaajju sanaan, "Nuyi biyya lafaa bundumaa keessa adeemneerra, kunoo, biyyi lafaa guutummaatti nagaa fi boqonnaatti akka jiru argineerra" jedhan.

*8 6:1-8

12 Ammas ergamaan Waaqayyoo deebisee, "Yaa Waaqayyo gooftaa maccaa! Hamaa yoomiitti mandara Yerusaalemii fi mandaroota Yibudaa warra waggaa torbaatama itti dheekkamte kanaaf araara hin deebiftu ree?" jedhe*. 13 Waaqayyo yommuu ergamaa isa anatti dubbachaa ture sanatti dubbii gaggaarii fi dubbii jajjabinaa in dubbate. 14 Ergasii immoo ergamaan inni anatti dubbachaa ture sun dubbii isa Waaqayyo gooftaan maccaa, "Ani mandara koo Yerusaalemiif, Xiyooniifis baay'ee hinaafeera; 15 ani saba kootti xinnoo ishee aareen ture; saba warra nagaatti jirra of se'anitti garuu guddaa aareera; isaan immoo ituma dabalani wanta hamaa in bojjetan*. 16 Egaa ani araaraan gara Yerusaalemitti nan deebi'a; manni koos achitti deebifamee in ijaarama; funyoon safaraas Yerusaalem irratti in diriifama;

kana ana Waaqayyo gooftaa maccaatu dubbate. 17 'Si'acbi mandarooni koo wanta gaariidhaan in guntu; ani Waaqayyo gooftaan maccaa ammas Xiyooniin nan jajjabeesa, Yerusaalemis nan fo'adha' jedhee dubbateera" jedhee iyyee akkan labsuuf anatti in bime*.

*12 Far 102:13; Dan 9:2

*13 Isa 47:6

*17 Isa 40:1-2

Mul'ata Isa Lammaffaa

18 Ammas ani yommuun ol ilaale, kunoo, gaanfota afur nan arge; 19 ani ergamaa isa anaa wajjin dubbachaa jiru sanaan, "Isaan kun maali?" nan jedhe; innis, "Isaan kun gaanfota warra Yihudaa, Israa'elii fi Yerusaalemis bittimsanii dha" jedhee anaaf in deebise. 20 Kana booddee immoo Waaqayyo namoota sibiila tuman afur anatti in argisiise. 21 Anis, "Jarreen kun immoo maal bojjechuudhaaf dhufu?" nan jedhe; inni immoo deebisee, "Isaan gaanfota warra akka namni tokko illee mataa isaa ol bin qabannetti namoota Yihudaa bittimsanii dha; jarri sihiila tuman sun immoo warra gaanfa saba warra kaanii, warra biyya Yibudaa irratti ka'anii saba isaas bittimsuu barbaadan sana sodaachisuudhaaf gaanfota isaaniis cabsuudhaaf dhufanii dha" jedhe.

Mul'ata Isa Sadaffaa

2 Ammas yommuun ol ilaale, kunoo, nama funyoo safaraa barkatti baatee dhaabatu tokko nan arge; 2 yeroo sanatti ani, "Eessa dhaqaa?" jedhee isa nan gaafadhe; inni immoo deebisee, "Yerusaalem hammam akka bal'atuun fi bammam akka dheeratu safaree ilaaluudhaafan dhaqa" naan jedhe. 3 Ergamaan inni anaa wajjin dubbachaa ture sun yommuu gad ba'e; ergamaan tokko isatti dhufee, "Fiigiitti dargaggeessicha sanaan, 'Yerusaalem sababii namoonni baay'eenii fi horii baay'een ishee keessa jiraataniif mandara dalaa dhagaa itti hin ijaaramne in taati. 4 Ani Waaqayyo ofii kootii naannoo isheetti dallaa ibiddaa isbeedhaaf nan ta'a, ishee keessattis ulfinaaf nan ta'aaf' jedha Waaqayyo" jedhiin*!

*5 His 40:3

Warril Booji'aman Biyyatti Akka Galaniif Waamuu Isaa

6 Waaqayyo, "Ani akka qilleensa golee waaqaa arfaniitti isin tamsaasee kanan ture, ba'aa! Biyya gara bitaatii ba'aa kottaa! ⁷Yaa namoota Xiyoona biyya Baabilon keessaa ba'aatii of oolchaa! ⁸Namni isin tuqu agartuu ija kootii tuqa" jedha; kana Waaqayyotu dubbate; Waaqayyo gooftaan maccaa, "Uffina anaaf kennee saba warra isin saamanitti na ergera; ⁹kunoo, ani harka koo isaan irratti ol nan fudhadha, hojjetoonni isaanis akka isaan saaman nan godha; yommuu Waaqayyo gooftaan maccaa akka ana erge isin in beektu" jedhe*.

*9 9:8

10 Waaqayyo, "Isin yaa namoota Xiyoona, kunoo ani dhufee isin gidduu nan jiraadhaatii gammadaa, ililchaas!" jedha. ¹¹Guyyaa sanatti sabni baay'een gara Waaqayyoo dhufanii saba isaa in ta'u; innis isaan gidduu in jiraata; yommuu Waaqayyo gooftaan maccaa isinitti akka ana erge isin in beektu. ¹²Waaqayyo yommuu biyya isa qulqullaa'aa keessaa Yibudaa dhuunfaa isaa in godhata; Yersaaleminis deebi'ee in fo'ata. ¹³Inni iddoo jireenya isaa isa qulqullaa'aadhaa waan ka'eef, foon-qabeessi hundinuu isa duratti calluma haa jedhu*!

*13 Anb 2:20

Mul'ata Isa Afuraffaa

3 ¹Yeroo kan biraa immoo Iyaasuun angafni lubaa ergamaa Waaqayyoo dura utuu dhaabatuu, Seexanni immoo isa hammeessuudhaaf gara mirgaa isaa dhaabachaa umu jiruu inni anatti in argiise*; ²yommuu ergamichi [Waaqayyoo] Seexanaan, "Waaqayyo si haa ifatu Seexana nana! Waaqayyo inni Yersaalemin fo'ate si haa ifatu! Namichi kun akka mukukkula ibidda boba'aa jiru keessaa butamee ti mitii ree?" jedhe*.

*1 Hag 1:1; Mul 12:10

*2 Yih 9

3 Yeroo sanatti Iyaasuun uffata xuraa'aa uffatee ergamicha dura in dhaabata ture. ⁴Ergamaan sun warra isa dura dhaabatan sanaan, "Uffata isa xuraa'aa sana isa irraa baasaa!" jedhe; Iyaasuudhaan immoo, "Kunoo, ani

yakka kee si irraa fuudheera, uffata cidhaa immoo sitti nan uffisa" jedhe*.

*4 Isa 6:7; 61:3

5 Ergasiis, "Marata qulqullaa'aa mataa isaatti maraa!" nan jedhe; isaanis utuu ergamaan Waaqayyoo achi dhaabachaa jiruu, maraticha mataa isaatti maranii uffata isatti in uffisaan*. ⁶Ergamaan Waaqayyoo immoo wanta kanatti fufee jiru Iyaasuun in abdachiise; ⁷Waaqayyo gooftaan maccaa, "Ati karaa koo irra yoo deddeebite, wanta ani si aboomes yoo eegde, mana koo in bulchita, oobdii mana kootii irratti gaafatamaa in taata, warra as dhaabachaa jiran kana gidduus akka jaalfattetti akka ati deddeebitu nan godha. ⁸Yaa Iyaasuun angafa lubaa, mee dhaga'! Hidhanni kee warri sii wajjin as jiranis haa dhaga'an! Isin milikkita wanta dhufuuf jiruu ti; kunoo, dameen Daawit, garbichi koo akka dhufu nan godha"; ⁹kunoo, dhagaa isa ani Iyaasuun dura kaa'e tokko irra ija ijoo bishaanii torbatu jira, ani dhagicha irratti caaffata, "Ani guyyaa tokkotti biyya kana irraa yakka ishee nan fuudha" jedhu nan caafa" jedhe*. ¹⁰Waaqayyo gooftaan maccaa, "Guyyaa sanattis tokkon tokkon namaa muka waynii isaa fi muka harbuu isaa jala taa'uuudhaaf ollaa isaa in waama" jedha; kana Waaqayyo gooftaan maccaatu dubbate*.

*5 Bau 28:39

*8 Isa 11:1; Er 23:5

*9 4:10; Mul 5:6

*10 1Mot 5:5; Mik 4:4

Mul'ata Isa Shanaffaa

4 ¹Kana booddee ergamichi inni anaa wajjin dubbachaa ture sun deebi'ee dhufee, akka nama hirribaa nama dammaqsuutti na dammaqsee*, ²"Maal argita?" jedhee ana in gaafate.

Ani immoo deebisee, "Hundumti isaa baattuu ibsaa warqee irraa hojjetame tokko, cuggeen tokkos isa irra dhaabamee, cuggicha irra immoo ibsaan torba tokkon tokkon isaa, arraba torba kan qabu dhaabamee nan arga; ³mukti ejersaa lamas inni tokko cuggicha bukkee gara mirgaatiin, inni lamaffaan immoo gara bitaatiin dhaabatee nan arge" nan jedhe.

*1 1:9; Er 1:11-13; Amo 8:2; Bau 25:31-40

4 Ergasii immoo ergamicha isa anatti dubbachaa ture sana, "Isaan kun

Mul'ata Isa Ja'affaa

maal yaa gooftaa?" jedhee nan gaafadhe. ⁵Innis, "Isaan kun maal akka ta'an hin beektuu ree?" jedhee ana in gaafate; ani immoo, "Hin beeku yaa gooftaa ko" jedhee nan deebiseef. ⁶Yommuu ergamichi, ergaa isa Waaqayyo biraa dhufee Zarubabelitti akka anii dubbadhuuf anatti in hime; ergichis, "Hafuura kootiin malee humnaan miti, aangoodhaanis miti" kan jedhu ture; kana Waaqayyo gooftaan maccaatu dubbate.

⁷Yaa tulluu humna-qabeessa nana! Ati maali? Ati Zarubabel duratti lafa wal qixxee in taata; yommuu inni dhagaa isa ittiin ijaaranii xumuran lafaa ol fuudhu, "Attam gaarii dha! Attam gaarii dha!" jedhanii namoonni in iyyu*.

*7 Hag 2:4-5

8 Ammas dubbiin Waaqayyoo gara koo dhufee, ⁹"Zarubabel hundee mana qulqullummaa kanaa harka isaatiin kaa'eera, harka isaatiinis hojjetee isa in raawwata; yommuu Waaqayyo gooftaan maccaa isinitti akka na erge isin in beektu*.

10 Warri gaafa wanta xinnoo argan tuffatan, dhagaa fo'amaa harka Zarubabel keessatti yommuu argan immoo in gammadu; isaan torban kun ija Waaqayyoo warra biyya lafaa hundummaa irra asii fi achi ilaalanii dha" jedhe*.

*9 Iz 3:8

*10 3:9

11 Ani ammas, "Mukti ejersaa lamaan warri gara mirgaa fi gara bitaa baattuu ibsaa jiran kun maali?" jedhee ergamicha nan gaafadhe. ¹²Lamaffaa, "Dameen muka ejersaa lamaan, warri hujummo warqee lamaan bukkeedhaa dhadhaa ejersaa isa akka warqee yaasan sun immoo maali?" jedhee nan gaafadhe. ¹³Inni immoo deebisee, "Isaan kun maal akka ta'an ati hin beektuu ree?" naan jedhe; ani garuu, "Yaa gooftaa ko, hin beeku" nan jedhe. ¹⁴Kana irratti inni immoo, "Isaan kun lamaan warra Waaqayyo gooftaa biyya lafaatiif hojjechuudhaaf dibamanii dha" jedhe*.

*14 6:5; Bau 29:7; 1Sam 16:12-13

⁵Ani ammas yommuun ilaale, kunoo, macaafni maramu tokko utuu balali'uu nan arge; ²ergamichi immoo, "Inni ati argitu kun maali?" jedhee na gaafate; ani immoo, "Macaafni maramu dheerinni isaa dhundhuma digdama, bal'inni isaa dhundhuma kudhan ta'e tokko utuu balali'uu nan arga" jedhee nan deebiseef. ³Inni immoo, "Kun abaarsa isa guutummaa biyya lafaatti dhufuu dha; cinaacha caaffatchaa isa gar tokko irratti, 'Namni hatu hundinuu raawwatee in bada'; cinaacha caaffatchaa isa gara kaanii irratti immoo 'Namni sobaan kakatu hundinuu raawwatee in bada' kan jedhutu jira". ⁴Waaqayyo gooftaan maccaa, 'Ani abaarsa nan erga; inni mana isa hatu sanaa, mana isa maqaa kootiin sobee kakatu sanaas in lixa; mana isaa keessatti hafees manicha, muka isaa, dhagaa isaas in balleessa' jedha" jedhe.

*3 Kes 27:14-26

Mul'ata Isa Torbaffaa

5 Ergasiis ergamichi inni anaa wajjin dubbachaa ture sun dhufee, "Ol ilaali! Inni amma mul'atu kun maal inni?" naan jedhe. ⁶Ani immoo, "Maal inni?" jedhee isa nan gaafadhe; innis, "Kun quunnaa safaraa ti, kun yakka saba guutummaa biyya lafaa ti" jedhee anaaf in deebisee.

⁷Kunoo, qadaaddiin quunnaa safaraa inni dilalii irraa hojjetame sun yommuu baname, dubartiin tokko quunnaa safaraa sana keessa teessee in argamte. ⁸Ergamichis, "Isheen kun jal'ina" jedhe, ishee immoo quunnaa safaraa sana keessatti gad ishee cuuka'ee, qadaaddii isaa immoo gad itti deebisee jabeessee in qadaade. ⁹Ergasiis yommuun ol ilaale, dubartoota qoochoo isaanii jalaa qilleensa qaban lama fuula koo duratti nan arge; qoochoon isaanii akka qoochoo allaattii hawaannisaa ti; isaan quunnaa safaraa sana fuudhanii qilleensa keessa balali'anii in sokkan. ¹⁰Ani immoo kana irrattan ergamicha isa anatti dubbachaa ture sana, "Quunnaa safaraa kana eessatti geessu?" jedhee gaafadhe. ¹¹Inni immoo deebisee, "Quunnaa safaraa sana gara biyya

Baabilonitti' in geessu; mana ijaara-niif, yommuu inni qophaa'u achi keessa in kaa'u" naan jedhe.

Mul'ata Isa Saddeettaffaa

6 ¹ Ammas yommuu ol ilaale, kunoo, konkolaattonni afur tulloota sibiila boorrajii lama gidduudhaan utuu as ba'anii nan arge; ² konkolaataa isa duraa fardeen diddimootu, isa lammaffaa immoo fardeen gugurraachatu harkisa ture; ³ konkolaataa isa sadaffaa fardeen adaadiitu, konkolaataa isa afuraffaa immoo fardeen buburreetu harkisa ture; hundumti isaanii ciccimoo turan. ⁴ Ergasii ani ergamicha isa anatti dubbachaa ture sana, "Yaa gooftaa ko, isaan kun maali?" jedhee nan gaafadhe.

⁵ Ergamichi deebisee, "Isaan kun hafuurota golee bantii waaqaa arfan warra Waaqayyo gooftaa guutummaa biyya lafaatiif ergamantu ba'anii dhufan; ⁶ fardeen warri gugurraachi biyya gara bitaa dhaqu, warri adaadiin biyya gara lixa-biiftuu dhaqu, warri buburreen immoo biyya gara mirgaa dhaqu; ⁷ fardeen warri ciccimoon yommuu ba'an biyya lafaa irra asii fi achi adeemuu barbaadanii turan" jedhe; fardeen sanaan immoo, "Ka'aatii biyya lafaa irra asii fi achi adeemaa!" jedheen; kana irratti isaan biyya lafaa irra asii fi achi in adeeman.

⁸ Kana booddee inni na waamee, "Kunoo, fardeen warri biyya gara bitaa dhaqan kun hafuuri gooftichaa biyya gara bitaa irra akka boqotu in godhu" naan jedhe.

Milikkinnal Yeroo Fayyinaa Kennamuu Isaa

⁹ Ammas dubbiin Waaqayyo gara koo dhufee, ¹⁰ "Heldaayi, Xobiyaa fi Yedaa'iyaa warra biyya Baabilon biyya itti booji'amanii turanii, deebi'an irraa meetii fi warqee fudhadhuutii gara mana Yosiyaa ilma Sefaaniyaa dhaqi! ¹¹ Meetichaa fi warqicha fuudhii gonfoo tolchii mataa Iyaasuu angafa lubaa ilma Yozaadaaq irra kaa'ii!" jedhe; ¹² Iyaasuudhaan immoo, "Waaqayyo gooftaan maccaa, 'Kunoo namni maqaan isaa Latii jedhamu tokko as

jira; inni iddoo jiru sanatti damee in godbata, Waaqayyoofis mana qulqullummaa in ijaara. ¹³ Isatu mana qulqullummaa Waaqayyoof ijaara; inni surraa uffatee teessoo isaa irra taa'ee in mo'a; lubni tokkos teessoo isaa bukkee in jiraata; isaan lamaan nagaadhaan walii wajjin in mari'atu' jedhe"; ¹⁴ gonfichis seenaa Heleemiif, Xobiyaaaf, Yedaa'iyaaaf, Heen ilma Sefaaniyaatiif mana qulqullummaa isa kan Waaqayyo keessa in kaa'ama. ¹⁵ Warri biyya fagoo jiran dhufanii, mana qulqullummaa in ijaaru; isin yommuu Waaqayyo gooftaan maccaa gara keessanitti akka na erge in beektu; kunis yoo isin guutummaatti sagalee Waaqayyo gooftaa keessaniitiif abboomamtan ta'a" jedhi!

*13 Far 110:4

*15 Isa 60:10

Soomiin Inni Dhugaa Maal Akka Ta'e Himuu Isaa

7 ¹ Daariyos mo'ee waggaa afuraffaatti, waggicha keessaa ji'a salgaaffaa isa "Kisluu" jedhamutti, ji'icha keessaa guyyaa afuraffaatti dubbiin Waaqayyo gara koo gara Zakaariyaas in dhufe"; ² warri Bel'el, Shaazererii fi Regiim-Melekin namoota isaanii wajjin Waaqayyoon araara akka kadhataniif, ³ "Waggoota baay'eedhaaf gochaa akkuma turre, ji'a shanaffaatti boo'uun, soomuunis nuf ta'a moo?" jedhanii, luboota mana qulqullummaa isa kan Waaqayyo gooftaa maccaa fi raajota akka gaafataniif in ergan*.

*1 1:7

*3 8:19

⁴ Ammas dubbiin Waaqayyo gooftaa maccaa gara koo dhufee, ⁵ "Namoota biyyichaa hundumaa fi lubootaan, 'Waggaa torbaatama darban keessa ji'a shanaffaatti, ji'a torbaffaattis soomaa, boo'aas yommuu turtan dhugumaan anaaf jettanii soomtanii ree"? ⁶ Nyaachaa dhugaas yommuu turtan sana ofuma keessaniif nyaachaa, dhugaas turtan mitii ree? ⁷ Wanti kun isa ani Waaqayyo karaa raajota warra durii dubbadhee turee dha; yeroo sanatti Yerusaleemii fi mandaroota naannoo ishee turan

keessa namoonni in baay'atan, hundumti isaaniis nagaatti jiraachaa turan; akkasumas biyya gara mirgaa fi biyya gaaraa keessa namoonni jiraachaa turan mitii ree?" jedhii gaafadhu!" naan jedhe.

*5 Isa 58:5

⁸ Dubbiin Waaqayyoo ammas gara koo gara Zakaariyaas in dhufe; ⁹ Waaqayyo gooftaan maccaa, "Firdii qajeelaa faradaa, walii keessanittis gaarummaa fi oo'a argisiisaa! ¹⁰ Haadha hiyyeessaa, ijoollee abbaan irra hin jirre, galaa, rakkataas hin cunqursinaa! Garaa keessan keessattis wal irratti waan hamaa hin yaadinaa!" jedhe*.

*9-10 Isa 1:17; Er 7:5-7; Mik 6:8; Bau 22:20-21

¹¹ Isaan garuu dhaga'uu didanii, dugda itti gatanii, gurra isaaniis in cuqqaallatan*; ¹² isaan garaa isaanii akka dhagaa almaazii waan jabeessaniif, dubbii Waaqayyo gooftaan maccaa hafuura isaatiin karaa raajota durii isaanitti himmeef abboommii isaa hin dhageenye; kanaaf dheekkamii Waaqayyo gooftaa maccaa inni guddaan isaanitti dhufe.

¹³ Kana irratti Waaqayyo gooftaan maccaa, "Yommuu isaan waame, isaan anaaf dhaga'uu waan didaniif, anis immoo, yommuu isaan ana waammatan isaaniif hin dhaga'uu" jedha*. ¹⁴ Ani biyya saba warra kaanii hundumaa lafa isaan itti galaa ta'an keessa bubbee isaan bittimsu isaanitti nan erge; biyyichis erga isaan keessaa ba'anii onaa in ta'e, namni tokko illee keessaa hin ba'u, ittis hin galu; isaan akkasitti biyya gaarii kana onsan.

*11 Er 5:3; His 2:3-5

*13 Isa 1:15

Yerusaleem Inni Akka Eebbisu Abdachisuu Isaa

8 ¹ Ammas dubbiin Waaqayyo gooftaa maccaa gara koo in dhufe; ² Waaqayyo gooftaan maccaa, "Ani waa'ee Xiyooniif guddaa hinaafeera, baay'ee aareeras*." ³ Ani Waaqayyo gara Xiyoonitti nan deebi'a, Yerusaleem keessa nan jiraadha; yommuu Yerusaleem mandara dhugaan keessa jiru in jedhamti; tulluu koo inni, "Tulluu Waaqayyo gooftaa maccaa" jedhamu tulluu qulqullaa'aa in ta'a*.

*2 1:14

*3 1:16; Isa 1:26; 2:3

⁴ "Ani Waaqayyo gooftaan maccaa, yommuu jaarsolii fi jaartolii bara dheeraa jiraatanii waan dulloomaniif, dhaabata qabatani karaa Yerusaleem irratti akka argaman nan godha*; ⁵ ijoolleen dhiiraa fi ijoolleen durbaa karaa irra guutanii mandariicha keessa in taphatu. ⁶ Yeroo sanatti kun hambaa saba kanaa duratti wanta dinqisiisaa yoo fakkaate iyyuu, ana Waaqayyo gooftaa maccaa durattis wanta dinqisiisaa ta'aa ree?" jedhe; kana Waaqayyo gooftaa maccaatu dubbate*.

*4 Isa 65:20

*6 Er 32:17; Luq 1:37

⁷ Ammas Waaqayyo gooftaan maccaa, "Kunoo, ani saba koo harka warra ba'a-biiftuu fi harka warra lixa-biiftuu jalaa baasee, ⁸ Yerusaleem keessa akka jiraataniif achi deebisee isaan nan fida; isaan saba koo in ta'u, anis Waaqayyo isaanii nan ta'a, dhugaadhaa fi qajeelummaadhaan isaan nan bulcha" jedha*.

*8 Er 24:7

⁹ Waaqayyo gooftaan maccaa, "Isin warri yommuu manni qulqullummaa koo deebi'ee ijaaramuudhaaf hundeen isaa kaa'ame, wanta raajonni dubbatan dhageessan humna jabaa-dhaatii manicha ijaaraa*! ¹⁰ Bara sana dura namaafis, horiifis gatiin dadhabii isaanii hin turre; namoonni hundinuu walitti akka ka'an waanan godheef, sababii diina isaatiif namni nagaadhaan ba'ee, nagaadhaan galuu danda'u hin turre. ¹¹ Amma garuu ani haftee saba kanaa irratti akka duriitti hin hojjeedu; ani Waaqayyo gooftaan maccaa kana dubbadheera. ¹² Yommuu sanyiin fa-ca'ee nagaatti in guddata, mukti wayniis ija in godhata, lafti midhaan in baasa, waaqnis fixeensa gad in roobaa; ani kana hundumaa haftee saba kanaatiif dhaala godhee nan kenna. ¹³ Isin yaa namoota Yihudaa, isin yaa namoota Israa'el, himumaa dur saba biyya lafaa gidduutti abaarsaaf taatanii turtan, amma immoo ani isin nan fayyisa, eebbafis in taatu; isin humna jabaa-dhaa malee, hin sodaatinaa!" jedhe*.

*9 Isa 35:3

*13 Uma 12:2; 22:18; 26:4

¹ Zak 5:11 "Baabilon" Ib "Shiinaar" maqaa ishee isa durii ti.

14 Waaqayyo gooftaan maccaa, "Yommuu abboonni keessan na aarsanii na dheekkamsiisan, isin adabuu-dhaaf murtoo godhee kanan ture, yaada koo akkuman hin geddarin, ¹⁵ amma immoo namoota Yerusaleemiif, namoota Yihudaatiifis wanta gaarii gochuudhaaf murtoo godheera, hin sodaatinaa! ¹⁶ Wanti gochuun isin irra jiru kanatti fufee jira; walii walii keessanitti dhugaa dubbadhaa! Karra kellaa keessanii durattis firdii dhugaa fi firdii nagaa faradaa*! ¹⁷ Walii keessan irratti hamaa hin yaadinaa! Sobaan kakachuu hin jaallatinaa! Ani kana hundumaa nan jibba; ani Waaqayyo gooftaan maccaa kana dubbadheera" jedha.

*16 7:8-10; Efe 4:25

18 Ammas dubbiin Waaqayyo gooftaa maccaa gara koo dhufee, ¹⁹ "Soomiin ji'a afuraffaa, soomiin ji'a shanaffaa, soomiin ji'a torbaffaa fi soomiin ji'a kurnaffaa namoota Yihudaatiif guyyaa gammachuu fi guyyaa ilillee, guyyaa ayyaana gammachuus in ta'a; kanaafis isin dhugaa fi nagaa jaalladhaa!" jedha*.

*19 7:3,15

20 Waaqayyo gooftaan maccaa, "Si'achi sabni baay'een, mandara baay'ee keessa warri jiraatanis in dhufu; ²¹ warri mandara tokko keessa jiraatan, gara warra mandara isa kaan keessa jiraatanii dhaqanii, 'Kottaa dafnee dhaqnee Waaqayyo gooftaa maccaa araara in kadhannaa, isa in barbaaddannas' in jedhu; jarris immoo, 'Anis nan dhaqa, anis nan dhaqa' in jedhu; ²² sabni baay'een, sabni jajjaboonis ana Waaqayyo gooftaa maccaa barbaaddachuudhaaf, ana araarfachuudhaafis gara Yerusaleem in dhufu" jedha*.

*20-22 14:16; Isa 2:2-3

23 Waaqayyo gooftaan maccaa, "Guyyaa sanatti saba afaan garaa garaa dubbatan hundumaa keessaa namoonni kudhan fiixee uffata nama Yihudii tokko qabanii, 'Waaqayyo sii wajjin akka jiru waan dhageenyeeff, nmyis sii wajjin achi in dhaqna' in jedhu" jedha.

Diinota Israa'elitti Faraduu Isaa

9 ¹ Dubbiin Waaqayyo waa'ee biyya Hadraakiif dubbate mandara Damaasqoo irras in ga'e;

iji namoota kan biraa, iji gosoota Israa'el hundinnus gara Waaqayyoo in ilaala*;
² Haamaat isheen daarii isaanii jirtu, Xirosii fi Sidoon warri ogeessonni sun gara isaa in ilaalu*.
³ Xiros masaraa in ijaarratti, meetii akka biyyootti, warqees akka dhoqqee karaa keessaatti in tuullatti.
⁴ Kunoo, Waaqayyo garuu ishee in hiyyoomsa, humna waraanaa ishees galaanatti gad in darbata, mandarattiinis ibiddaan in dhurmti.

*1 Isa 17:1-14

*2 Isa 23:1-18

⁵ Asbqalon isa kana argitee in sodaatti, Gaazaan guddaa in hollatti, Eqroonis abdiin ishee waan duraa citeef, akkasuma in taati; Gaazaan mootii in dhabdi, Ashqalon keessas namni hin jiraatu*.

⁶ Ashdoodin warri ormi in fudhatu, Waaqayyo, "Ani Filisxeemota warra of korsituu kana raawwadhee nan balleessa.

⁷ Ani dhiiga afaan isaanii keessaa, nyaata dhowwamaas ilkaan isaanii gidduudhaa nan baasa; warri hafan kan koo in ta'u, biyya Yihudaa keessatti akka warra ulfina-qabootaa in ta'u, Eqroon immoo akka warra Yibusootaa in taati*.

⁸ Ani mana koo irraa saamtota nan eeggadha, egaa ani amma ija kootiin saba koo waanan eeguuf, warri isaan cunqursan si'achi deebi'anii isaan keessa hin ba'an" jedha*.

*5 Er 47:1-7; Isa 14:28-32

*7 Uma 9:4; Lew 17:10-14; Isa 15:63; 2Sam 24:18

*8 2:9; His 34:27-28

Mootiin Nagaa Akka Dhufu Himuu Isaa

⁹ Isin yaa namoota Xiyoon, guddaa gammadaa! Isin yaa namoota Yerusaleem, guddisaatiif sagalee gammachuu dhageessisaa! Kunoo, mootiin keessan inni qajeelaan, inni mo'aan, gad of deebisee, harree yaabii keessaa ilmoo harree irra taa'ee gara keessan in dhufa*.
¹⁰ Waaqayyo, "Ani biyya Israa'el keessaa konkolaataa, Yerusaleem keessaas fardeen lolaa nan balleessa; iddaan lolaa in cita, mootichi sabatti nagaa in labsa, mootummaan isaa galaanaa hamma galaanaatti, lagaa hamma dhuma lafaatti in bal'ata*.

*9 Sef 3:14; Mat 21:5

*10 Mik 5:9

¹¹ "Isiniin immoo, 'Sababii kakuu koo isa dhiigaan isiniif dhaabameetiif jedhee, warra isin duraa hidhaman, boolla bishaan hin qabne keessaa isiniif nan baasa*.

¹² Isin warri bidhamtanii abdiidhaan jirtan deebi'aa! Har'a dachaa lama

akkan isiniif deebisu ani isinitti nan hima' jedha*.

¹³ Yommuu Yihudaa akka iddaatti dabsadhu, Efreemin immoo akka xiyyaatti isatti nan kaa'adha. Yaa Xiyoon, ani ilmaan kee, ilmaan Yaawaan irratti nan kaasa, akka billaa gootaa akka ati taatu nan godha" jedha.

*11 Bau 24:8

*12 Isa 40:2; 61:7

¹⁴ Yommuu Waaqayyo isaan irratti in mul'ata, xiyyi isaas akka bakakkaatti in ba'a;

Waaqayyo gooftaan, fiinoo afuufee

sagalee isaa in dhageessisa, bubbee gara mirgatiinis itti in adeema*;

¹⁵ Waaqayyo gooftaan maccaa isaan in golbooba, dhagaa furuusaatiinis isaan in balleessa, isaan in mo'as; isaan in dhugu, akka nama daadhii waynii quufteetis in wacu; akka xuwwee isa golee iddoo aarsaatti dhiiga ittiin facaasanii in guutamu.

¹⁶ Gaafas Waaqayyo gooftaan isaanii akka tiksituun horii isaa waan hamaa oolchuutti saba isaa in oolba; isaan immoo akka dhagaa gati-jabeessaa isa gonfootti kaa'amee biyya isaa keessatti in calaqqisu.

¹⁷ Simboon isaanii fi miidhagummaah isaanii attam guddaa dha! Midhaan dargaggootaaf, daadhiin waynii inni haaraanis durbootaaf humna in kenna*.

*14 Far 18:14

*17 Kes 33:28

Waaqayyo Saba Isaatti Araara Argisiisuu Isaa

10 ¹ Bokkaa ji'a birraa akka isiniif kennuuf Waaqayyoon kadhadaa! Isatu duumessa bokkaa qabuu fi bokkaa tiifuu namootaaf ergee, wanta hundumaaf, lafti biqiltuu biqilchee akka lalisu godhe*.

² Waaqayyoliin tolfamoon maatii wanta waa'ee hin baafne in dubbatu,

warri hooda bimanis mul'ata sobaa in argu, abjuu sobaas in himu; isaan akkasumaan nama in jajjabeessu; kanaaf sabni tiksee waan hin qabneef,

akka hoolotaa in jooru, in rakkatus*.

*1 Er 5:24; Kes 11:13-14

*2 Mat 9:36

³ Waaqayyo, "Aariin koo tiksoota irratti in boba'a, warra dura-buutotaa nan adaba; ani Waaqayyo gooftaan maccaa hoolota koo namoota

Yihudaatiif nan dhimma, akka farda lolaa isaan nan jabeessa*;
⁴ sanyii Yihudaa keessaa dhagaan golee, qofoon dunkaanaa, iddaan lolaa fi warri biyya bulchan hundinuu in ba'u*.

⁵ Isaan walii wajjin akka jagnoota jajjaboo, warra yeroo lolaa diinota isaanii dhoqqee karaa keessaa irratti lafatti dhidhiitanii in ta'u; Waaqayyo isaanii wajjin waan jiruuf, isaan lola keessatti abbootii fardeenii in yeellaasisu.

*3 Er 23:1-4; His 34:2

*4 Er 30:21

⁶ "Ani namoota Yihudaa nan jabeessa, namoota Yoseefis nan fayyisa; ani waanan isaaniif oo'uuf, akka isaanii duriitti isaan nan deebisa; ani Waaqayyo isaanii waanan ta'eef, kadhata isaanii isaaniif nan dhaga'a,

akka waanan takkaa isaan hin tufatiniis in ta'u; ⁷ namoonni Efreemii akka jagnoota warra jajjaboo in ta'u, akka waan daadhii waynii dhuganiitti

garaa isaaniitti in gammadu; ilmaan isaanii kana arganii in gammadu, garaan isaaniis Waaqayyotti in gammada.

* Ani milikkitaan waamee,

walitti isaan nan qaba; ani dhugumaan isaan nan fura, isaanis akkuma isaanii duriitti in baay'atu*;

⁹ ani saba warra kaan gidduu utuman isaan facaasee jiruu iyyuu, isaan biyya fagoo sanaa ana in yaadatu turan; isaanii fi ilmaan isaanii in jiraatu, biyyattis in deebi'u*;

¹⁰ ani biyya Gibxii deebisee isaan nan fida; biyya Asor keessaas walitti isaan nan qaba; ani biyya Giil'aadii fi biyya Liibaanonitti isaan nan galcha; akkasitti isaan biyyicha keessa in guutu*.

¹¹ Isaan galaana rakkinnaa sana keessa in darbu, dha'aan galaanaas isaaniif in abboomama; tuujjubni galaana Abbayyaa hundinuu in goga; Asor ishee of tuultuun gad in deebiti, uleen mootummaa warra Gibxiis in bada*;
¹² ani Waaqayyo isaan nan jabeessa, maqaa kootiinis karaa isaanii irra in deddeebi'u" jedha.

*8 Isa 11:11-12

*9 Isa 66:19; Er 51:50

*10 Isa 49:19-20

*11 Bau 14:21; Isa 11:15; 50:2

Geggeessitoonni Warri Jal'oonni Kufuu Isaanii

11 ¹ Yaa Liibaanon, ibiddi mukkeetii birbirsaa kee akka fixuuf balbala kee bani!

² Mukti birbirsaa waan jigeef, yaa muka hoomii wawwaadhu! Mukkeetii warri jajjaboon badaniiru, yaa qilxuu Baashaan, caakkaan inni gobbuun waan cirameef, atis wawwaadhu!

³ Iddoon isaan horii dheechisan waan isaan duraa badeef, tiksoonni in boo'u, mee dhaggeeffadhu!

Ilmooleen leencotaas caakkaan Yordaanos inni gobbuun

isaan duraa waan cirameef in aadu, mee dhaggeeffadhu!

⁴ Waaqayyo gooftaan koo, "Hoolota warra qalmaaf kaa'aman soori! ⁵ Warri isaan bitatan yommuu isaan qalatan hin adabaman; warri isaan gurguratan, 'Waaqayyoon galanni haa ga'u! Nuyi sooromneerra' in jedhu; tiksoonni isaaniis isaaniif hin oo'an; ⁶ ani deebi'ee warra biyya kana keessa jiraataniif hin oo'u; kunoo, ani tokkon tokkon isaanii harka walii walii isaanii fi harka mootii isaaniitti dabarsée nan kenna; isaan biyyicha in rukutu, ani harka isaanii keessaa isaan hin baasu" jedha; kana Waaqayyotu dubbate.

⁷ Ani hoolota warra qalmaaf kaa'aman, addumaan immoo warra miidhaman sana nan soore; ulee lamas fudhahde, isa tokko, "Faara-tolina" isa kaan immoo, "Tokkummaa" jedhee nan moggaase, hoolotas nan tikse. ⁸ Ji'a tokko gidduuttis tiksoota sadii nan baase; ani isaan nan jibbe, isaanis na jibban; ⁹ kanaafan ani immoo, "Ani isin hin tiksu! Inni du'u haa du'u! Inni badus haa badu! Warri hafanis foon walii walii isaanii haa nyaatan!" jedhe.

¹⁰ Kana booddee ulee koo isa "Faara-tolina" jedhamu sana fuudhee nan cabse, kakuu koo isa ani saba hundumaa wajjin gales nan cabse. ¹¹ Inni gaafasuma in cabe; hoolonni warri miidhamoon ana argan kun dubbii Waaqayyoo ta'uu isaa in beekan.

¹² Ani isaaniin, "Yoo isin duratti qajeelaa ta'ee mul'ateef, miindaa koo anaaf kennaa! Garuu yoo qajeelaa isinitti fakkaachuu dhaabaate immoo haa hafu!" nan jedhe; achumaanis isaan miindaa koo meetii guuroo soddoma anaaf in kennan*. ¹³ Waaqayyo yommu, "Meeticha suphe-dhoofuutti darbadhu!" naan jedhe; miindaa isaan kun "Ulfina-qabeessa" jedhanii, anaaf muran meetii guuroo soddoman sana fuudhee mana qulqullummaa keessatti suphe-dhoofuutti nan darbadhe*. ¹⁴ Kana booddee ulee koo isa lammaf-faa isa "Tokkummaa" jedhamu sanas nan cabse; kanaanis obbolummaan Yihudaa fi Israa'el gargar in cabe*.

*12 Mat 26:15

*13 Mat 27:9-10

*14 His 37:15-24

¹⁵ Ergasiis Waaqayyo, "Mi'a tiksoota gowwootaa sana fudhadhu! ¹⁶ Kunoo, ani tiksee isa warra badee fi warra ilmoolee bin barbaanne, isa warra cabe bin wal'aane, isa warra fayyaa hin tiksine, biyyicha irratti nan kaasa; inni warra cooman in nyaata, kottee isaaniis irraa in buqqisa*.

¹⁷ Tiksoota warra waa'ee hin baafne, warra hoolota hin eegneef wayyoo!

Billaan, harka isaa mirgaa isa irraa haa kutu, ija isaa mirgaas keessaa haa baasu!

Harki isaa raawwatee haa gogu! Iji isaa mirgaas raawwatee haa jaamu!" jedhe.

*15-16 His 34:2-4

Yerusaalem Baraarante Akka Haftu Dubbachuu Isaa

12 ¹ Dubbiin Waaqayyo waa'ee Israa'elii dubbate kanatti fufee jira; Waaqayyo inni waaqota diriirse, inni hundee lafaa kaa'ee, inni hafuura nama keessatti uume*. ² "Ani kunoo, Yerusaalemiin xooffoo saba naannoo ishee jiran hundumaa gatantarsitu nan godha; yommuu Yerusaalem marfamtu Yihudaanis akkasuma in marfamti*. ³ Yeroo sabni lafa irraa hundinuu Yerusaalem irratti walitti qabaman, ani immoo akka dhagaa ulfaataa ishee nan godha, warri ishee garagalbbuu yaalan hundinuu in caccabu*. ⁴ Guyyaa sanatti ani fardeen hundumaa nan naasisa, abboota fardeenii isaaniis nan maraacha; ani mana Yihudaa nan eega; garuu ija fardeen saba sana hundumaa nan jaamsa; kana ana Waaqayyo gooftaatu dubbate.

⁵ Ani Waaqayyo gooftaan maccaa warra Yerusaalem keessa jiraataniif Waaqayyo isaanii waanan ta'eef, geggeessitoonni Yihudaa tokkon tokkon isaanii yaada isaanii keessatti, 'Inni jabina keenya' aanaan in jedhu.

*1 Isa 42:5

*2 Er 25:15-29; Isa 51:17

*3 Yoe 3:9-13

⁶ "Guyyaa sanatti geggeessitoonni Yihudaa akka xuwwee ibiddaa isa qoraan irra tuulamee, akka guca iddoo tuullaa midhaanii keessaa boba'uus akka ta'an nan godha; isaan saba

naannoo isaanii hundumaa warra gara mirgaa fi gara bitaa jiran in fixu; Yerusaaalem garuu iddoodhuma duriitti in hafti*; ⁷ ulfinni mana Daawitii fi ulfinni namoota Yerusaaalem keessa jiraatanii kan Yihudaa irra akka hin caalletti, ani Waaqayyo duraan dursee dunkaana Yihudaa nan oolcha; ⁸ ani Waaqayyo guyyaa sanatti, namoota Yerusaaalem keessa jiraatan nan golbooba; isaan keessaa inni dadhabaan illee akka Daawit nama jabaa in ta'a; sanyiin Daawit immoo akka ergamaa kootti, akka koo akka Waaqayyootis isaan in geggeessa. ⁹ Guyyaa sanatti ani saba warra Yerusaaalem irratti ka'an hundumaa balleessuudhaaf nan barbaada*.

*6 Oba 18

*9 Mul 20:9

¹⁰ "Ani hafuura araaraa fi hafuura kadhataa mana Daawitii fi warra Yerusaaalem keessa jiraatan irratti nan dhangalaasa; isaanis isa waraanan sana in ilaalu, akka nama mucaa tokkichaaf boo'uutti in boo'u, akka nama du'a ilma angafaatiif baay'isee gadduuttis in gaddu*." ¹¹ Guyyaa sanatti boo'ichi guddaan sanyiin isa Hadaad Rimoon dachaa Megidoo keessatti ta'ee sun Yerusaaalem keessatti in ta'a*. ¹² Namoonni biyyichaa akka maatii maatii isaanitti in boo'u; maatiin qomoo Daawit kophaatti, dubartoonni isaanii kophaatti, maatiin qomoo Naataan kophaatti, dubartoonni isaanii kophaatti, ¹³ maatiin qomoo Lewwii kophaatti, dubartoonni isaanii kophaatti, maatiin Shime'ii kophaatti, dubartoonni isaanii kophaatti, ¹⁴ qomoon warra kaanii hundinuus kophaatti, dubartoonni isaanii kophaatti in boo'u" jedhe.

*10 Yoh 19:37; Mul 1:7

*11 2Mot 5:18

Cubhuu Isaaniil Irraa Qullaa'uu Isaaniil

13 ¹ Guyyaa sanatti burqaan cubbuutti, xuraa'ummaattis isaan qulleessu maatii Daawitii fi warra Yerusaaalem keessa jiraataniif in banama*; ² Waaqayyo gooftaan maccaa, "Guyyaa sanatti ani maqaa waaqayyolii tolfamoo, biyya sana keessaa raawwadhee nan balleessa, isaanis deebi'anii hin yaadataman; ani raajotaa fi hafuura

xuraa'aa biyya sana keessaa nan baasa*. ³ Gaafas namni tokko illee yoo raajii dubbate, abbaan isa dhalchee fi haati isa deesse, 'Ati maqaa Waaqayyootiin soba waan dubbattuuf, du'uutu si irra jira' ittiin in jedhu; yoo inni raajii dubbateef, abbaan isa dhalchee fi haati isa deesse isa in waraanu*.

*1 14:8; Isa 12:3; 55:1

*2 Mik 5:12-13; Er 29:8-9

*3 Kes 13:6; Er 14:13-15

⁴ "Guyyaa sanatti tokkon tokkon raajotaa, raajii isa mul'ataan argan sanaaf in yeella'u; nama gowwoom-suudhaaf jedhaniis uffata raajotaa isa dabbasaa qabu sana uffachuu in dhiisu; ⁵ isaan, 'Ani raajii miti! Nama lafa qotuu dha malee, mucummaa kootii jalqabee iyyuu ani lafa qotuu jaalladha' in jedhu. ⁶ Yoo namni tokko, 'Madaan dhagna keessanii kun immoo maal ree?' ittiin jedhe, isaan immoo, 'Mana firoota keenyaatti madoofnee dhufne' in jedhu" jedha.

Tiksoonni Akka Rukutaman Abhoomuu Isaa

⁷ Waaqayyo gooftaan maccaa, "Yaa billaa, tiksee koo irratti, nama ani amanadhu irrattis ka'ii! Hoolonni akka bittimmaa'aniif tiksee rukuti! Ani harka koo warra xixinnaayyoo irratti ol nan fudhadha*."

* Guutummaa namoota biyyichaa keessaa

harka sadii keessaa
harki lama rukutamae in dhuma;
haa ta'u iyyuu malee,

harka sadii keessaa
harki tokko isa keessatti in hafa*;

⁸ harka sadii isa hafe sanas
ibidda keessa buusee,
akka meetii fi akka warqeetti
qoree nan ilaala;

yommuu isaan maqaa koo
waammatan,
ani immoo isaaniif nan dhaga'a;
'Isaan saba koo ti' nan jedha;
isaanis, 'Waaqayyo gooftaa
keenya'
in jedhu" jedha*.

*7 Mat 26:31

*8 Isa 6:13

*9 Hos 2:25

Guyyaan Waaqayyoo Akka Dhufu Himuu Isaa

14 ¹ Yaa Yerusaaalem, kunoo, guyyaan Waaqayyoo inni itti wanti si irraa saamame ijuma namoota keetii duratti hirmaatamu in dhufa*. ² Waaqayyo guyyaa sanatti sabni hundinuu Yerusaaalem akka lolaniif walitti isaan in qaba; mandarattiin in qabamti, manneetiin in saamamu, dubartoonnis in yeellaasifamu; walakkaan namoota mandarattii booji'amanii in adeemu, namoonni warri hafan immoo mandarattii keessaa hin balleeffaman*. ³ Ergasii garuu Waaqayyoo gad in bu'a akkuma yeroo lola loluutti saba sana in lola*. ⁴ Guyyaa sanatti miilli isaa tulluu ejersaa isa Yerusaaalem irraa gara ba'a-biiftuu jiru irra in dhaabata; tulluun ejersaas gara ba'a-biiftuutii gara lixa-biiftuutti, iddoo lamatti gargar in dho'a; walakkaan isaa immoo gara mirgaatti in hiiqa, gidduu isaattis dachaan guddaan in uumama. ⁵ Yaa namoota Yerusaaalem, isin immoo gara dachaa tulloota koo isa hamma Azelitti bal'atuutti in baqattu; akkuma bara Uzizyaa mootii Yihudaatti, socho'a lafaa jalaa baqattan ammas in baqattu; yommuu Waaqayyoo gooftaan koo in dhufa, qulqulloonni isaa hundinuus isiniij wajjin in dhufu.

*1 Isa 39:6

*2 12:3

*3 Isa 42:13; Mul 19:19; Amo 1:1

⁶ Guyyaa sanatti ifni, dhaamochi, qorris hin jiru. ⁷ Guyyaan biraa tokko in ta'a; isas Waaqayyotuu beeka, gaafas yeroo galgalaa'u ifatu ta'a malee, guyyaan hin ta'u, halkanis hin ta'u*. ⁸ Guyyaa sanatti Yerusaaalem keessaa bishaan jireenyaa in burqa; walakkaan isaa gara galaana ba'a-biiftuutti, walakkaan isaa immoo gara galaana lixa-biiftuutti bonaa fi ganna in yaa'a*. ⁹ Yommuu Waaqayyoo guutummaa biyya lafaa irratti mootii in ta'a; gaafas Waaqayyoo isuma tokkicha, maqaan isaas tokkichuma*.

*7 Mar 13:32; Isa 60:19-20

*8 His 47:1-8; Zak 13:1

*9 Far 97:1; Mul 11:15

*Zak 14:5 "Isniil" yookiis "Isaa" wajjin.

¹⁰ Biyyichis guutummaatti Gebaadhaa hamma Rimoon isa Yerusaaalem irraa gara mirgaa jirutti lafa diriiraa in ta'a; Yerusaaalem garuu karra Beniyyaminii hamma karra isa duraatti, hamma golee karrichaatti, riqaa Hanaani'elii hamma iddoo cunfaa daadhii waynii isa kan mootichaatti ol jettee iddoo isheetti in hafti*. ¹¹ Namni ishee keessa in jiraata, si'achis deebite hin balleeffamtu; bir'aa malees in jiraatti*.

*10 Er 31:38-40

*11 Er 33:16; Mul 22:3

¹² Dha'ichi inni Waaqayyoo saba warra Yerusaaalem in lolan ittiin rukutu kanatti fufee jira; utuma miilla isaanittiin dhaabatani dhagnii isaanii in tortora, iji isaanii boolluma isaa keessatti in tortora, arrabni isaaniis afaan isaanii keessatti in tortora*. ¹³ Guyyaa sanatti wanti guddaa isaan naasisu Waaqayyoo biraa isaanitti in dhufa; inni tokko isaan harkaan in qabata, walis in reebu. ¹⁴ Warri Yihudaas Yerusaaalemitti in lolu; badhaadhummaan saba naannoo sanaa hundumaa warqee baay'ee fi meetiin, uffannis walitti in qabama. ¹⁵ Dha'ichi kana fakkaatus fardeen irratti, gaangolii irratti, gaalota irratti, harroota irratti, borii buufata sana keessa jiran hundumaa irrattis in dhufa.

*12 2Mot 19:34-35

¹⁶ Yommuu saba warra Yerusaaalem rukutan hundumaa keessaa warri hafan immoo Waaqayyoo gooftaa maccaa isa mootichaaf sagaduudhaaf, ayyaana Gordommaas ayyaaneffachuu-dhaaf, waggaa waggaa achitti ol in ba'u*. ¹⁷ Gosoota biyya lafaa irra jiran keessaa, Waaqayyoo gooftaa maccaa isa mootichaaf sagaduudhaaf gara Yerusaaalemitti kan ol hin baaneef bokkaan hin roobu. ¹⁸ Gosi warra Gibxiis achitti ol ba'ce hin ayyaanefatu yoo ta'e, bokkaa hin argatu; Waaqayyoo dha'icha isa warra gara Yerusaaalemitti ol ba'anii ayyaana Gordommaa ayyaaneffachuu didan irratti fide isaan irrattis in fida. ¹⁹ Egaa adabni warra Gibxii fi saba warra achitti ol ba'anii ayyaana Gordommaa ayyaaneffachuu didan hundumaa irratti dhufu isa kana.

*16 Isa 66:23

20 Guyyaa sanatti bilbila fardeenii irratti, "Waaqayyooof kan qulqullaa'ee dha" jedhamee in caafama; xuwween mana qulqullummaa keessatti waa itti affeelan akka waciitii isa iddoo aarsaa dura dhaabatuufti in ilaalama*. ²¹ Xuwween Yerusaa'alem keessaa fi Yihudaa keessaa hundinuu, Waaqayyoo gooftaa

maccaatiif qulqulluu in ta'u; warri aarsaa dhi'eessuu dhufan hundinuu isaan keessaa muraasa fudhatanii waa itti in affeellatu; guyyaa sanatti warri nagadan mana Waaqayyoo gooftaa maccaa keessa deebi'anii hin jiraatan*.

*20 *Bau 28:36*

*21 *Mul 21:26-27; Mat 21:12*

Macaafa Miilkiyaas Raajichaa

Waaqayyoo Saba Isaa Akka Jaallatu Himuu Isaa

1 ¹ Dubbiin Waaqayyoo karaa Miilkiyaas saba Israa'elitti himé kanatti fufee jira; ² Waaqayyoo, "Ani isin nan jaalladhe" jedha; isin garuu, "Attamitti nu jaallate? Eesaawuun obboleessa Yaaqoob mitii ree?" jettanii in gaafattu; Waaqayyoo immoo, "Ani amma iyyuu Yaaqoobin nan jaalladhe*", ³ Eesaawuu garuu nan jibbe; tulloota isaas lafa onaa nan godhe, dhaala isaas lafa waangonni jiraatan nan godhe" jedhe*. ⁴ Sanyiin Eesaawuu Edoomoonni, "Mandaroonni keenya caccabanii turan, amma garuu warra diigaman sana deebifnee in ijaarra!" in jedhu; garuu Waaqayyoo gooftaan maccaa, "Isaan illee in ijaaru, ani garuu nan diiga, 'Biyyi sun biyya hamaa, sabni isaas saba Waaqayyoo bara baraan itti dheekkamuu' in jedhamu; ⁵ isin sabni Israa'el kana ija keessaniin argitanii, 'Daarii Israa'el garasitti iyyuu Waaqayyoo guddaa dha' in jettu" jedhe.

*2 *Kes 7:7-8; Uma 25:23; Hos 11:1; Rom 9:13*

*3 *Uma 36:9; Isa 34:5-17*

Luboonni Dheekkamamuu Isaanii

6 Waaqayyoo gooftaan maccaa luboota warra isa tuffataniin, "Ilmi abbaa isaatiif, hojjetaanis isa isa hojjechiifatuuf ulfina in kenna; egaa ergan abbaa ta'ee ulfini anaaf ta'u meerre ree? Ergan isa hojjechiifatu ta'ees sodaatamuun anaaf ta'u meerre ree? Isin

garuu, 'Attamitti si tuffanne?' jettanii in gaafattu*. ⁷ Isin kenna midhaanii isa xuraa'aa iddoo aarsaa koo irratti in dhi'eessitu; garuu kanuma keessaa immoo, 'Attamitti si xureessine?' jettanii in gaafattu; dabaltaniis, 'Iddoon itti Waaqayyooof aarsaa dhi'eessan waa'ee hin baasu' in jettu. ⁸ Horii jaamaa aarsaadhaaf yommuu dhi'eessitan kun wanta gadhee dha mitii ree? Horii naafa yookiis dhukkubsataa aarsaadhaaf yommuu dhi'eessitan, kunis wanta gadhee dha mitii ree? Mee wanta akkasii isa isin bulchuuf dhi'eessaa kaa! Inni dhuguma isinitti in gamma-daa ree? Jaallatees isin harkaa in fudhataa ree?" jedha; kana Waaqayyoo gooftaa maccaatu dubbate*.

*6 *Bau 20:11; Kes 32:6*

*8 *Lew 22:18-25; Kes 15:21*

9 Waaqayyoo gooftaan maccaa, "Isin harka keessaniin wanta akkasii ana Waaqayyooof utuu aarsaa dhi'eessitanii yoo akka ani isinitti araaramuuf na kadhattan ani isiniif nan dhaga'aa ree? ¹⁰ Ani isin hin jaalladhu, aarsaa isin anaaf dhi'eessitanis isin harkaa hin fudhadhu waanan ta'eef, akka isin iddoo aarsaa koo irratti akkasumaan ibidda hin qabsiifnetti, maaloo namni isin keessaa balbala mana qulqullummaa cufu utuu jiraatee! ¹¹ Maqaan koo ba'a-biiftuutii saba biyya lafaa gidduutti guddaa in ta'a; maqaan koo saba biyya lafaa gidduutti guddaa waan ta'eef, iddoo hundumaatti ulfina maqaa

kootiif ixannii fi kennaan midhaanii in dhi'ceffama" jedha; kana Waaqayyoo gooftaa maccaatu dubbate*.

*11 *Isa 60:1-7*

12 Ammas Waaqayyoo gooftaan maccaa, "Isin garuu, 'Iddoon itti Waaqayyooof aarsaa dhi'eessan nyaata achi irraatiin xuraa'ceera, jibbameeras' jettanii isa in xureessitu*; ¹³ dabaltaniis, 'Kun ba'aa dha!' jettanii itti in ga'iftu; isinoo horii hatame, horii naafa, horii dhukkubsataas fiddanii aarsaa in dhi'eessitu, egaa kana harka keessan keessaa fudhadhuu ree? ¹⁴ Namni bushaayee isaa keessaa korbeessa isa ana Waaqayyoo duratti fudhatamaa ta'e aarsaa dhi'eessuudhaaf wareegee, iddoo isaa horii mudaa qabu dhi'eessuudhaan gowwoomsaa hojjetu abaaramaa haa ta'u! Ani mootii guddaa waanan ta'eef, maqaan koo saba lafa irraa keessatti sodaatamaa in ta'a" jedha; kana Waaqayyoo gooftaa maccaatu dubbate*.

*12 *Isa 43:23-24*

*14 *Lew 22:19*

Luboota Akeekkachilsuu Isaa

2 ¹ Waaqayyoo gooftaan maccaa, "Yaa lubootaa! Abboommiin kun isiniif ba'e; ² isin yoo anaaf dhaga'uu diddan, maqaa kootiif ulfina kennuudhaaf yoo itti yaaduu dhiifan, ani immoo abaarsa isin irratti nan erga, cebba keessanis abaarsatti nan geddara; sababii isin ulfina anaaf kennuudhaaf itti yaaduu dhiiftaniif, dhuguma ani ammuma iyyuu abaareera*. ³ Kuno, ani sababii keessaniif jedhee, sanyii keessan nan ifadha, fuula keessanitti dhoqqee nan diba; dhoqqee horii isa yeroo ayyaanaa qaltanii aarsaa dhi'eessitan keessaa ba'u wajjinis diidatti in gatantu. ⁴ Yommuu kakuun koo inni ani Lewwiidhaaf gale akka itti fufuuf jedhee, abboommiin kana akkan kenne in beektu; kana ana Waaqayyoo gooftaa maccaatu dubbate. ⁵ Kakuun koo inni isaa wajjin ture sun kakuu jireenyaa fi kakuu nagaa ti; kanas akka inni ana safeeffatuufan isaaf kenne; innis ana sodaatee maqaa kootiif ulfina kenneera. ⁶ Barsiisa dhugaa in barsiisa ture, dubbiin jal'aanis afaan isaa keessaa hin baane, nagaadhaa fi qajeelummaadhaan ana wajjin jiraateera, namoota baay'ees yakkattii deebiseera*.

*2 *Kes 28:15*

*4-6 *Kes 33:8-11; 18:1-8*

7 "Lubni beekumsa isa dhugaa in eega; inni ergamaa Waaqayyoo gooftaa maccaa waan ta'eef, namni afaan isaa keessaa barumsa in barbaada*. ⁸ Isin garuu karaa irraa jal'attanii namoota baay'ees barsiisa keessaniin gufachiiftaniittu, kakuu ani Lewwiidhaaf gales cabsitaniittu; kana ana Waaqayyoo gooftaa maccaatu dubbate. ⁹ Sababii isin abboommiin koo eeguu diddaniin seera koo yommuu barsiifanis nama wal caalchiiftaniif, ani immoo saba hundumaa duratti akka tuffatamantiif akka gad deebitan nan godha" jedha.

*7 *Hos 4:4-6*

Biyyi Yibudaa Amanamummaa Dhabuu Ishee

10 Hundumti keenya abbaa tokkicha qabna mitii ree? Waaqayyoo isa tokkichatu hunduma keenya uume mitii ree? Maaliif nuyi walii walii keenyaaf amanamuu dhabnee, wal irratti ka'uudhaan kakuu abboota keenyaa cabsina ree*? ¹¹ Namoonni Yihudaa amanamummaa in dhaban; Israa'elii fi Yerusaa'alem keessattis wanta ciiggaasisaatu hojjetaame; namoonni Yihudaa durboota waaqayyolii ormaa fudhuudhaan iddoo qulqullaa'aa isa Waaqayyoo jaallatu sana in xureessan*. ¹² Waaqayyoo nama wanta xuraa'aa akkasii bojjetu, nama isaaf aarsaa dhi'eessu illee yoo ta'e sanyii Yaaqoob keessaa raawwatee isa haa balleessu!

*10 *1:6; Iyo 31:15; Efe 4:6*

*11 *Iz 9:2; Nah 13:23*

13 Wanti lammaffaan isin gootan immoo, isa isin imimmaaniin iddoo aarsaa Waaqayyoo dhiixanii dha; sababii Waaqayyoo gara gara aarsaa keessanii ilaaluu didee, gammachuudhaan isin harkaa fudhachuu dhiiseef isin in iyyitu, in wawwaattus*. ¹⁴ Isin, "Kun maaliif ta'e?" jettanii in gaafatu; Waaqayyoo isiniif haadha manaa isin qeerrummaadhaan fuutan gidduutti dhuga-baatu dha; isheen hidhata keessan, haadha manaa kakuu keessanii faate'e utuma jirtuu, isin isheedhaaf amanamuu dhiiftanii ishee in gowwoomsitan.

*13 *1:10*

15 Waaqayyo foonitti, lubbuuttis tokko isaan hin goonee ree? Maaliifis tokko isaan godbe? Sanyii ofii isaatiif kaafachuudhaaf kana godhe; kanaafis jireenya keessan ceggadhaa! Haadha manaa qerrummaa keessan irraas amanamummaa hin dhabinaa! ¹⁶ Waaqayyo gooftaan inni kan Israa'el, "Namni haadha manaa isaa gad dhii-suun humnaan ishee irratti ka'uu akka uffataatti uffachuu isaa waan ta'uuf, wanta akkasii baay'isee nan jibba; kanaafis isin jireenya keessan ceggadhaa, amanamummaas hin dhabinaa!" jedha*.

¹⁷ Isin dubbii keessaniin Waaqayyoon dadhabsiiftaniitu; garuu, "Attamitti isa dadhabsiifne?" jettanii in gaafattu; isin, "Warri wanta hamaa hojjetan hundinuu fuula Waaqayyoo duratti gaarii dha, innis isaanitti in gammada; yookiis immoo Waaqayyo abbaan firdii dhugaa eessa jira?" jettanii gaafachuudhaan isa in dadhabsiiftu*.

*16 Kes 24:1; Mat 19:3-9

*17 3:13-14

Guyyaan Firdii Akka Dhufu Himuu Isaa

3 ¹ Waaqayyo gooftaan maccaa, "Kunoo, ani ergamaa koo isa karaa anaaf qopheessu of dura nan erga; dingatas gooftichi inni isin barbaaddan sun gara mana qulqullummaa isaa in dhufa; kunoo, ergamaan kakichaa inni isin hawwitan sun in dhufa" jedha*.

*1 Mar 1:2; Luq 1:76

² Garuu guyyaa dhufa isaatti eenyutu obsuu danda'a ree? Yeroo inni mul'atus eenyutu dhaabachuu danda'a ree? Inni akka ibidda isa sibiila qulleessu ti, akka saamunaa isa ittiin uffata miicanii tis*. ³ Inni akka nama sibiila baqsuutti, akka nama meetii qulleessuuttis taa'ee warra Lewwootaa baqsee akka warqee fi akka meetiitti isaan in qulleessa; isaanis warra Waaqayyoof aarsaa qajeelaa dhi'eesan in ta'u*. ⁴ Yommuus aarsaan Yihudaa fi aarsaan Yerusaalem akka baroota darbanii, akka waggoota durii sanaattis Waaqayyo duratti fudhata-maa in ta'a.

*2 4:4-5; Isa 1:25

*3 Zak 13:9

⁵ Waaqayyo gooftaan maccaa, "Ani firdii kennuudhaaf isinitti dhi'aadheera; warra qoricha namatti godhan irratti, warra ejjitoota irratti, warra sobaan kakatan irratti, namoota warra hojjetoota, haadha hiyyeessaa fi ijoollee abbaa fi haati irra hin jirre cunqursan irratti, warra nama galaa firdii dhowwatan irratti, warra ana hin sodaanne irrattis dafee dhugaa nan ba'a" jedha.

Kudban Keessaa Tokko Akka Baasanif Abboomuu Isaa

⁶ Itti fufees, "Ani Waaqayyo waanan ta'eef, hin geddaramu; kanaaf yaa ilmaan Yaaqoob isin raawwattanii hin badne. ⁷ Bara abboota keessaniitti jalqabdanii hamma ammaatti isin seerrata koo irraa gortaniitu, isa hin eegnes; ani Waaqayyo gooftaan maccaa, 'Gara kootti deebi'aa! Anis gara keessanitti nan deebi'a' isiniin jedheera; isin garuu, 'Attamitti deebina?' in jettu*.

⁸ Namni Waaqayyoon in saamaa? Isin garuu ana in saamtu, 'Attamitti si saamna?' jettanii in gaafattu; isin kudhan keessaa tokkoon, aarsaadhaanis ana in saamtu*; ⁹ isin, sabni hundinuu ana waan saamtaniif, dhugumaan abaarantaniitu; ¹⁰ mana koo keessatti nyaanni akka ta'uuf kudhan keessaa tokko guutummaatti gombisaa kootti galchaa! Ani immoo ittisa bantii waaqaa bane, eebba danuu isin irratti yoon dhangalaasuu dhaabaadheef qoraa ana ilaalaa! ¹¹ Midhaan keessan kan balleessu isin irraa nan ifadha; maasii keessan keessaa mukti waynii keessanii bin maseenu; kana ana Waaqayyo gooftaa maccaatu dubbate*. ¹² Isin biyya nama gammachiisu keessa waan jiraattaniif sabni warri kaan hundinuu, 'Isin warra eebbifamoo dha' isiniin in jedhu*.

*6-7 Hos 12:4; Zak 1:2-3

*8 Lak 18:21-32; Nah 13:10

*9-11 Hag 1:5-8

*12 Isa 61:9

¹³ "Isin ana irratti dubbii cimaa dubbattaniitu; kanuma keessaa immoo, 'Maal si irratti dubbanne?' in jettu; ¹⁴ isin, 'Waaqayyoof hojjebuun akkasumaan; akka warra gaddaniitti fuula Waaqayyo gooftaa maccaa dura utuu deddeebi'aa jirruu, wanta inni abboome eeguun keenya maal waa'ee

baasa? ¹⁵ Warri of gurguddisan kan eebbifamanii dha, warri hamaa hojjetan in guddatu, Waaqayyoon qoraniis isa jalaa in ba'u' in jettu" jedha*.

*14-15 2:17; Far 73:1-28; Zak 7:3,5

¹⁶ Amma immoo warri Waaqayyoon sodaatan walii wajjin utuu dubbattanii Waaqayyo isaan dhaggeefate, waan isaan dubbatan in dhaga'e; macaafni seena waa'ee warra isa sodaatanii fi warra maqaa isaatiif ulfina kennanii, fuula isaa duratti caafameera*. ¹⁷ Waaqayyo gooftaan maccaa, "Guyyaa ani murtoo godbe sanatti isaan qabeenya dhuunfaa koo in ta'u; akkuma abbaan ilma isaaif hojjetuuf oo'u akkasuma anis isaaniif nan oo'a*; ¹⁸ yommuus isin garaa garummaa warra qajeelotaa fi warra jal'oota gidduu jiru, warra ana Waaqayyoof hojjetuu fi warra anaaf hin hojjenne gidduu jirus dabaltanii in argitu" jedha*.

*16 Bau 32:32; Isa 4:3; Dan 7:10; 12:1; Luq 10:20

*17 Far 103:13

*18 Far 1:1-6

Guyyaan Waaqayyoo Akka Dhufu Himuu Isaa

4 ¹ Waaqayyo gooftaan maccaa, "Kunoo, guyyaan akka iddoo ibid-

daa gubu in dhufa; yommuus warri koortuunii fi warri hamaa hojjetan hundinuu akka cidii in ta'u; guyyaan dhufu sun isaan in guba; hidda yookiis damee isaaniif hin hambisu. ² Isin warra maqaa koo sodaattaniif garuu aduun qajeelummaa inni qarri isaa fayyina of keessaa qabu isiniif in ba'a; akka jabbii goorana keessaa ba'ees gad baatanii in burraaqxu*; ³ isin yommuus warra hamoota in dhidhiitu; isaanis guyyaa anni waan kana godhutti koomee keessan jalatti daaraa in ta'u; kana ana Waaqayyo gooftaa maccaatu dubbate.

*2 Luq 1:78

⁴ "Barsiisa garbicha koo Musee, seerrataa fi wanta ana Waaqayyo duratti qajeelaa ta'e, isa ani tulluu Horeeb irratti guutummaa Israa'eliif isatti kenne yaadadhaa*! ⁵ Kunoo, guyyaan koo inni guddanii fi inni sodaachisaan sun utuu hin dhufin dura ani Eliyaas raajicha isiniif nan erga*. ⁶ Ani dhufee, lafa abaarsaan rukutee akkan hin balleessinetti, inni garaa abbootaa gara ijoollee isaaniitti, garaa ijoollees gara abboota isaaniitti in deebisa" jedha.

*4 Kes 4:10-14

*5 Mat 11:14; 17:11-13; Luq 1:17;

Mar 9:11-13; Yoh 1:21